

৬৮-৭৬



আত্মোৎসর্গ

বা

প্রাতিম্মরণীয়-চরিতমালা ।

শ্রীযোগেন্দ্রনাথ বন্দ্যোপাধ্যায় বিদ্যাভূষণ
এম্ এ প্রণীত ।

SELF-DENIAL

OR

LIVES OF PATRIOTS & PHILANTHROPISTS

BY

JOGENDRANATH BANDYOPADYAYA

VIDYABHUSHAN, M.A.

"LIVES OF GREAT MEN ALL REMIND US,
WE CAN MAKE OUR LIVES SCHLIME."

Longfellow.

দ্বিতীয় সংস্করণ ।

সংস্কৃত প্রেস ডিপজিটরি দ্বারা প্রকাশিত ।

কলিকাতা ;

৬৬ নং বেনেটোলা লেন, সাধারণ প্রাক্কলনায় যন্ত্রে

প্রিন্টিং চক্রে প্রণীত কর্তৃক মুদ্রিত ।

১৮৮৫ ।

প্রিন্টার্স অফিস দ্বারা

Printed and published by

আত্মোৎসর্গ

বা

প্রাচীনস্মরণীয়-চরিতমালা ।

শ্রীযোগেন্দ্রনাথ বন্দ্যোপাধ্যায় বিদ্যাভূষণ
এম্ এ প্রণীত ।

SELF-DENIAL

OR

LIVES OF PATRIOTS & PHILANTHROPISTS

BY

JOGENDRANATH BANDYAPADHYAYA
"VIDYABHUSHAN, M. A.

LIVES OF GREAT MEN ALL REMIND US,
WE CAN MAKE OUR LIVES SURVIVE."

Longfellow.


দ্বিতীয় সংস্করণ ।

সংস্কৃত প্রেস ডিপজিটরি দ্বারা প্রকাশিত ।

৪৫ নং বেনেটোলা লেন, সাধারণ ব্রাহ্মসমাজ প্রেসে

শ্রীগিরিশচন্দ্র ঘোষ কর্তৃক মুদ্রিত ।

১৮৮৫ ।



বিজ্ঞাপন।



স্কুলসমূহের সুবিধায় ইনস্পেক্টর পূজাপাদ শ্রীবৃদ্ধ ভূদেব মুখোপাধ্যায় মহাশয়ের কথামত আমি এই জীবনী-মালা লিখিতে আরম্ভ করি। ইহা স্কুল সমূহের পাঠ্য পুস্তক রূপে নিদিষ্ট হইবে এই আশা পাইয়া আমি এই জীবনীগুলি কিঞ্চিৎ সংক্ষিপ্ত করিয়া লিখি। এই সকল মহাপুরুষগণের বিস্তৃত জীবনী স্বতন্ত্র পুস্তকাকারে বাহির করিতেছি বলিয়া এই সংক্ষেপ-ভাবে আনার ক্ষোভ জন্মে নাই। বিশেষতঃ স্কুল স্কুল ঘটনারাশিতে বালকের অপরিপক্ক স্মৃতি-শক্তিকে ভারগ্রস্ত করা অবিধেয় মনে করিয়া এই সকল জীবনীতে কেবল স্কুল স্কুল ঘটনার চিত্র প্রদান করিয়াছি। যে যে মহাত্মার চরিত্রের যে যে অংশ পাঠ করিলে “আত্মোৎসর্গ” শিক্ষা হয়, সেই সেই অংশ উজ্জল বর্ণে চিত্রিত করিয়াছি। উপযুক্ত পুস্তকভাবে আরও কয়েকটা মহাপুরুষের চিত্র অঙ্কিত করিতে পারি নাই। দ্বিতীয় খণ্ডে সেগুলি অঙ্কিত করিব ইচ্ছা রহিল।

এক্ষণে শিক্ষাসমিতি, শিক্ষাবিভাগের কর্তৃপক্ষগণ, ও সাধারণে আমার এই উদ্যমের উৎসাহ বন্ধন করিলে আমি আপনাকে কৃতার্থ মনে করিব।

শ্রীযোগেন্দ্রনাথ বিদ্যাভূষণ।

গ্রন্থকার।

দ্বিতীয় সংস্করণের বিজ্ঞাপন ।



‘আত্মোৎসর্গ’ অল্প দিনের মধ্যে স্মৃধীমণ্ডলী ও শিক্ষা-বিভাগের অধ্যক্ষগণের নিকট বিশেষ আদৃত হওয়ায় আমি ইহার দ্বিতীয় সংস্করণ-কার্যে ত্রুটি হইলাম। যেখানে সংশোধন ও পরিবর্দ্ধন আবশ্যক বোধ হইয়াছে, সেই সেই স্থানে কিঞ্চিৎ কিঞ্চিৎ সংশোধন ও পরিবর্দ্ধন করা হইয়াছে। এই সংশোধিত ও পরিবর্দ্ধিত ‘আত্মোৎসর্গ’ বে উদ্দেশ্যে লিখিত, যদি পাঠকবৃন্দের মধ্যে কাহারও অন্তর সেই উদ্দেশ্যে চালিত হয়, তাহা হইলেও আমার জীবন সার্থক মনে করিব। কিমপিকমিতি।

১৮৮৫ সাল

আবার্ণ

}

শ্রীযোগেন্দ্রনাথ বিদ্যাভূষণ ।

প্রণয়কর ।

মুখবন্ধ ।

আত্মোৎসর্গের লীলাস্থলী ভারতে আজ “আত্মোৎসর্গ” নূতন কথা বলিয়া বোধ হইবে। যে ভারতে একদিন আবাল-বৃদ্ধ-বণিতা আত্মোৎসর্গের দীক্ষাগুরু ছিলেন, আজ সেই ভারতে আত্মোৎসর্গ শিক্ষা দিবার জন্য বৈদেশিক মহাপুরুষগণের উজ্জল চরিত্র পতিত ভারতবাসিগণের সম্মুখে ধরিতে হইল— ইহা অপেক্ষা ক্ষোভের বিষয় আর কি হইতে পারে? পুরাতন কালীন স্বজাতি-প্রেমিক বা বিশ্বপ্রেমিক মহাপুরুষগণের জীবনী-রত্ন অতল কাল-সাগরে নিমগ্ন। সেই রত্নরাজির কিরণমালা কালসাগরের গভীরতা ভেদ করিয়াও তলদর্শী দর্শকের নয়ন কথঞ্চিৎ পরিতৃপ্ত করে সত্য, কিন্তু দর্শন-পিপাসা তাহাতে আরও উদ্দীপিত হয়। দর্শকের ইচ্ছা কালসাগরের সেই গভীর-তম প্রদেশে যাইয়া সেই রত্নরাজির সমুদ্রার করেন। অনেক ডুবুরি সেই ঘনীভূত অনন্ত জলবাশি ভেদ করিয়া রত্ন লাভ করিতে চেষ্টা করিতেছেন বটে, কিন্তু তাঁহাদিগের চেষ্টা বালকের আকাশের চাঁদ ধরার উদ্যমের ন্যায় বার্থ হইয়া যাইতেছে। যদি আমাদের পূর্ব পুরুষগণ যত্ন করিয়া রত্ন রাখিতে জানিতেন, তাহা হইলে আজ সেই অনন্ত রত্নবাজি কালসাগরের অতল জলে ডুবিত না। আজ তাহা হইলে আমাদের দিগকে ছুবগাহ কালসাগরের অতল জলে নামিবার বৃথা চেষ্টায় অমূল্য জীবন নষ্ট করিতে হইত না। পুরাকালে এই ভারতে কত কোটি মহাত্মা স্বদেশানুরাগ, স্বজাতি-প্রেম বা বিশ্বপ্রেমানলে আত্ম-আহুতি প্রদান করিয়াছিলেন, তাহার

ইয়ত্তা করা যায় না। কিন্তু তাঁহাদিগের প্রকৃত জীবনী পাইবার কোন আশা নাই, তাহার আভাসমাত্র স্থানে স্থানে পাওয়া যায়। সেই আভাসমাত্র লইয়া আমি সেই সময়ের ইচ্ছা একটী চরিত্র অঙ্কিত করিয়াছি। যদি তাহা সাধারণের প্রীতিকর হয়, তাহা হইলে ভবিষ্যতে আরও অনেকগুলি চরিত্র চিত্রণ করিব ইচ্ছা আছে।

হিন্দু-যবন-সংঘর্ষকালে আয়োৎসর্গের অনেকগুলি জলন্ত দৃষ্টান্ত পাওয়া যায়। সে চরিত্রগুলি স্তম্ভ অঙ্কিত করিব মানস আছে। এই জন্য সে সকল চরিত্র এখানে অঙ্কিত করিলাম না। ইউরোপ ও আমেরিকা হইতে যে কয়েকটী চরিত্র-রত্ন আহরণ করিয়াছি, তাদৃশ উজ্জল রত্ন আধুনিক সময়ে দৃশ্যপ্য। মহাভারত ও রামায়ণ পাঠে যে কল, এই মহাভাগের চরিত্র-পাঠেও সেই ফল। এই সকল চরিত্রের অনুকরণে মানব দেবতা হয়। জাতীয় চরিত্র গঠনের এমন উপাদান-সামগ্রী আর দেখিতে পাওয়া যায় না। বিশেষতঃ সুকুমার-মতি বালকগণের কোমল অন্তঃকরণে স্বর্গীয় ভাব চিত্র-অঙ্কিত করিবার এমন উপকরণ আর নাই। চরিত্র-সংগঠন যদি শিক্ষার প্রধান উদ্দেশ্য হয়, তাহা হইলে প্রত্যেক বালককে এই প্রাতঃস্মরণীয় মহাপুরুষগণের চরিত্রনঞ্জরী পড়িতে দেওয়া প্রত্যেক অভিভাবক ও প্রত্যেক শিক্ষকের একান্ত কর্তব্য।

কিমধিকমিতি—


সংবৎ ১৯৪২ ৪৩ } শ্রীযোগেন্দ্রনাথ বিদ্যাভূষণ।
ভাদ্র, চুঁচুঁড়া! } গ্রন্থকার।

সূচিপত্র ।

বিষয় ।	পৃষ্ঠা ।
১। দারিদ্র্য-মাহাত্ম্য	১
২। স্বায়ত্ত্ব স্বথের প্রাধান্য	২
৩। দরিদ্র স্বভাব-সন্ন্যাসী	৩
৪। দারিদ্র্যে ঘৃণা জাতীয় পতনের মূল	৫
৫। ভারতে দারিদ্র্য-ব্রত গ্রহণের আবশ্যকতা	৭
৬। বিশ্বামিত্র	১০
৭। শাক্যসিংহ	১১
৮। যিশু খ্রীষ্ট	১৩
৯। গুরুগোবিন্দ	১৫
১০। চৈতন্য	১৯
১১। মহাদেব	২২
১২। ওয়াভেস্	২৬
১৩। উইলিয়ম্ টেল্	৩৩
১৪। জন্ হ্যামডেন্	৩৬
১৫। বিশ্বপ্রেম ও বিশ্বপ্রেমিক উইলবারফোর্স হাউয়ার্ড ও রোমিলী	৪৮
১৬। উইলবারফোর্স ও দাসত্ব-প্রথা	৫১
১৭। উইলবারফোর্স	৫৪

বিষয় ।	পৃষ্ঠা ।
১৮। জন্ হাউয়াড' ও কারা-সংশোধন	৫৭
১৯। জন্ হাউয়াড'	৫৯
২০। সার্ সামুয়েল রোমিলী ও দণ্ডবিধি-সংশোধন	৬৭
২১। গ্যারিবল্দির প্রতিমা প্রতিষ্ঠা	৭৪
২২। গ্যারিবল্দি	৭৮
২৩। ম্যাট্‌সিনি	৮৭
৩০। জর্জ ওয়াসিংটন	৯২
৩১। উপসংহার	১২১





দারিদ্র্য-মাহাত্ম্য ।

জগতে অবিমিশ্রিত সুখ দুঃখদেপিতে পাওয়া যায় না । সুখের সঙ্গে দুঃখ, দুঃখের সঙ্গে সুখ নিরন্তর মিশাইয়া আছে । দরিদ্রের কুটীরে ও রাজার অটালিকায় খুঁজিলে এই দুইই মিলিবে । তবে অবস্থাভেদে বেশী কম মাত্র । অনেকের সংস্কার আছে, দারিদ্র্য-দুঃখ অপেক্ষা অধিকতর ক্লেশকর বিষয় আর নাই । কিন্তু তাহা ভ্রম । চিন্তাশীলতা, পরহুঃখানুভাবকতা, সহিষ্ণুতা, দয়া, মমতা, আত্মোৎসর্গ প্রভৃতি যে সকল গুণে মানব-মন ও মানব-হৃদয় স্বর্গীয় ভাব ধারণ করে, তাহা রাজার অটালিকা অপেক্ষা দরিদ্রের কুটীরেই অধিকতর বিকাশমান । যে নৃত্যগীত ও আমোদ প্রমোদ লইয়াই সতত ব্যস্ত তাহার ভাবিব্যার অবকাশ কই ? যে অভাব কাহাকে বলে, কখন অনুভব করে নাই, সে পরের দুঃখের কাতর কিক্রমে হইবে ? মনে উদ্ভিত হইবামাত্র বাহার ইচ্ছা পূরণ হইয়াছে, সহিষ্ণুতা গুণ তাহাব পরিপুষ্ট হইবে কিক্রমে ? দয়ার শাস্তিহলে বাহার হৃদয় কখন বিধৌত হয় নাই, সে দয়া প্রকাশ করিতে জানিবে কিক্রমে ? যে নিরন্তর তোষামোদকারিগণে পরিবেষ্টিত, সে অকৃত্রিম স্নেহ মমতা কখন পায় নাই, সুতরাং অকপট স্নেহ মমতা দেখাইবে কিক্রমে ?

স্বায়ত্ত্ব সুখের প্রাধান্য।

যাঁহাদিগের সুখ হৃৎক বাহু বস্তুর উপরে নির্ভর করে, তাঁহারা কখনই প্রকৃত সুখী নহেন। রাজসিংহাসনে বসিয়া ও রাজমুকুট পরিয়াও তাঁহাদিগের হৃদয় সতত কম্পমান। এই জন্যই ভারতীয় নীতি বাহু বস্তুর অনাস্থা শিক্ষা দিয়াছিল *। এই জন্যই গ্রীক-নীতি-প্রবর্তয়িতা সফ্রেটিস্ উপদেশ দিয়াছিলেন 'যে যে পরিমাণে অভাব সঙ্কোচ করিতে পারিবে, সে সেই পরিমাণে ঈশ্বরত্ব লাভ করিবে'।

প্রকৃতির উপরে জয় লাভ করাই প্রকৃত রাজত্ব। সে রাজত্ব রাজার অদৃষ্টে ঘটে না। কারণ, বাজার অভাব অনন্ত। যে মহাত্মা অভাব সঙ্কোচ করিয়া প্রকৃতির দাসত্ব হইতে উদ্ধৃত হইতে পারেন, তিনিই প্রকৃত রাজা। এ রাজত্বের গৌরব ভারতীয় আৰ্য্যোরাই বিশেষ বুঝিয়াছিলেন। এই জন্যই আৰ্য্য তাপসেরা সংসার ছাড়িয়া নিবিড় অরণ্যমধ্যে গিয়া যোগসাধনা করিতেন। তাঁহাদিগের আত্মসংবনে মুগ্ধ হইয়া অনেক নরপতিও তাঁহাদিগের চরণে লুপ্তিত-শির হইতেন।

আমরা বলিয়াছি, মানুষের সকল অবস্থাই সুখ-হৃৎক-মিশ্রিত। নিরবচ্ছিন্ন সুখ মানুষের অদৃষ্টে নাই। সেইরূপ নিরচ্ছিন্ন হৃৎকও মানুষকে কখন ভোগ করিতে হয় না। যাঁহারা অভাবের প্রসন্ন সঙ্কোচ না করিয়া বরং বাড়াইয়া থাকেন, তাঁহারা যে নিরবচ্ছিন্ন হৃৎক ভোগ করেন, একথা আমরা বলি না। অভাবের প্রসন্ন-বুদ্ধিই বর্তমান ইউরোপীয় সভ্যতার ভিত্তিভূমি। প্রাকৃতিক

* "অনাস্থা বাহুবস্তু।" কুমারসম্ভব।

অভাব-মোচনের চেষ্টাতেই শিল্প বিজ্ঞানের আবির্ভাব। বিজ্ঞানবলে মানুষ প্রকৃতির উপরে অল্প প্রকার প্রভুতা লাভ করিয়া থাকেন। বিজ্ঞান মানুষকে অনেক পরিমাণে ঐশী-শক্তি-সম্পন্ন করে। ভারতীয় আর্যেরা প্রকৃতির আধিপত্য সহিতে না পারিয়া ক্রোধে প্রকৃতিকে সম্পূর্ণ দমিত বা নিশ্চল করিয়াছিলেন; আধুনিক ইউরোপীয়েরা প্রকৃতিকে দমিত না করিয়া তাহাকে আজ্ঞাবাহীনা দাসী করিয়া রাখিয়াছেন। ভারতীয় আর্যেরা প্রকৃতিকে তাঁহাদিগের উন্নতি-পথে কোন অভাবকণ্টক রোপিত করিতে দিতেন না; আধুনিক ইউরোপীয়েরা তাহাতে আপত্তি না করিয়া প্রকৃতি দ্বারাই সেই কণ্টক উন্মোচিত করিয়া লইতেছেন। দুই অবস্থাতেই সুখ আছে বটে; কিন্তু একে সুখ নিম্নায়ত্ত—অপরে সুখ প্রকৃতি-সাপেক্ষ। যে সুখ নিজ-সাপেক্ষ, তাহাই অমূল্য ও তাহাই অধিকতর প্রার্থনীয়। সে সুখে ধনীরা সাধারণতঃ বঞ্চিত।

দরিদ্র স্বভাব-সন্ন্যাসী ।

সৌভাগ্যে মানুষের অন্তর এত শিথিলিত হয়, যে তাহা কঠোর ধর্ম-পালনে অক্ষম হইয়া পড়ে। একটু সংযম অভ্যাস হইলেই, সৌভাগ্যবান ব্যক্তির যশ দেশ বিদেশে ব্যাপ্ত হইয়া পড়ে। কিন্তু দরিদ্রের সাধনা অতি কঠোর। দরিদ্রের পদে পদে বিপদ, সুতরাং দরিদ্রের অবিচলিত সহিষ্ণুতা প্রয়োজনীয়। দরিদ্রের সকল বিষয়েই অভাব, সুতরাং অনিবার্য্য অভাবে উপেক্ষা একান্ত শিক্ষণীয়। দরিদ্র নিজের অভাব বুঝে,

সুতরাং পরের হৃৎথে তাহার হৃদয় কাঁদিয়া উঠে। দরিদ্র জগতে ভালবাসা পায় না, ভালবাসার অভাবের মর্ম্মস্থদ যাতনা সে বুঝে, এই জন্ত পরকে ভালবাসিতে শিখে। দরিদ্রকে লোকে ঘৃণা করে, ঘৃণার মর্ম্মস্থদ প্রহারে তাহার অস্থি চন্দ্র জর্জরিত : তাই তাহার হৃদয় হৃৎখী দেখিলেই কাঁদিয়া উঠে, সহানুভূতিব বেগে তাহার অশ্রু মুছাইতে যায়, নিজের অশ্রুতলে তাহার হৃদয়ের যাতনা ক্ষালিত করিতে চেষ্টা করে।

দরিদ্রে ও সন্ন্যাসীতে প্রভেদ অল্প। পর্ণকুটীর বা তরুতল উভয়েরই আবাসস্থল। কোপীন বা জীর্ণ বসন উভয়েরই পরিধান। স্বচ্ছন্দ-বনজাত শাকাদিই উভয়ের ভক্ষ্য। অনাচ্ছাদিত ভূমিতলই উভয়ের শয্যা। ধূলি বা ভস্ম উভয়ের অঙ্গাভরণ। তবে প্রভেদ এই যে, সন্ন্যাসীর এই অবস্থা স্বৈচ্ছাকৃত, দরিদ্রের অবস্থা দৈবনির্দিষ্ট। সন্ন্যাসী ভোগ্য বস্তুর অসারতা ও অনিত্যতা দেখিয়া ভোগ্যসক্তিতে ডলাঞ্জলি দিয়া অতি কঠোর দারিদ্র্যব্রত গ্রহণ করিয়া থাকেন। কিন্তু দরিদ্রের দারিদ্র্যব্রতে দীক্ষা স্বৈচ্ছাধীন নহে। দীক্ষা স্বৈচ্ছাকৃত হউক বা না হউক, ব্রতপালনের ক্ষমতা উভয়েতে একইরূপ। সন্তোষতা, সংযম, আত্মত্যাগ ও পরহঃ অনুভাবকতা প্রভৃতি যে সকল গুণে মানুষ দেবতা হয়—এই ব্রতপরিপালনে সেই সকল গুণ স্বতঃই দরিদ্রের অভ্যন্ত হয়। সুতরাং দরিদ্র সঙ্কল্প বিনাও সন্ন্যাসী, দীক্ষা ব্যতীতও যোগী। যে দরিদ্র এই স্বভাব-সন্ন্যাসের সাধনায় সিদ্ধ, অন্তরের মাহাত্ম্যে তিনি জগতের পূজনীয়।

দারিদ্র্যে ঘণা জাতীয় পতনের মূল ।

যে জাতি দরিদ্র দেখিলেই ঘণা করে, ধনী দেখিলেই তাহার নিকট নতশিব হয়, জানিবে যে সে জাতির অধঃপতন নিশ্চয় আরম্ভ হইয়াছে । একদিন যুগেন রোমের বিজয়দর্পে জগৎ কাঁপিয় ছিল, তখন রোমের ডিক্টেটরগণ * রাজমুকুট, রাজপরিচ্ছদ তুল্য করিয়া সামান্য কৃষিকার্য্য দ্বারা জীবিকা নির্বাহ করিতেন যত দিন রোম সংযমী ছিল, যত দিন . রোম নিজের দারিদ্র্যে কুণ্ঠিত হইত না, প্রত্যত গরিমা প্রকাশ করিত, তত দিন রোমের বীরত্বে, রোমের মাহাত্ম্যে জগৎ ঝলসিত হইত ! কিন্তু যে অবধি বোন পনের স্বর্ণের মণ্ডিত হইলেন, দারিদ্র্যে লজ্জা বোধ করিলেন, সেই অবধি রোমের বীরত্ব, বোনের মহাত্ম্য বিলুপ্ত হইল । অননি রোম দাসত্বশৃঙ্খলে আবদ্ধ হইলেন ।

আবার বিশৃঙ্খলিত পুরুষ-পরম্পরার দাসত্বে যখন ইতালী জর্জরিত হইল, তখন তাহার ভ্রম বৃত্তিতে পারিয়া গ্যারিবল্ডী, ম্যাটুসিনি-প্রমুখ শ্লাঘিপ্রবরগণ দারিদ্র্য-ব্রত গ্রহণ করিলেন । নিজ নিজ বাসনায় জলাঞ্জলি দিয়া তাঁহারা স্বদেশ উদ্ধার-বতে জীবন উৎসর্গ করিলেন । ছদ্মবেশে, গুপ্তবেশে, অনাহারে, দেশে দেশে ভ্রমণ করিয়া এই সন্ন্যাসীবল জাতীয় উদ্ধারের উপকরণ সামগ্রী সকল সংগ্রহ করিতে লাগিলেন । জননীর

* সাধারণতঃ রোমের জো যখন কোন বিশেষ সম্মুখীন হইত, তখন রোমেরা রোমের জো সমস্ত রাজশক্তি একজন যোগ্য ব্যক্তি হস্তে কিছু দিনের জন্য অর্পণ করিত । এই ব্যক্তি ডিক্টেটর নামে অভিহিত হইতেন । ইহার ক্ষমতা কোনপ্রকার বিবিধবদ্ধ দ্বারা সংযমিত হইত না ।

অশ্রুচল, প্রিয়তমার কাতরবচন, শিশুসন্তানের ক্রন্দনও ইহা-
দিগের হির-মকর চিত্তকে জাতীয় ব্রত হইতে বিচলিত করিতে
পারিল না । যাহারা দুঃখকেননিত শয্যায় শয়ন করিয়া, স্বর্ণে
বণ্ডিত হইয়া, বিলাসিতার ক্রোড়ে লালিত হইয়া, স্বদেশের দুঃখ
ভাবিবার অবসর পান নাই ; এবং যাহারা, যে সকল সম্মাসী
স্বদেশের উদ্ধারব্রতে জীবন উৎসর্গ করিয়াছিলেন, তাঁহাদিগকে
'কপদক-সম্বলী'—'উন্মাদগ্রস্ত' বলিয়া পরিহাস করিতেন,
ইতালীর উদ্ধার তাঁহাদিগ দ্বারা সংসাধিত হয় নাই । যাহারা
বেতনের লোভে বিদেশীয় গবর্ণমেন্টের নিকটে আত্মবিক্রীত
হইয়াছিলেন, যাহারা প্রভু'ক সন্তুষ্ট করিবার নিমিত্ত স্বদেশের
প্রতি বিশ্বাসঘাতকতা করিতেও কুণ্ঠিত হন নাই, এবং যাহারা
ছদ্মবেশী আশ্রিত বৈপ্লবিক স্বজাতীয় ভ্রাতৃবৃন্দের ক্রোধের প্রভুর
চরণ বিধৌত করিতেও লজ্জা বোধ করেন নাই, সেই জাতি-
কলঙ্ক দাসত্বকামী কুলঙ্গারগণ দ্বারা ইতালীর অনিষ্ট বই
আর ইষ্ট হয় নাট । তাঁহাদিগ দ্বারা বরং ইতালীর সৌভাগ্যের
দিন—স্বাধীনতার দিন দূরবিপ্রকৃষ্ট হইয়াছিল মাত্র । কিন্তু
ন্যাটসিনি প্রভৃতি যে চীরধর কপদকসম্বলী মনীষিগণ
স্বজাতির উদ্ধারব্রতে জীবন উৎসর্গ করিয়াছিলেন, তাঁহাদিগের
অর্ধ শতাব্দীর নিরন্তর যত্নে—অজস্র রক্তমোক্ষণে—ইতালীর
অসামান্য স্বাধীনতা, বৈপ্লবিকগণের স্বপ্নরাজ্য হইতে প্রকৃত
ঘটনায় পরিণত হইয়াছে ।

মহর্ষি গ্যারিবল্ডি ইতালীর বৈপ্লবিক সেনার অধিনায়ক
হইয়া অষ্ট্রিয়গণকে ইতালী-ক্ষেত্র হইতে বিদূরিত করিলেন,
কিন্তু স্বহস্তে রাজ্যভার না লইয়া রাজর্ষি ভিক্টর ইমানুয়েলের

ভারতে দারিদ্র্য-ব্রত গ্রহণের আবশ্যকতা । ৭

হস্তে রাজ্য সমর্পণ পূর্বক আপনি নিজ আবাসে গিয়া* আবার স্বহস্তে হলচালন আরম্ভ করিলেন। ইচ্ছা হইলে, যিনি স্বয়ং সম্রাট্ হইতেও পারিতেন, তিনি জাতীয় পেন্সন পর্য্যন্ত প্রত্যাখ্যান করিলেন। এই মহর্ষিপ্রবর এখন ক্যাপ্তেরা দ্বীপের কুটীরাবাসে স্বহস্তকৃষ্ট কৃষি দ্বারা জীবিকা নির্বাহ করিতেছেন।† বোধ হয়, যেন বিধাতা ইতালীর রক্ষার জন্য তাঁহাকে প্রহরী নিযুক্ত করিয়াছেন। তিনি সেই দ্বীপস্থ কুটীরাবাসে থাকিয়াও ইতালীর চিন্তায় নিরন্তর নিমগ্ন! একদিন ইতালীর সৌভাগ্য-সূর্যের মধ্যোদয় কালে—ইতালীর ডিক্টেটরগণও এইরূপ মাহাত্ম্য ও আশ্চর্য্যাগ দেখাইয়াছিলেন। দারিদ্র্যব্রত উদ্দাপনেই ইতালী তিন বার জগতে রাজত্ব করিলেন।

ভারতে দারিদ্র্য-ব্রত গ্রহণের আবশ্যকতা ।

যদি কোন দেশে এখন দারিদ্র্যব্রত গ্রহণের প্রয়োজন হইয়া থাকে, তাহা এই ভারতে। ভারতের সৌভাগ্য-দিনে আধ্য-

* কতাবীর অভ্যর্থনা সার্ভিনিয়া প্রদেশের অধিবর প্রিন্স এলবার্টের পুত্র ভিক্টর ইমানুয়েল্ স্বহস্তে স্বদেশান্তরাগী ছিলেন, এবং অধীন রাজবৃন্দের মধ্যে সর্বপ্রথমে বৈশ্বনিক সম্মানস্বরূপে অন্তর্গত হইয়াছিলেন বলিয়াই—গ্যারিবল্ডী তাঁহাকে সম্রাট স্বাধীন ইতালীর রাজপদে বরণ করেন। এক্ষণে তাঁহার পুত্র ইতালীর সিংহাসনে অধিষ্ঠিত রহিয়াছেন। ইনিই বিহুটিকা বোগের প্রত্যাগমনকালে রোগাক্রান্ত প্রজাব কুটীরে কুটীরে পরিভ্রমণ করিয়া পিতার ব্যায় প্রজাবৎসল রাজা বলিয়া অভিহিত হইয়াছেন।

† এ প্রস্তাবের এ অংশটুকু অনেক দিন পূর্বে লেখা হয়। তখন গ্যারিবল্ডী জীবিত ছিলেন।

ঋষি সন্ন্যাসিগণের প্রোজ্জ্বল চরিত্র-গৌরবে ভারত উদ্ভাসিত হইয়াছিল ; তাহাদিগের আত্মত্যাগের মোহিনী শক্তি-বলে ভারতীয় রাজবৃন্দ ও আত্মস্বার্থ জাতীয় স্বার্থে বলি দিতে শিখিতেন । বলা বাহুল্য যে, তখনকার ব্রাহ্মণেরা অনেকেই এই সন্ন্যাসব্রত গ্রহণ করিতেন । কৃষকদিগের ধান কাটিয়া লইয়া যাইবার সময়ে যে সকল পক্ষ ধান্য স্তম্ভ হইতে ভুতলে খসিয়া পড়িত, তাহারা খুঁটিয়া খুঁটিয়া সেই সকল ধান্য আহরণ করিতেন । গৃহপালিত হরিণদিগকে খাওয়াইয়া সেই ধান্যের যাহা অবশিষ্ট থাকিত, তাহাই সিক্ত করিয়া তাহারা উদর পূরণ করিতেন । ইহারই নাম উজ্জ্বলিত্ব । সচ্ছন্দ-বনজাত ফলমূল ও শাকাদিই তাহাদিগের খাদ্যের প্রধান উপকরণ-সামগ্রী ছিল । তাহাদিগের প্রেম সর্বত্রই পরিব্যাপ্ত ছিল । সিংহ, ব্যাঘ্র, ভল্লুকাদি হিংস্র জন্তুরাও সেই প্রেমে মত্তনুগ হইয়া থাকিত । তাহাদিগের নিঃস্বার্থ বিশ্বপ্রেমের মোহিনী শক্তিবলে তাহারা আপন আপন হিংস্র প্রকৃত ভূমিয়া যাইত । ঋষিগণের আশ্রমে ব্যাঘ্র হরিণে, ও ভেক সপে একত্র জলপান করিত । এ গল্প নয়, কালকল্পনা নয়, প্রকৃত ইতিহাস । চরিত্রগৌরবে ও আত্মত্যাগের মোহিনী শক্তিবলে এগত করতলস্থ করা যাইতে পারে । যে যোগী এ সাধনায় সিদ্ধ, তাহার অসাম্য কিছুই নাই । ঋষিগণ এই সাধনায় সিদ্ধ ছিলেন বলিয়াই, প্রবল-পরাক্রান্ত নরপতিগণও তাহাদিগের আদেশ শিরোধার্য করিতেন ।

ঋষিশূদ্রের আশ্রন হইতে ঋষিপ্রবর বশিষ্ঠদেব মহারাজ রাম-চন্দ্রকে বলিয়া পাঠাইলেন, “মহারাজ আপনি নূতন সিংহা-

সনে আসীন হইয়াছেন। আপনাকে একটি উপদেশ দিই। সেই উপদেশের অনুবর্তন করিলেই আপনি আদর্শ রাজা হইতে পারিবেন। আপনি কদাচ প্রজাদিগের মতের বিকৃত আচরণ করিবেন না।” ‘মহর্ষির এই গভীর উপদেশ রাম ভক্তিভাবে শিরোধার্য করিলেন, এবং এই বলিয়া প্রতিজ্ঞা করিলেন যে, মহর্ষির এই উপদেশ-পালনে যদি আনাকে প্রাণ-পেক্ষা প্রিয়তরা সীতাকেও পরিত্যাগ করিতে হয়, আমি তাহাতেও পরাজুপ হইব না’। অনতিবিলম্বেই দ্রুম্যুপ আসিরা সংবাদ দিল—‘লোকে রাবণগৃহে বসতির জন্য সীতাদেবীর চরিত্রসম্বন্ধে সন্দিহান; লঙ্কায় অগ্নিপরীক্ষা তাহারা বিশ্বাস করে না।’ এই সংবাদ শুনিয়া রামচন্দ্র প্রথমে বিদ্ভাৎ-স্পষ্টের ন্যায় হতচেতন হইয়া পড়িলেন। অচিরকাল মধ্যে সেই রাজ-সন্ন্যাসীর স্মৃদু চিত্ত প্রাকৃতিক বল ধারণ করিল। তিনি এই মাত্র ঋষি-বাক্যের উত্তরে প্রতিজ্ঞা কবিয়াছেন, প্রজাগণেব মনস্তৃষ্টি বিধানানলে প্রাণাপেক্ষা প্রিয়তরা সীতাকেও আহুতি দিবেন। সে প্রতিজ্ঞা ও সে ঋষিবাক্য কখনই লঙ্ঘন করা হইবে না। ইহাতে হৃৎপিণ্ড দেহ হইতে উৎপাটিত হয় হউক, রামের প্রাণ বিষ্টিয়াগ হয় হউক—তাহাতেও রাম বিচলিত হইবার নহেন। কর্তব্য স্থির হইল। অমনি রাম লঙ্কণকে ডাকিয়া আদেশ দিলেন, ‘পূর্ণগর্ভা সীতাদেবীকে গঙ্গাতীরে পরিত্যাগ করিয়া আইস।’ মনীষীর সে স্মৃদু ভীষ আদেশ লঙ্ঘন করিতে লঙ্কণেরও সাহস হইল না। সেই ভীষণ ও লোমহর্ষণ আদেশ শুংকণাৎ অন্তর্ভূত হইল। ঋষির উপদেশ প্রতিপালিত হইল। উপদেশক ও উপদিষ্টের মহিমা জগতে উদঘোষিত

হইল। একরূপ উপদেশ ও একরূপ প্রজাস্বার্থে রাজস্বার্থের বলির উদাহরণ আর কোথায় ?

ভারতের প্রত্যেকেই যদি এখন আত্মস্বার্থ পরস্বার্থে বলি দিতে শিখেন, তাহা হইলে ভারতের এ দুর্দশা কয় দিন থাকিতে পারে ? যাহারা জাতীয় কার্যে ধনোৎসর্গ করিয়া দারিদ্র্যব্রত গ্রহণ করিতে পারিবেন, তাঁহারাই ভারতের একমাত্র আশা-স্থল হইবেন। উপদেশের সময় অতীত হইয়াছে। এক্ষণে জলন্ত দৃষ্টান্তের কাল আসিয়াছে।

বিশ্বামিত্র ।*

দারিদ্র্যব্রত বা সন্ন্যাসের মহিমা বৃদ্ধিতে পারিয়াছিলেন বলিয়াই প্রবল-পরাক্রান্ত নরপতি বিশ্বামিত্র রাজসিংহাসন ও

* গাণ্ধীজী রাজা বিশ্বামিত্র যুগল উপলক্ষে বলিষ্টের আশ্রমে আসিয়া আতিথ্য গ্রহণ করেন। বলিষ্টের আদেশে কামধেনু স্মৃতি-নন্দিনী নন্দিনী সৈন্য রাজাকে চর্ক্যা, চোষা, লেহা, পের রক্ত ঘন বস্ত্র মাণ্ডা কুমুম চন্দন, বিচিত্র পাণকাদি দ্বারা সেবা করে নন্দিনীর অলৌকিক ক্ষমতা দেখিয়া তিনি বলিষ্টের বিকট সেই কামধেনু যাচঞা করেন। বলিষ্ট অধীকৃত হওয়ার বিশ্বামিত্র বলপূর্বক নন্দিনীকে লইয়া যাঁতে চাহেন। কিন্তু বলিষ্টের ব্রহ্মতেজোবলে নন্দিনীর মুখ হইতে অসংখ্য সৈন্য উৎপন্ন হইয়া বিশ্বামিত্রের সৈন্যকে পরাস্ত করে ব্রহ্মতেজের এই মহিমা দেখিয়া বিশ্বামিত্র রাজ-ঐর্ষ্যা পরিত্যাগ করিয়া তপোবলে ব্রহ্মতেজ লাভে কৃতসঙ্কল্প হন। বৈরাগ্যই ব্রহ্মতেজ লাভের একমাত্র উপায় জানিয়া তিনি রাজসিংহাসন পরিত্যাগ করিয়া বনে গমন করেন ও অবশেষে কঠোর তপস্যায় ব্রহ্মবিদ্য লাভ করেন।

রাজকীয় ঐশ্বর্য্য পরিত্যাগ পূর্ব্বক সন্ন্যাস অবলম্বন করিয়াছিলেন । তিনি দেখিলেন যে, যিনি উপদেষ্টা হইতে চান, যিনি মানবজাতির পরিচালক হইতে চান, তাঁহাকে সর্ব্বাঙ্গে নিজস্বার্থ পরস্বার্থে বলি দিতে হইবে, নিজের ঐশ্বর্য্য পরহিতে ব্যয়িত করিয়া সন্ন্যাসী হইতে হইবে । তাই তিনি নিজের রাজ্য ও রাজসিংহাসন জ্ঞাতি-হস্তে সমর্পণ করিয়া আপনি ঋষিত্ব গ্রহণ করিয়াছিলেন । ঘোরতর তপস্যায় তিনি জগৎ কাঁপাইয়াছিলেন । তপোবলে তিনি নূতন জগৎ সৃষ্টি করিয়াছিলেন । রাজা বিশ্বামিত্রকে কে চিনিত ? কিম্ব রাজর্ষি বিশ্বামিত্র জগতে বিদিত, জগতে পূজিত । ভ্যাগ-মাহাত্ম্যে বিশ্বামিত্র অপূর্ব্ব জগৎ সৃষ্টি করিয়াছিলেন । তপোবলে তিনি যে শক্তি লাভ করিয়াছিলেন, রাজশক্তি তাহার নিকট অতি তুচ্ছ ।

শাক্যসিংহ * ।

দারিদ্র্যব্রত বা সন্ন্যাসের মহিমা বুঝিয়াছিলেন বলিয়াই মহর্ষি শাক্যসিংহ রাজসিংহাসন পরিত্যাগ করিয়া ভিক্ষারী ব বেশ ধারণ করিয়াছিলেন । লক্ষ্মীরূপিণী প্রেমময়ী ভার্য্যা ও শশাঙ্কপ্রতিম পুত্রের দিকে না তাকাইয়া জগতের দুঃখ মোচনার্থ তিনি গৃহীতব্রত হইয়াছিলেন । তিনি দেখিলেন, সুখভোগ ক্রুরিতে হইলে, তাহার অনুরূপ দুঃখ ভোগ করিতে হইবে ।

* বুদ্ধ আনুমানিক ৫৫০ খ্রীষ্ট পূর্ব্বাব্দের বসন্ত পূর্ণিমার দিন কপিলবস্তনগরে (নগরখাস) মহারাজ শুদ্ধোদনের ঔরসে মহামায়ার গর্ভে জন্মগ্রহণ করেন । দেবী মহামায়ার ভ্রাতা দণ্ডপানির কন্যা অলৌকিকরূপলাবণ্যবতী গোপার সহিত তাঁহার বিবাহ হয় । ৭০ বৎসর বয়সে তাঁহার মৃত্যু হয় ।

হুঃখ বাদ দিয়া নিরবচ্ছিন্ন সুখভোগ করা কাহারই ভাগ্যে ঘটে নাই, এবং প্রকৃতির শৃঙ্খলানুসারে কখন কাহারও ভাগ্যে ঘটিতেও পুষ্টারে না। জন্মের সঙ্গে মৃত্যু, উদয়ের সঙ্গে অস্ত, ভোগের সঙ্গে পীড়া, প্রণয়ের সঙ্গে বিচ্ছেদ, মৎস্যের সঙ্গে কণ্টকের ন্যায় সুখের সঙ্গে হুঃখ দুঃস্বরূপে মিশাইয়া আছে। এইজন্য সেই ঘোর যোগী সঙ্কল্প করিলেন সুখ ও হুঃখ উভয়েরই হস্ত হইতে মুক্তিলাভ করিতে হইবে। তাঁহার কঠোর সাধনায় মানবজাতি দুঃস্বরূপ প্রাকৃতিক হুঃখ সকল হইতে মুক্তিলাভ করিল না বটে, কিন্তু কতকগুলি পরিহার্য্য আত্মকৃত হুঃখের হস্ত হইতে পরিত্রাণ পাইল। মৃত্যু জগৎ হইতে নিরাকৃত হইল না বটে, কিন্তু আত্মসংযম বলে বিদূরে বিক্ষিপ্ত হইল। জগৎ হইতে অকালমৃত্যু উঠিয়া গেল। বৌদ্ধজগতে সকলেই ভাই ভাই সূতরাং বিষাক্ত শ্রেণী-বিভাগ-জনিত হুঃখ জগৎ হইতে উঠিয়া গেল। কেহ কাহাকে ঘৃণা করে না, কেহ কাহাবও বিদ্বেষী নয়, সূতরাং বৌদ্ধজগৎ হইতে বিবাদ বিসম্বাদ বিগ্ৰহাদি উঠিয়া, বাইতে লাগিল। শাক্যসিংহের বিশাল হৃদয়ক্ষেত্রের পবিত্র ছবি সমস্ত বৌদ্ধজগতে প্রতিবিম্বিত হইল। তাঁহার চরিত্রের উজ্জল দৃষ্টান্তে সহস্র সহস্র আশ্রমী সংসার ছাড়িয়া আত্মসুখ পরসুখে বলি দিয়া বৌদ্ধধর্মের প্রচারকপদে ব্রতী হইলেন। তাঁহাদিগের পবিত্র চরিত্রের দৃষ্টান্তে ও জলন্ত ধর্ম-প্রচারে পৃথিবীর এক তৃতীয়াংশ বৌদ্ধধর্মে দীক্ষিত হইল। সেই কপর্দক-শূন্য সন্ন্যাসীর দল জগতের মৃত দেহে নবজীবন সঞ্চারিত করিলেন। সে দারিদ্র্য ও সন্ন্যাসে জগৎ মুগ্ধ হইল। এক্ষণে বৌদ্ধপ্রচারগণে সে দারিদ্র্যব্রত ও সন্ন্যাসের অভাব হই-

তেছে, সেই সঙ্গে সঙ্গে তাঁহাদিগের প্রভাবও কমিতে আরম্ভ হইয়াছে ।

যিশু খ্রীষ্ট * ।

আবার চল, খ্রীষ্ট-ভূমিতে যাই । এস, দেখিগে কি মোহ-মন্ড্রে সেই যোগিবর ইউরোপ-ভূমি ভুলাইয়া রাখিয়াছেন । যখন রোম-সাম্রাজ্য তদাপরিজ্ঞাত জগৎকে বৈষম্য-দুষ্ট করিয়া-ছিলেন ; যখন রাজা প্রজার, ধনী দরিদ্রে, সম্ভ্রান্তে অসম্ভ্রান্তে, ধার্মিকে অধার্মিকে, ঘোরতর বিদ্রোহানল প্রজ্জ্বলিত হইয়াছিল, সেই তনসাক্ষর গগনে সহসা দৈববাণী উঠিল, ‘তোমরা সবে ভাই ভাই’ । জগৎ হইতে প্রতিধ্বনি উঠিল ‘তোমরা সবে ভাই ভাই,’ ঋষিপ্রবর ঈশা গাইলেন, ‘অমরা সবে ভাই ভাই ।’ সে মধুর সঙ্গীতে জগৎ মুগ্ধ হইল । ছয় শত বৎসর পূর্বে প্রাচ্যে শাক্যসিংহ গাইয়াছিলেন, ‘আমরা সবে ভাই ভাই’— আজ ঈশা প্রতীচ্যে গাইলেন, ‘আমরা সবে ভাই ভাই’ । সেই মধুর সঙ্গীতে রাজার মস্তক হইতে মুকুট খসিয়া পড়িল, দাসের পাদ হইতে শৃঙ্খল খুলিয়া গেল । সেই যোগিবর নিজ-স্বার্থ পরস্বার্থে বাঁল দিয়া সেই প্রকাণ্ড সত্যের প্রচারে বহির্গত হইলেন । জগৎ মুগ্ধ হইয়া তাঁহার মুখে শুনিল, ‘আমরা সব এক পিতার সন্তান, আমরা সব এক পিতার সন্তান, আমরা

* জুডিয়া দেশের অন্তর্গত জেরুশালেমের সম্মিহিত বেথলেহাম নগরে মহাত্মা যিশুখ্রীষ্ট জন্মগ্রহণ করেন । দাউদের পুত্র হুবেকী জোসেফ তাঁহার জনক ও পতিপরিগ্রহণ শুদ্ধাচারিণী মেরী তাঁহার জননী । ইহাব জন্ম প্রচলিত খ্রীষ্টাব্দের পাঁচ বৎসর পূর্বে হয় বলিয়া স্থিরীকৃত হইয়াছে ।

সবে ভাই বোন' । তিনি বলিলেন, 'যদি নিজ সম্পত্তি দীন-
হুঃখীকে দান করিয়া নিজে সম্মানী হইতে পার, যদি কাল কি
থুইব, এ ভাবনায় আকুল না হও, তবে আমার সঙ্গে আইস' ।
এইরূপে তিনি পূর্ণ আত্মত্যাগ ধর্ম প্রচারকের প্রধান লক্ষণ
বলিয়া নির্দেশ করিলেন । খ্রীষ্টধর্মের আদিম প্রচারকগণে
এই পূর্ণ আত্মত্যাগ ছিল বলিয়াই, খ্রীষ্টধর্ম অসংখ্য বাধা
বিপত্তি উল্লঙ্ঘন করিয়া জগতে সাম্যের বিজয়ছন্দুতি উদ্দোষিত
করিতে পারিয়াছিল । সেই আত্মত্যাগের বলে আজও
খ্রীষ্টধর্ম বৈজ্ঞানিক ইউরোপকেও মস্তমুগ্ধ করিয়া রাখিয়াছে ।
সেই আত্মত্যাগের দৃষ্টান্তে আজও ইউরোপে কত কত অতি-
মানুষ কার্যের অমূল্য হইতেছে ! কত কত ভাই ভগিনী
আত্মত্যাগ পরত্যাগে আহতি দিয়া কখন রণক্ষেত্রে আহত
সৈনিকের পাশে শুশ্রূষায় নিযুক্ত হইতেছেন, কখন খ্রীষ্টধর্মের
অমূল্য সত্য প্রচারের জন্য সাহারার অনন্ত বালুকাময়
ক্ষেত্রে অনাহারে প্রাণ হারাইতেছেন । ভারত এই খ্রীষ্ট
প্রচারকগণের নিকটে অনেক বিষয়ে ধর্মী । ভারতবাসি-
গণ স্বচক্ষে দেখিয়াছেন, এই প্রচারকগণ জন্মভূমি ও জী-
পুত্রাদি পরিত্যাগ করিয়া এই ভারতক্ষেত্রে পরহিতব্রতে সমস্ত
জীবন আহতি দিয়াছেন । প্রত্যাখ্যাত ও পদে পদে অপ-
মানিত হইয়াও এই সন্ন্যাসি-দল ভারতের হিত-চিন্তায় নিরন্তর
নিযুক্ত । যখন ভারতগগন অজ্ঞানতিমিরে আচ্ছন্ন ছিল, তখন
ইহারাই সর্বপ্রথমে ভারতে পাশ্চাত্য জ্ঞানজ্যোতি বিকীরিত
করেন । শ্রীরামপুরের খ্রীষ্ট মিসরিগণই বর্তমান বঙ্গভাষায়
প্রথমে সংবাদপত্র প্রচার করেন । জ্ঞানশিক্ষা-বিষয়ে ইহারাই

সর্বপ্রথমে হস্তক্ষেপ করেন। ক্রমে গবর্ণমেন্ট তাঁহাদিগের পথের অনুসরণ করিয়াছেন। এই সকল নিয়মনি গ্রীষ্টের আত্মত্যাগের, গ্রীষ্টের সম্মান্যের কণামাত্র পাইয়াও ভারতের কত মঙ্গলসাধন করিয়াছেন। যদি ইহারা গ্রীষ্ট ধর্মের আদি গুরু ও আদি-প্রচারকগণের জায় পূর্ণ নোগী হইতে পারিতেন, যদি ইহারা আত্মস্বার্থে পূর্ণ আত্মত্যাগ দিতে পারিতেন, তাহা হইলে সম্ভবতঃ আজ ভারতীয় ইতিহাস অন্য আকার ধারণ করিত। ভারতে আজ গ্রীষ্টধর্ম একচ্ছত্রী হইত। ভারত-বাসিগণ আজ এক ধর্মস্থলে ইউরোপের সজিত গ্রন্থিত হইতেন। ভারতের অভ্যুত্থানের প্রদান অন্তর্য ভারতীয় জাতি নিচয়ের পরস্পর বিদ্বেষ উঠিয়া গিয়া ভারত এতদিনে একট প্রকাণ্ড ও অনন্তশক্তিসম্পন্ন রাজনৈতিক জাতিরূপে পরিণত হইত। তাহা হইলে আজ আমাদিগকে ভারতের জাতি-সমন্বয় ও ধর্মসমন্বয়রূপ হৃর্ভেদ্য সমস্যার মীমাংসায় পণিত হইতে হইত না।

গুরুগোবিন্দ ।

ভারতের এই হৃর্ভেদ্য সমস্যার প্রকৃত মীমাংসা আত্মনিক সময়ে আর এক যোগী করিতে চেষ্টা করিয়াছিলেন এবং আত্মত্যাগ-বলে অনেক পরিমাণে কৃতকাণ্ড হইয়াছিলেন। ঐ যে শিখজাতি দেখিতেছ—রণে অজয়, দৃঢ়তায় অবিচলিত, ভ্রাতৃত্বপ্রেমে বিগলিত, কৃতজ্ঞতায় বিন্দুপ্রাণ—ঐ ভারত-গৌরব, ভারত-প্রাণ শিখজাতি সেই যোগিবরের আত্মত্যাগের

ও স্বদেশান্তরগতের জীবন্ত কীর্তিস্তম্ভ। চিনেলওয়ালা সমরক্ষেত্রে যে শিখজাতির অমিত তেজে ইংরাজবীর্যাবহি নিম্পূর্ণ হইয়া গিয়াছিল, সিপাহি-বিদ্রোহে যে শিখজাতির অপ্রমেয় বীরত্ব বলে ইংরাজজাতি কথঞ্চিৎ প্রাণ রক্ষা করিয়াছিলেন, আফগান-যুদ্ধে যে শিখজাতির অদ্ভুত রণনৈপুণ্যে ব্রিটনজাতির মানরক্ষা হইয়াছিল, আর সেদিন যে শিখসেনার অতুল বিক্রমে মিশর-রণক্ষেত্রে ইংরাজ-কীর্তিস্তম্ভ নিখাত হইয়াছিল, সেই প্রকাণ্ড অজেয় শিখসেনা, শিখগুরু গুরুগোবিন্দের গভীর সাধনার ফল। যখন যবন-অত্যাচারে ভারতবর্ষ ক্ষতবিক্ষত হইতেছিল, সেই সময়ে গুরুগোবিন্দের প্রাণ কাঁদিয়া উঠিল। তিনি দেখিলেন এই হিন্দু-যবন-বিদ্বেষ প্রদমিত না হইলে, যবন জাতি হিন্দু জাতির কুক্ষিগত না হইলে, উভয় জাতির ধ্বংস অনিবার্য। সে চিন্তা তাহার হৃদয়কে আলোড়িত করিল। সেই ক্ষণেই সমাধিবলে দেখিলেন, এই অবশ্যসম্ভাবী অনিষ্ট নিবারণের একমাত্র উপায় উভয় জাতির মধ্যে অভেদ্য ভ্রাতৃত্ব-বন্ধন সংস্থাপন, অথবা একের অভ্যন্তরে অপরের বিলয়। এই সিদ্ধান্তে উপনীত হইয়া তিনি শিকড়কে এক নূতন আকার দিলেন। নানকের শিখধর্ম একেশ্বরবাদ ও পরকাল লইয়াই খর্ষকত, ইহলোকের সহিত ভাবাব বড় সংশ্রব ছিল না। কিন্তু গুরুগোবিন্দ তাহার শিখধর্মকে ঐহিক ইষ্টনাশনেই অধিকতর নিয়োজিত করিলেন। তিনি ঘোষণা করিলেন যে, এ ধর্ম্মে হিন্দু যবন, ব্রাহ্মণ শূদ্র ভেদ নাই। এ ধর্ম্মে দীক্ষিত হইবামাত্র সকলেই ভাই ভাই হইবে, সকলেই এক পরিবার হইবে। গুরুগোবিন্দ অয়ং এই নব-প্রতিষ্ঠিত ধর্ম্মে সর্ব্বাঙ্গে দীক্ষিত হইলেন। দলে দলে হিন্দু

যবন তাঁহার মন্ত্রশিষ্য হইতে লাগিল। তিনি দীক্ষিতগণকে আলিঙ্গন করিয়া ভ্রাতৃ-প্রেমে গ্রহণ করিতে লাগিলেন। নব-দীক্ষিতের অন্ন সকলকেই গ্রহণ করিতে হইত। তাহাতে পাছে কাহারও কোন প্রকার অশ্রদ্ধা হয়, এই জন্য তিনি দীক্ষা-দিনে প্রত্যেক নবদীক্ষিতকে অন্ন ব্যঞ্জন রান্ধিয়া তাঁহাকে দিতে বলিতেন। শিষ্য ভক্তিভাবে গুরুকে অন্ন ব্যঞ্জন রান্ধিয়া দিত। গুরু তাহা শ্রদ্ধা পূর্ব্বক ভোজন করিতেন। স্মরণ্যঃ তাহার অন্নজলগ্রহণে আর কাহারও কোন আপত্তি থাকিত না। শিখজাতির উন্নতি, শিখজাতির সুখ ভিন্ন গুরুগোবিন্দের আর কোন চিন্তা ছিল না। তিনি স্বয়ং নিকাম যোগী ছিলেন। নিজের সুখ, নিজের সম্পত্তি, নিজের সৌভাগ্য কখন তাঁহার চিন্তাকে আবদ্ধ করিয়া রাখিতে পারিত না। তিনি শিখজাতির হিতানলে আত্মহিতের পূর্ণ আত্মত্যাগ দিয়াছিলেন। এই জন্যই শিখজাতি তাঁহার নামে আজও মন্ত্রমুগ্ধ। এই জন্যই তাঁহার শিষ্যেরা কোন বিষয়ে তাঁহার অভিপ্রায় কি, জানিতে পারিলেই তৎসাধনে প্রাণ বিসর্জন করিতেও কৃতনঙ্কর হইত। রণস্থলে গুরুগোবিন্দের নামোচ্চারণে তাহাদিগের ধমনীতে সহস্রগুণ বলোপুচয় হইত। গুরুগোবিন্দের অপূর্ব আত্মত্যাগ ও অপূর্ব ভ্রাতৃ-প্রেমে মুগ্ধ হইয়া অসংখ্য হিন্দু যবন চিরবিধেয় ভুলিয়া এক ভ্রাতৃত্ববন্ধনে আবদ্ধ হইতে লাগিল। যে হিন্দু যবন পরস্পরকে দেখিলেই পরস্পর খড়্গহস্ত হইত, আজ তাহারা স্পর্শমণির স্পর্শে ভ্রাতৃ-প্রেমে গদ গদ হইয়া পরস্পরকে আলিঙ্গন করিতে লাগিল; আজ তাহাদিগের প্রেম-পূর্ণ ভাই ভাই গানে জগৎ মুগ্ধ! আজ সেই সমবেত সেনার

বিজয়দর্পে দিল্লীর সিংহাসন টলটলারমান । আজ এই সমবেত
 নারায়ণী সেনার নিকটে যবনসেনা প্রতিপদে পরাজিত । ভারতে
 যবনসাম্রাজ্য যায় যার, এমন সময় এক ঘাতকহস্তে সেই পরম
 যোগীর মৃত্যু হইল । গুরুগোবিন্দের সমস্ত সঙ্কল্প ব্যথা হইল ।
 ভারতে এতদিনে হিন্দু যবন মিশিয়া একটা অরিদুর্দম বিশাল
 জাতির উৎপত্তি হইত । ভারতের অন্তরে এত দুঃখ ছিল বলি-
 যাই, অসময়ে গুরুগোবিন্দের মৃত্যু হইল । গুরুগোবিন্দ !
 আর একবার ভারতে আসিয়া তোমার অনন্ত প্রেমশ্রোতে
 ব্রাহ্মণ শূদ্র ও হিন্দু যবন ভেদ ভাসাইয়া দেও । প্রত্যেক ভারত-
 বাসীর শিরায় শিরায় তোমার প্রগাঢ় ভ্রাতৃপ্রেম সঞ্চারিত কর ।
 দেব ! আর একবার স্বর্গ ছাড়িয়া ভূতলে অবতীর্ণ হইয়া
 সোণার ভারতকে নরক হইতে স্বর্গে লইয়া যাও ; আর একবার
 তোমার আত্মত্যাগের উজ্জ্বল দৃষ্টান্তে মরণোন্মুখ ভারতকে
 সঞ্জীবিত কর । বীর সন্ন্যাসীর মূর্তিতে আর একবার ধরায়
 অবতীর্ণ হইয়া বীরত্ব ও সন্ন্যাস ধর্মের মহাত্মা ও সান্ন্যাস্য প্রচার
 কর । সব যায়, রসাতলে যায়, একবার দেখা দাও । তোমার অতি-
 মানুষ্য শব্দসাধনার ফল-স্বরূপ সেই নারায়ণী সেনা এখনও
 বিদ্যমান রহিয়াছে, কিন্তু তাহাতে তুমি যে ভ্রাতৃপ্রেম ও
 স্বদেশানুরাগের ভাব সংক্রামিত করিয়াছিলে, তোমার সঙ্গে
 সঙ্গে তাহা চলিয়া গিয়াছে । তাহাদিগতে যে বীরত্ব সংক্রা-
 মিত করিয়া গিয়াছে, সে বীরত্ব এখনও অটুট রহিয়াছে, কিন্তু
 সে সন্ন্যাস ও সে আত্মত্যাগ তোমার বিরোধানে বিলুপ্ত হই-
 য়াছে ! তাই আজ তাহারা দাস ; এবং সেই দাসত্ব নিবদনই
 তাহারা আজ সমস্ত ভারতবাসীর আশ্রমের পাত্র । যে হৃদয় এক

দিন ভাড়াপ্রেমের স্বর্গীয় ভাব ধারণ করিয়াছিল, সে হৃদয় আজি ভাড়াধারে কলঙ্ককালিমা ধারণ করিয়াছে। যে দিগ্বিজয়িনী সেনা এক দিন স্বদেশহিতব্রতে জীবন আহতি দিয়াছিল, আজ কিঞ্চিৎ অর্থলোভে স্বদেশের উচ্ছেদ সাধনেও সে সেনার আপত্তি নাই। আত্মত্যাগ ও সন্ন্যাসের কি অদ্ভুত মহিমা ! একজন সন্ন্যাসীর আত্মত্যাগে লক্ষ লক্ষ লোক মন্ত্রমুগ্ধ হইয়া প্রত্যেকে এক এক জন সন্ন্যাসী হইয়াছিল। সে পবিত্র আলোকে এক দিন প্রত্যেক শিখ এক একটা ক্ষুদ্র গুরুগোবিন্দ সিংহ হইয়াছিল। কিন্তু আজ সে আলোকের প্রতিফলন অভাবে সে সকল গ্রহ উপগ্রহ অনন্ত তিমিরে বিলীন হইয়া গিয়াছে !!

চৈতন্য* ।

আমরা আর এক জন সন্ন্যাসীর নাম উল্লেখ না করিয়া থাকিতে পারি না। সে পবিত্র নাম এখনও বঙ্গের প্রতি নগরে সঙ্কীর্ণিত হইয়া থাকে। ব্রাহ্মণ্য ধর্মের ভীষণ বৈষম্য

১১৭-৭ শকে ১-শে ফাল্গুন তারিখে নবদ্বীপে চৈতন্য দেব জন্মগ্রহণ করেন। তাঁহার পিতা জগন্নাথ মিশ্র খ্রীষ্ট হইতে আসিয়া নবদ্বীপে বাস করেন। তিনি ওধার নীলাধর ক্রেশ্ণদেবের কন্যা শচী দেবীকে বিবাহ করেন। বিশ্বরূপ, বিশ্বস্তর নামে তাঁহাদের দুইটি পুত্র জন্মে। বিশ্বরূপ ও বিশ্বস্তর দুই জনই পরম পণ্ডিত হইয়া অবশেষে সন্ন্যাসাশ্রম গ্রহণ করেন। সন্ন্যাস-ধর্মে দীক্ষিত হওয়ার সময় বিশ্বস্তর চৈতন্য নাম গ্রহণ করেন। চৈতন্য প্রথমে বল্লাভাচার্যের কন্যা লক্ষ্মী দেবীকে বিবাহ করেন। সপ-দংশনে লক্ষ্মী দেবীর মৃত্যু হইলে চৈতন্য সনাতন রাজ-পণ্ডিতের কন্যা বিষ্ণুপ্রিয়াকে বিবাহ করেন। ইহারই পূর্বে

ভাবে যখন জগৎ দগ্ধ হইতেছিল, যখন নীচ জাতি সকল কুকুর বা শৃগালের ন্যায় ব্রাহ্মণদিগের পরিত্যক্ত হইয়া ছিল, যখন সমাজের কঠিন শাসনে সমাজ বন্ধন কেবল যন্ত্রণার কারণ হইয়া উঠিয়াছিল, যখন অলিতপদ রমণীরা বাতাহতা নিরাশ্রয়া লতার ন্যায় ভূমি-বিলুণ্ঠিত ও পদদলিত হইতেছিল, যখন শুষ্ক তार्কিকতার স্নেহ, প্রেম ও ভক্তি প্রভৃতি হৃদয়ের কোমলতর বৃদ্ধি সকল বিলুপ্ত হইবার উপক্রম হইয়াছিল, সেই সময় চৈতন্য দেবের আবির্ভাব। চৈতন্য দেব স্বয়ং অদ্বিতীয় পণ্ডিত ছিলেন। কিন্তু তাঁহার পাণ্ডিত্য নীরস ও হৃদয়ের পরিপুষ্টি-বিরহিত ছিল না। স্বদেশের শোচনীয় অবস্থা দেখিয়া তাঁহার হৃদয় কাঁদিয়া উঠিল। তিনি দেখিলেন, মানবজাতিগত অস্তিত্বানলে পূর্ণ ব্যক্তিগত অস্তিত্ব আহুতি না দিলে, দেশের আর মঙ্গল নাই। তিনি দেখিলেন, সেই লক্ষ্য সাধনের একমাত্র উপায় সন্ন্যাস ও আত্মত্যাগ। আপনাকে ভুলিয়া পরের জন্য ভাবিতে শিখাইতে হইলে, স্বয়ং আত্ম-বিস্মৃত হইতে হয়। এবং আপনার সুখ আপনার সম্পত্তি জাতীয় সুখ ও জাতীয় সম্পত্তিতে বিলীন করিতে হয়। চৈতন্যের যে চিন্তা, সেই কার্য্য। তিনি মানব সাধারণের সুখ-পুণ্য পরিবর্দ্ধনার্থ নিজ পারিবারিক আত্ম-

যৌবনের সময় চৈতন্য সন্ন্যাসাশ্রম গ্রহণ করেন। জননী শচী দেবী ও প্রিয়-ভ্রাতা বিষ্ণুপ্রিয়াকে গৃহে রাখিয়া তিনি প্রেম ও ভক্তির ধর্ম প্রচারে বহির্গত হন। সন্ন্যাসাশ্রম গ্রহণ না করিলে লোকে তাঁহার প্রেম ও ভক্তির ধর্ম গ্রহণ করে না বলিয়াই তিনি সন্ন্যাসাশ্রম গ্রহণ করেন। প্রচার-কার্য্য সম্পন্ন করিয়া তিনি শেখকাল নীলাচলে আতিবাহিত করেন। ১৪৫৫ শকে অষ্টচত্বরিংশ বৎসর বয়সে নীলাচলেই চৈতন্যদেব দেহত্যাগ করেন।

স্বখে জলাঞ্জলি দিলেন । লক্ষ লক্ষ অনাথ অনাথিনীর অশ্রু-
জল মুছাইবার জন্য প্রাণাপেক্ষা প্রিয়তরা ভার্য্যাকে কাঁদাই-
লেন । বিশ্বপ্রেমে জগৎ মাতাইবার জন্য স্বয়ং মাতৃপ্রেম-সুখায়
বঞ্চিত হইলেন ? সেই সন্ন্যাসীর প্রেম-সংকীৰ্ত্তনে জগৎ মুগ্ধ
হইল । নিদাঘের রনিকিরণ-প্রতপ্ত মৃত্তিকায় যেন বারিধারা
পতিত হইল ! তিনি গাইয়া গাইয়া বেড়াইতে লাগিলেন,
'আমরা সব ভাই ভাই, আমরা সব ভাই বোন ।' সেই আস্থানে
—সেই প্রেমসংকীৰ্ত্তনে হিন্দু মুসলমান ও ব্রাহ্মণ শূদ্র একই
সামান্যে আসিয়া একই গুরুর মন্ত্রশিষ্য হইতে লাগিলেন ।
খোল করতালের ঝঙ্কারে নমস্তু ভারতবর্ষ আলোড়িত হইল ।
গ্রামে গ্রামে, নগরে নগরে, সংকীৰ্ত্তন হইতে লাগিল, আমরা
সব এক পিতার সন্তান, আমরা সব ভাই ভাই, আমরা সব ভাই
বোন ।' প্রেম ও ভক্তিশ্রোতে ভারত প্রাবিত হইল । সেই
পরম যোগীর অদ্ভুত আত্মত্যাগের মহিমায় অসংখ্য বৈষ্ণব
বৈরাগ্যাশ্রম গ্রহণ করিলেন । প্রচারকের দলে ক্রমে ভারত
ভাসিয়া গেল । কি আশ্চর্য্য ! আজ যে কোন বিষয়ের
প্রচারের জন্য দশ জন লোক জুটায়, কাহার সাধ্য ? কিন্তু
সেই সময়ে চৈতন্যের চরিত্র-মহিমায় সহস্র সহস্র লোক
সংসার-স্বখে জলাঞ্জলি দিয়া আপনা হইতে প্রচারকাণ্ডে ব্রতী
হইতে লাগিলেন । আত্মত্যাগের দৃষ্টান্তের কি অদ্ভুত মহিমা !
চৈতন্যের প্রেম-সঙ্গীত আজও গ্রামে গ্রামে নগরে নগরে সংকী-
ৰ্ত্তিত হইতেছে । আজও বৈষ্ণব সম্প্রদায়ে প্রচারকের সংখ্যার
অপ্সরতুল নাই বটে, কিন্তু তাহারা চৈতন্যের মহৎ লক্ষ্য হারা-
ইয়া এখন কেবল প্রচারকের পরিচ্ছদ পরিয়া বেড়াইতেছে

মাত্র। তাহাদিগের অধিকাংশ এখনও মহৎ ভাব-ব্যঞ্জক প্রেমগান সকল গাইয়া বেড়াইতেছে বটে, কিন্তু তাহা নিজের স্বার্থ সাধনের জন্য, বিশ্ব-প্রেমের প্রচারের জন্য নহে। এখনও তাহারা প্রেমগান গাইতে গাইতে নৃত্য করিয়া থাকে সত্য, কিন্তু তাহা অনিবার্য হৃদয়োচ্ছ্বাসে নহে, দানের পরিমাণ বাড়াইবার জন্য হৃদয়োচ্ছ্বাসের অভিনয়ে। চৈতন্যের বৈরাগ্য আত্মস্থপে ও আত্মদার্থে বলি দিয়াছিল, কিন্তু আধুনিক বৈম-ব-প্রচারকগণেব বৈবাগ্য আত্মস্থপ ও আত্মদার্থ সিদ্ধির অদ্বিতীয় সাধন স্বরূপ হইয়াছে। সেই জন্যই পূর্বে বৈরাগীর এত সম্মান ছিল; কিন্তু বৈরাগীরা সেই মহৎ দ্রষ্ট হইতে স্থলিত হইয়াছে বলিয়াই আজ লোকের এত ঘৃণাপাত্র হইয়াছে।

মহাদেব।

চল, আমরা এক বার সমাপি-বলে সেই আদি আদ্য-মহাকালে গমন করি। একবার ধ্যানে সেই আদর্শ যোগী বিরূপাক্ষ দেবাদিদেব মহাদেবকে দেখি। এক বার প্রাণ ভরিয়া সেই অটোজুটধারী ত্রিশূলী মূর্তি দেখি। 'এক বার সেই বাসুদেব-পরিধান, করপুত-কমণ্ডলু, শিব শঙ্কুকে হৃদয়কলকে চিত্রিত করিয়া দেখি। সে অগম্যনোমোহন রূপে ও যে অলৌকিক গুণগ্রামে মুগ্ধ হইয়া পরমতবাক্ত তনয়া গৌরী তাঁহাব কামনায় অম্লুত তপস্যায় নিমগ্ন হইয়াছিলেন, একবার সেই অগম্যনোমোহন রূপ ও সেই অলৌকিক গুণাবলী কল্পনায় আনিয়া দেখি। যে গুণে মুগ্ধ হইয়া নারদাদি ঋষিবৃন্দ বীণা-

বাদন পূর্বক জগতে তাঁহার গুণগান করিয়া বেড়াইতেন, একবার সেই গুণগুলি ভাবিয়া দেখি। যে গুণে মুগ্ধ হইয়া দেব-যক্ষ-রাক্ষস-মানবে পরস্পর-প্রতিদ্বন্দ্বিতায় তাঁহার উপাসনা আরম্ভ করিয়াছিলেন, একবার পারি ত তাঁহার বর্ণনা করিব। এ আদর্শ মूर्তি, ও এ আদর্শ চরিত্রের কাছে যাই, এমন সাধ্য কই ? তথাপি একবার চেষ্টা করিব।

এই আদর্শ সন্ন্যাসী কবিকল্পনা-বিজ্ঞপ্তিত নহেন। ইহার অলৌকিক কীর্তিরাশি আজও সংস্কৃত সাহিত্যে বর্তমান ও হিন্দু ধর্মের অস্থিমর্জ্জার সহিত জড়িত আছে যখন জগতে নর-দেহতত্ত্ব সম্পূর্ণ অবিদিত ছিল, তখন ইনি ইহার আবিষ্কার করেন। তিনি শ্মশানে ভ্রমণ করিয়া নরবঙ্কল সকল সংগ্রহ করিতেন। তিনি অস্থিমালাকে রত্নমালা অপেক্ষা লক্ষ গুণে অধিক আদর করিতেন। নরদেহ তাঁহার যোগাসন ও নরদেহভঙ্গ্য তাহার অঙ্গারণ ছিল। তিনি একাকী শ্মশানে বসিয়া শবচ্ছেদ করিতেন : কন্ন তন্ন করিয়া নরদেহের স্নস্ততত্ত্বগুলি নির্ণয় করিতেন ; নির্ণয় করিয়া সেই সকল স্নস্ততত্ত্বের নামকরণ করিতেন। শৃগাল কুক্কুরের ভীষণ বব, গলিত শব্দের পুতিগন্ধ, শ্মশানের ভীষণমূর্ত্তি, কিছুতেই তাঁহার সমাধিভঙ্গ করিতে পারিত না। লোকে তাঁহাকে পাগল বলিয়া পরিহাস করিত। কিন্তু তাঁহার চিত্ত কিছুতেই বিচলিত হইবার নহে। কিসে জগতের অকাল-মৃত্যু নিবারণ করিব, কিসে বিশ্বব্যাপী রোগের উপশমন করিব—রাত্রি দিবা তাঁহার কেবল এই চিন্তা। নিজের সম্পত্তির দিকে তাঁহার বিশ্ণুনাভও দৃষ্টি নাই। তিনি বনের বাঘ মরিয়া তাহার ছাল

পরিধান করিতেন, তিষ্কালক্ৰ অন্ত্রে কথঞ্চিৎ উদরপূর্তি করিতেন । যিনি জগতের মঙ্গলের জন্য সৰ্ব্বত্যাগী, লোকে তাঁহাকে অশ্বানবাসী ভিখারী বলিয়া ঘৃণা করিত । কিন্তু তিনি নররূপী দেবতা । তাঁহার তাহাতে চিত্ত বিকৃতি জন্মিত না । নরদেহ-তত্ত্ব নির্ণয় করিয়াই তিনি ক্ষান্ত ছিলেন, একরূপ নহে । তিনি বনে জঙ্গলে রোগ-নিবারক গাছগাছড়া খুঁজিয়া বেড়াইতেন । হলাহলের শক্তি বৃদ্ধিবার জন্য তিনি স্বয়ং হলাহল পান করিয়া নীলকণ্ঠ হইয়াছিলেন । তিনি বিবাক্ত ঔষধের শক্তি পরীক্ষা করিবার জন্য নিজের শরীর সর্পদষ্ট করিয়া তাহাতে ঔষধ প্রয়োগ করিতেন । এইরূপে বিয়ন্ন ঔষধে সিদ্ধবিদ্ধ হইয়া তিনি কণীর কণাকে পরিহাস করিবার জন্য স্বয়ং কণিভূষণ হইয়াছিলেন । হানিমান এই প্রক্রিয়া অবলম্বন করাতে এখন জগতে পূজিত হইয়াছেন, কিন্তু সেই আদি যোগী এই জন্য সেই আদি কালে জগতের পরিহাসস্থল হইয়াছিলেন !

এস এক বার সেই বিরূপাক্ষকে বীরমূর্তিতে দেখি । যেখানে অত্যাচার, সেইখানেই সেই ব্যাজ্জচৰ্ম্মপরিধায়ী ত্রিশূলী মূর্তি উপস্থিত । অত্যাচারীর মস্তক বিদীর্ণ করিবার জন্য তিনি হস্তে ত্রিশূল ধারণ করিতেন । সেই হস্তে অমিত বল ছিল । সেই অমিত-বল বাহুতে তিনি যখন ত্রিশূল ধারণ করিতেন, তখন সেই বিরাটমূর্তি দেখিয়া ত্রিভুবন বিকম্পিত হইত । দেবতারা যখন অসুরগণের অত্যাচারে প্রপীড়িত হইতেন, তখন ত্রিশূলীর শরণাপন্ন হইতেন । অত্যাচার-প্রপীড়িত দেবমানবের হৃৎখে তাঁহার হৃদয় বিগলিত হইত । তাই তিনি তদ্রূপে অত্যাচারীর দণ্ড বিধান করিতেন ।

শারীরিক বলে ও অস্ত্রবিদ্যায় জগতে তৎকালে তাঁহার দ্বিতীয় ছিল না। হরধনু ভঙ্গ করিয়া ছিলেন বলিয়া, রামের বীরত্ব জগতে ঘোষিত হইয়াছিল। বড় বড় বীর সে ধনুক নাড়িতেও পারেন নাই। দুইবার দুইজন বীর—অর্জুন ও লক্ষ্মণ, তাঁহার সহিত অস্ত্রযুদ্ধে সাহসী হইয়াছিলেন বলিয়া তাঁহারা জগতে বীরচূড়ামণি বলিয়া প্রখ্যাত হইয়াছিলেন। রুদ্রাক্ষকে পরাজয় করিতে পারে, এমন লোক তৎকালে পৃথিবীতে জন্মে নাই। দশানন তাঁহার পদাশ্রয়ে জগদ্বিজয়ী হইয়াছিলেন।

দশানন যাহার পদাশ্রিত, দেব মানব যাহার শরণাগত, সেই অদ্ভুত বীর সন্ন্যাসী মনে করিলে, জগতের সাম্রাজ্য কবচলস্থ করিতে পারিতেন। কিন্তু তিনি আধুনিক বীর-সন্ন্যাসী গ্যারিবল্ডীর ন্যায় বিজয়ের কলে স্নেহা-বঞ্চিত। রাজ্য করিব, স্বথসম্ভোগ করিব—এ সকল তাঁহার সেই পবিত্র জীবনের লক্ষ্য ছিল না। মানবজাতির মঙ্গল-সাধনেই তাঁহার স্বথ, মানবজাতিকে উচ্চতম আদর্শে লইয়া যাওয়াতেই তাঁহার প্রকৃত বাজব। ইহা অপেক্ষা উচ্চ স্বথ ও উচ্চ রাজত্ব আব কি হইতে পারে ?

হিন্দুগণের মত্ব্য যখন অধিকাংশই নিরাকার ব্রহ্মের ধ্যান ধারণায় অক্ষম হইয়া একেবারে ধর্মবিবর্জিত হইয়া উঠে, তখন সেই পরমযোগী নিজে নিরাকার ব্রহ্মের উপাসক হইয়াও, সাধারণ অজ্ঞান উপাসকমণ্ডলীর জন্য সাকারোপাসনা প্রবর্তিত করেন।

তিনি সন্ন্যাসী হইয়াও আশ্রমী ছিলেন। বিশ্ব-প্রেমের সহিত তিনি পারিবারিক প্রেমের সামঞ্জস্য বাধিতে পারিতেন।

তাঁহার বিশাল হৃদয়-সাগর সমীপবর্তিনী আশ্রিত। তরঙ্গিনীকে প্রেমবারিতে পরিপূরিত করিয়া বিশ্বক্ষেত্রকেও প্রাবিত করিতে পুরিত । এই জনাই সেই আদর্শ-সতী সতী স্নানান্তরেও তাঁহাকে পাইবার জন্য তাঁহার কামনায় পার্শ্বতীরূপে তাদৃশ ঘোর তপস্যায় নিমগ্ন হইয়াছিলেন । এই জনাই তিনি সেই ছদ্মবেশী ব্রাহ্মণবটুর শিবনিন্দাতে উদ্ভাদিনী হইয়াছিলেন । সেই চুলু চুলু নয়নে প্রেম ও চিন্তাশীলতা যেন মিশিয়া ছিল । সেই আজাহুলস্থিত বাহু যেন অত্যাচারের প্রশমনের নিমিত্ত সতত বদ্ধ পরিকর ছিল । সেই নখর চলচলায়মান দেহ যেন প্রেম-ভরে জগৎকে আলিঙ্গন করিবার জন্য সতত প্রস্তুত থাকিত ।

একরূপ, একরূপ গুণ একাধারে আর কখন সন্নিবেশিত হ নাই । একরূপ গুণময়ী নৃষ্টি ভারত-অদৃষ্ট-গগনে যদি আর এক বার উদ্ভিত হয়, তবেই ভারত আর একবার আগুরুক বলিয়া পূজিত হইবে । কে বলিতে পারে, আর উদ্ভিত হইবে না ?

ওয়ালেস্ ।*

চল একবার ইউরোপখণ্ডে যাই । সেখানে অনেক গুলি সম্রাসীকে দেখিতে পাইব । একবার সেই পবিত্র-মূর্তি-গুলি দেখিয়া আসি । কল্পনাবলে চল, একবার ত্রয়োদশ

* ১৮৭০ সালে ম্যালকমের ওরসে ও জাঁ ক্রফোর্ডের গর্ভে ওয়ালেসের জন্ম হয় । তাঁহার পিতা স্কটল্যান্ডের অন্যতম ভূমালিকারী ও তাঁহার জননী ওয়ার নগরের সেরিক্‌সার বোনালাড ক্রফোর্ডের কন্যা ছিলেন । ১৮৭৫ খ্রীষ্টাব্দে তিনি নিজ ভৃত্য কর্তৃক প্রতারিত ও শত্রুহস্তে সমর্পিত হন । নিষ্ঠুর এডওয়ার্ডের আদেশে উক্ত বৎসরেই তাঁহার দেহ খণ্ডখণ্ড হইয়া চতুর্দিকে বিক্ষিপ্ত হয় ।

শতাব্দীর স্ট্রলগে যাই। ঐ দেখ, দ্বাদশ জন রাজা স্ট্রলগের মুকুট লইয়া পরস্পর—আত্মঘাতী হইতেছেন। ইংলণ্ডের প্রথম এডওয়ার্ড মীমাংসকরূপে আহৃত হইয়া তথায় কৌশলে আপনার আধিপত্য স্থাপন করিতেছেন। ঐ দেখ, ওয়ালেস্ প্রভৃতি কতিপয় যুবক ইংলণ্ডের আধিপত্যের প্রতিবাদ করিতে

ওয়ালেসের খুলতাত ডুনিপেসে প্রধন যাজক ছিলেন—বাল্যকালে তিনি তাঁহারই নিকট থাকিয়া উচ্চ সাহিত্যে সর্বিশেষ পারদর্শিতা লাভ করেন।

১২৯১ সালের ১১ই জুন ইংলণ্ডের এডওয়ার্ড এই মর্মে এক শাসনপত্র প্রচারিত করেন, যে প্রত্যেক স্ট্রলগবাসীকে তাঁহার অধীনতা স্বীকার করিতে হইবে। এই আদেশ প্রতিপালন করাইবার জন্য ১ম এডওয়ার্ডের দুর্দমনীয়া সেনা স্ট্রলগে আলোড়ন করিয়া বেড়ায়। ওয়ালেস এই সময় ভগ্নীর স্কুলে পড়িতেছিলেন। ম্যাট্‌সিনির ন্যায় তিনি বিদ্যালয়ের কাঠমঞ্চকে বসিয়া করতলে কপোল বিন্যাস পূর্বক বিষয়বদনে স্বদেশের উদ্ধার সাধনের কল্পনা করিতেন। এই চিন্তা তাঁহার জীবন-সহচরী হইয়া উঠে। তিনি সম-পাঠীদিগকে লইয়া একটা ছাত্রসমাজ গঠিত করেন। এই ছাত্রসমাজের প্রত্যেকেই স্বদেশের উদ্ধার সাধনের জন্য জীবন উৎসর্গ করিব বলিয়া প্রতিজ্ঞাবদ্ধ হইত। প্রত্যেককে সর্বদা তরবারি ও ছোরা ধারণ করিতে হইত। ওয়ালেসের পিতা এডওয়ার্ডের অধীনতা স্বীকার না করায় তাঁহাকে সর্বিশেষ নিষাতিত হইতে হইয়াছিল। ওয়ালেস্ ইংরাজদিগের হস্তে একে একে সকলই হারাইয়াছিলেন। পিতা মাতা ভ্রাতা, পত্নী, জাতি ও বন্ধু—ইংরাজাদিগের সহিত সংঘর্ষে ওয়ালেস্ এ সমস্তই হারাটলেন। স্বদেশানুরাগ ও প্রতিহিংসাসম্পূর্ণ—উভয়েতেই উত্তেজিত হইয়া তিনি মত্ত মাতঙ্গের ন্যায় ইংরাজ সৈন্য-বনে বার বার প্রবেশ করিয়া এডওয়ার্ডকে ক্রমাৎ বলহীন করেন। তিনি স্ট্রলগের অভিভাবক ও গবর্নর পদে অভিষিক্ত হইয়া স্ট্রলগের বাণিজ্য-বৃদ্ধি ও শৃঙ্খলা স্থাপন করেন। স্ট্রলগের সামন্ত বৃন্দ অসুখ্য-পরতন্ত্র হইয়া যদি গদে গদে তাঁহার গতিব্রত না করিতেন, তাহা হইলে স্ট্রলগে ইয়ত অন্যরূপ ধারণ করিত।

যুদ্ধপরিচর হইয়াছেন। সেই বীরমণ্ডলী মহান্ ভাবে উদ্দীপিত
 হইয়া আপনাদিগের ধনসম্পত্তি ও পদমর্যাদা বিসর্জন দিয়া
 বনে বনে, পর্বতে পর্বতে, লুকাইয়া বেড়াইতে লাগিলেন।
 অনাহারে, অনিদ্রায়—দিন, রাত্ৰ, বৎসর কাটিয়া যাইতে লাগিল,
 তথাপি সে ভেজ দমিত হইল না, সে প্রতিজ্ঞা বিচলিত হইল
 না। প্রতিজ্ঞা—যে হয় স্কটলণ্ডের স্বাধীনতা পুনরুদ্ধার করি-
 বেন, নয় সে যজ্ঞে আত্মবলি প্রদান করিবেন। ওয়ালেস্,
 বরীড্, গ্রেহাম্, কার্লাইল প্রভৃতি সন্ন্যাসিগণের অদ্ভুত আত্ম-
 ত্যাগে ও অলৌকিক স্বদেশাত্মরাগে মুগ্ধ হইয়া ক্রমে অনন্ত্য
 স্কট্—ওয়ালেসের পতাকানূলে আসিয়া দাঁড়াইল। এদিকে
 ইংরাজ-সেনার অত্যাচারে স্কটলণ্ড-বক্ষ ক্ষত বিক্ষত হইতে
 লাগিল। লুণ্ঠন ও সতীত্বনাশের সংবাদে চতুর্দিকে হাহাকার
 রব উঠিল। হৃৎকণ্ঠ নৈনিকগণের নামে নালিশ করিতে গেলে
 সেনাপতি বাদীকে ফাঁসিকাঠে লট্কাইয়া দেন। সুতরাং কেহ
 নালিশ করিতে সাহস করে না, মরমে মরিয়া সমস্ত সত্ত্ব করে।
 চতুর্দিক্ অন্ধকার, অকারণ-হত পতির বিয়োগ-বিধুরা নববিধবার
 ক্রন্দন, অপজ্ঞত-সতীত্ব সতীর আর্তনাদ ও লুণ্ঠিত-সর্বস্ব কৃষকের
 দীর্ঘশ্বাসে স্কটলণ্ডের আকাশ বিদীর্ণ হইতে লাগিল। কৃষকে
 আর চাষ করিতে চায় না, কারণ তাহার বিশ্বাস নাই যে
 তাহার পরিপক্ক শস্য ইংরাজ সৈনিক বলপূর্বক লইয়া যাইবে
 না। গৃহিণীরা আর কাটনা কাটে না, কারণ তাহারা জানিত
 যে তাহাদিগের ঘরে কাটা সূতা ইংরাজ লুটেরারা আসিয়া লুট
 করিয়া লইয়া যাইবে। স্কটলণ্ডের প্রশস্ত গভীর ও সুন্দর হৃদে
 রক্ত মীন ধরিবার জন্য জেলেরা আর জাল ফেলিতে চাহে না,

কারণ তাহারা জানিত ইংরাজ সশস্ত্র কোথায় লুকাইয়া আছে, শিকার হস্তগত হইবামাত্র তাহারা আসিয়া কাড়িয়া লইবে ।

‘ভগবন্ ! স্কটলণ্ডের অদৃষ্টে এরূপ দুঃখ আর কতকাল রাখিবে ? স্কটলণ্ডের সৌভাগ্যরবি চিরদিনের জন্য কি অস্ত-মিত হইল ? আর কি ইহা কখন স্কটিশগগণে উদিত হইবে না ? স্কটলণ্ডের উজ্জ্বল আশাতারা কি অনন্ত কালসাগরে চিরদিনেব মত বিলীন হইল ? স্কটলণ্ডের স্বাধীনতা-কমলিনী মৃত কি নিদ্রিত ? না মরেন নাই—ঐ দেখ তিনি নিমীলিত নেত্রে নিদ্রা যাইতেছেন । আবার দেখ—ঐ নীল কমল দুটি সৌভাগ্য-স্বৰ্ণের পুনরুদয়ে একটু করিয়া প্রফুল্লিত হইতেছে । ঐ দেখ কমলিনী পূর্ণ-প্রফুল্লিত নেত্রে উঠিলেন । একি স্বপ্ন না মায়া ? এত যে ইংরাজ-সৈন্য ছিল কোথায় গেল ? ঐ যে তাহারা স্কটিশ বর্ষাধারিগণের সম্মুখে বায়ুর সম্মুখে ভূষের ন্যায় উড়িয়া যাইতেছে !—স্কটিশ ব’র সন্ন্যাসিগণ কল্পনা-বলে ভাবী সময়ের এই-রূপ উজ্জ্বল ছবি দেখিতে পাইলেন ।

প্রাতঃস্বৰ্ণের সুবর্ণময় কিরণ মালায় সমুদ্ভাসিত আয়ার নদীর তীরে চিস্তামগ্ন ভাবে পাদচার করিয়া বেড়াইতেছেন উনি কে ? বিধাতা যাহাকে সুন্দর বুদ্ধিশালী তাম্বুল-পত্রনিভ মুখকান্তি দিয়াছেন উনি কে ? যাহার চক্ষু হইতে প্রতিভা ও অগ্নি বাহিব হইতেছে উনি কে ? কোথেকে যাহার ওষ্ঠাধর বিকম্পিত হইতেছে উনি কে ? ঐ আজাহুলশিত-বাহু বিশাল-বক্ষা, বৃষস্কন্ধ মহাপুরুষ কে ? বিলম্বিনী অরাল কেশরাজি যাহার গ্রীবার উপর গৌরবে জীড়া করিতেছে উনি কে ? যাহার কটিবন্ধ অসি ঝক্‌ঝক্ করিয়া বার বার ধরাভঙ্গ

চূষন করিতেছে ঐ বীরপুরুষ কে ? যিনি সম্পত্তি থাকিতেও সর্বভাগী, স্বদেশের উদ্ধারসাধনরূপ এক মহামন্ত্রে দীক্ষিত ঐ বীর সন্ন্যাসী কে ? ইনিই সেই স্কটলণ্ডের উদ্ধার কর্তা ওয়ালেস্। ষাঁহার প্রচণ্ড খড়্গাঘাতে অসংখ্য ইংরাজ বীরপুরুষ শমন-সদনে প্রেরিত হইয়াছিলেন, ইনিই সেই স্কটলণ্ডরবি ওয়ালেস্। ষাঁহার উদ্দীপনাপূর্ণ বাক্যে অসংখ্য অবদানপরম্পরা অনুষ্ঠিত হইয়াছিল, ইনিই সেই স্কটসঞ্জীবন ওয়ালেস্। ষাঁহার প্রতাপে ইংলণ্ডের দৃষ্ট এডওয়ার্ডও কম্পিত কলেবর হইয়াছিলেন, ইনিই সেই স্কটিশ-সিংহ ওয়ালেস্। ষাঁহার বিজয়িনী সেনা ইংলণ্ড-ভূমিকে অগ্নিময় করিয়াছিল, ইনিই সেই স্কটবীরকেশরী ওয়ালেস্। ষাঁহার চরণতলে পড়িয়া একদিন ইংলণ্ডের-এডওয়ার্ডের মহিবীণ সন্ধি ভিক্ষা করিয়াছিলেন, ইনিই সেই স্কটলণ্ড-গৌরব ওয়ালেস্। বলিয়া দিতে হইবে না যে, ওয়ালেস্ ওয়ার নদীর তীরে পালচার করিতে করিতে চিন্তামগ্ন মনে মাড়ভূমির বর্তমান ছরবছা ও অতীত গৌরবের বিষয় ভাবিতেছিলেন। এই স্বাধীনতা সমরে ওয়ালেস্ পিতা, মাতা, ভ্রাতা অবশেষে প্রাণাপেক্ষাও প্রিয়তরা ভাৰ্য্যা, একে একে সমস্ত হারাইয়াছিলেন। তথাপি সে সন্ন্যাসীর অন্তরের আশ্রয় না নিভিয়া বরং অধিকতর উদ্দীপিত হইয়াছিল। ইংরাজদম্ভাদিগকে বিদূরিত করিয়া স্কটলণ্ডকে স্বাধীন করিলেন—এই সর্বপ্রাণিনী চিন্তা তাঁহার একমাত্র সহচরী ছিল। শয়নে স্বপনে, অশনে উপবেশনে—এ চিন্তা একবারও তাঁহাকে পরিত্যাগ করিত না, তাঁহার কপর্দক মাত্র সম্বল ছিল না, অথচ তিনি না ডাকিতেও কত সহস্র লোক আসিয়া

তাঁহার পতাকামূলে দাঁড়াইত । তিনি দৈবশক্তিসম্পন্ন ছিলেন, এবং সেই শক্তি নিজ সৈন্যে সংক্রামিত করিতে পারিতেন । এইজন্য তাঁহার সৈন্যেরা বার বার দশগুণ ইংরাজ সৈন্যের সহিত যুদ্ধ করিয়া বিজয় লাভ করিয়াছিল । এই জন্যই অসংখ্য দুর্গ সহজেই তাঁহার করতলস্থ হইয়াছিল । ষ্টালিঃ সমরক্ষেত্রে তাঁহার অতিমানুষ বীরত্বের পরিচয়-স্থল । এই যুদ্ধে তিনি দশমাংশ সৈন্য লইয়া দশগুণ ইংরাজ সৈন্যের সম্মুখীন হন । কথিত আছে, এই যুদ্ধে চল্লিশ সহস্র ইংরাজ হত হন, এবং বিজয়লক্ষ্মী সম্পূর্ণরূপে ওয়ারেন্সের করতলস্থ হন । স্কটিশদুর্গে জাতীয় পতাকা উড্ডীন করিয়া ওয়ারেন্স সেই বিজয়িনী সেনা লইয়া মস্ত হস্তীর ন্যায় ইংলণ্ড আলোড়িত করিয়া বেড়ান । কিন্তু ভাগ্যলক্ষ্মী অধিক দিন তাঁহার প্রতি প্রসন্ন ছিলেন না । এই অপমানের প্রতিশোধ লইবার জন্য এডওয়ার্ড অগণ্য সৈন্য সহ অচিরকাল মধ্যে স্কটলণ্ডের সিংহদ্বারে আসিয়া উপস্থিত হইলেন । এডওয়ার্ড জানিতেন, ওয়ারেন্সের সেনা রণে অজেয় । এই জন্য তিনি স্কটিশ শিবিরে ভেদ উৎপাদন করিয়া দিলেন । দলপতিগণের মধ্যে সৈন্যপত্নী লইয়া ঘোরতর বিবাদ বাধিয়া উঠিল । অন্তর্বিচ্ছেদের বিষময় ফল ফলিল । কল্কার্ক * কুরুক্ষেত্রে স্কটিশ পৃথুরাজ ইংরাজদিগের হস্তে পরাজিত হইলেন । স্কটলণ্ডের স্বাধীনতাস্বৰ্ণ্য আবার পরাজিত হইল । পামর ইংরাজ সেই দেবছল্লভ দেহ খণ্ড খণ্ড করিয়া চতুর্দিকে বিকিণ্ড করিল ।

* ১২৯৮ সালের ২২এ জুলাই এডওয়ার্ডের সহিত কল্কার্ক ক্ষেত্রে স্কটগণের মহাদময় হয় । এই যুদ্ধে বিজয়লক্ষ্মী ১ম এডওয়ার্ডের অকশায়িনী হন ।

তাহার মস্তক লইয়া পিশাচেরা লণ্ডন সেতুর উপর বসাইয়া রাখিল। এইবার ওয়ালেস্ মাতৃভূমির চরণে পূর্ণ আত্মবলি দিলেন। যেমন যোগিবর ঐষ্ট মানবজাতির পাপের প্রায়শ্চিত্ত করিবার জন্ত নিজ দেহ বলি দিয়াছিলেন, সেইরূপ ওয়ালেস্, স্কটিশ-জাতীয় পাপের প্রায়শ্চিত্ত করিবার জন্য নিজ দেহ উৎসর্গ করিলেন। অমনি স্বর্গ হইতে পুষ্পবৃষ্টি হইল। অমনি দেব যক্ষ কিম্বর সমস্তরে গাইয়া উঠিলেন, 'ধন্য ওয়ালেস্! ধন্য স্কটলও—ওয়ালেস্-জননী!' জগতে প্রতিধ্বনি উঠিল—'ধন্য ওয়ালেস্; ধন্য স্কটলও—ওয়ালেস্-জননী!' সে রক্তে ইংলণ্ডের বক্ষ পুড়িয়া ছারখার হইল। এই বীরহত্যা মহাপাতকেব প্রায়শ্চিত্ত ইংরাজকে ব্যান্ধবরন্ * সমরক্ষেত্রে করিতে হইল। সংবাদ দিবার জন্য সেই একলক্ষ সেনার অল্পই স্বদেশে ফিরিয়া আসিল। ধন্য ওয়ালেস্! ধন্য তোমার স্বদেশাত্মরাগ! ভূমি মরিষাও স্বদেশের উদ্ধার সাধন করিলে! ভূমি অমর; তাহা না হইলে এতদিন পরে সুদূর অল্পগাঙ্গ প্রদেশে আয্য-যুবক আজ তোমার নাম-সঙ্কীৰ্ত্তন করে কেন? তাহা না হইলে আজ তোমার নাম মাত্র উচ্চারণে আয্যযুবকের শিরায় শিরায় তাড়িতবেগে শোণিতস্রোত প্রবাহিত হয় কেন? দেব! পতিত আৰ্য্যের হৃদয়-কন্দরে আনিয়া অধিষ্ঠান কর। একবার তাহাদিগকে তোমার অলৌকিক অত্মরাগ ও স্বজাতিপ্রেম শিখাও। একদিনের জন্যও অন্ততঃ তাহাদিগকে জননীর চরণে আত্মবিসর্জন করিতে শিখাও। দেব? একবার

* ১৩১৪ খ্রীষ্টাব্দের ২৪এ জুন তারিখে ব্যান্ধবরন্ প্রোভান্সীতীরে ইংগণ্ডের দ্বিতীয় এডওয়ার্ডের সহিত সমবেত স্কট সৈন্যের ভীষণ যুদ্ধ হয়। এই যুদ্ধে বিজয়লাভী স্কটিশ অধিনায়ক রবার্ট ব্রুসের অঙ্গণায়িনী হন।

দেখা দাও। একবার এ পতিত জাতিতে আবিভূত হও।
আর কিছু চাহি না। *

উইলিয়ম্ টেল্।

যে সময়ে স্কটলণ্ডে ওয়ালেস্ জাতীয় স্বাধীনতা রক্ষার জন্য
প্রাণপণে চেষ্টা করিতেছিলেন, সেই সময় সুইজলণ্ডে আর
একজন রাজনৈতিক সন্ন্যাসী অষ্ট্রিয়ার সহিত স্বাধীনতা-সমরে
নিযুক্ত হন। সকলেই জানেন ইহার নাম টেল্। ইহার অদ্ভুত
কার্যকলাপ পর্যালোচনা করিলে, ইহাকে বাস্তব মনুষ্য বলিয়া
বোধ হয় না; যেন কবির কল্পনাবিজৃম্বিত বলিয়া প্রতীতি
জন্মে। কিন্তু তিনি বাস্তবিকই মানব—অথবা মানবরূপী
দেবতা ছিলেন। বস্তুতঃ হৃদয়ের বিশালতা, ইচ্ছার অলঙ্ঘ্যতা,
লক্ষ্যের অচঞ্চলতা, এবং স্বাভাতি-প্রেম ও স্বদেশানুবাগের গভীর-
তায় তিনি দেবোপম ছিলেন। তিনি স্বদেশের মঙ্গলসাধনেব
জন্য মৃত্যুতে—অথবা তদপেক্ষায় ভয়ানক যদি কিছু থাকে
তাহাতেও কাঁপ দিতে একবারও ভাবিতেন না তাঁহার হৃদয়ে
ভয় ছিল না। তিনি বিক্রমে কেশরী ছিলেন।

যখন চতুর্দিকে অন্ধকার, যখন চতুর্দিকে অত্যাচাৰ, যখন
সমস্ত সুইজলণ্ড অষ্ট্রিয়ার শৃঙ্খলভরে বসিয়া পড়িতেছিল,
সেই সময় এই রণ-বীর সুইসফ্রেজে জাতীয় অধিনায়ক-রূপে
আবিভূত হন। তাঁহার দেহ হইতে তেজঃপুঞ্জ নির্গত হইত
দেখিয়া লোক মনে করিত যে, বিজয়-লক্ষ্মী তেজঃপুঞ্জচ্ছলে
যেন তাঁহাকে কঙ্ক-বেষ্টিত করিয়া রাখিয়াছেন।

* ওয়ালেসের বিস্তৃত জীবনী স্বতন্ত্র পুস্তকাকারে মুদ্রিত হইতেছে।

এই রণবীর যদিও সামান্য কৃষকের গৃহে জন্মগ্রহণ করিয়া-
 ছিলেন, তথাপি তাঁহার আত্মা অতি মহান্ ছিল। তিনি
 শত্রুহস্তে আত্ম-সমর্পণ করা অপেক্ষা মৃত্যু শ্রেয়ঃ মনে করিতেন।
 একদিন এক কৃষক লাঙল চষিতে ছিল। এমন সময়ে অষ্ট্রিয়ার
 রাজ-প্রতিনিধির ভৃত্য অকারণে আসিয়া সেই হলবাহী বলদ-
 দ্বয়কে খুলিয়া লইল। বলিল 'এ কাজের জন্য দুইজন সুইস
 নিযুক্ত করিলে ভাল হয়, কারণ তাহারা ভারবহন করিবার
 জন্যই জন্মিয়াছে'। কৃষকের ইহা দুর্কিষহ হইল। সে তৎক্ষণাৎ
 তাহার হস্ত-স্থিত লাঙল দ্বারা তাহাকে ভূপাতিত করিল।
 মারিয়াই, সে ভবিষ্যৎ ভাবিয়া তৎক্ষণাৎ পলায়ন করিল।
 ক্রোধোন্মত্ত অষ্ট্রিয়গণ তাহাকে না পাইয়া তাহার বৃদ্ধ পিতাকে
 গিয়া ধরিল। বৃদ্ধের যাহা কিছু ছিল সমস্ত রাজকোষভূক্ত
 করিয়া অবশেষে পিণ্ডাচেরা তাহার চক্ষু দুটি উৎপাটিত করিল।
 যষ্টি হস্তে দ্বারে দ্বারে ভিক্ষা করা ভিন্ন অন্ধের আর কোন উপায়
 রহিল না। এই প্রকার অত্যাচারে সমস্ত সুইজল ও বাসী
 ক্ষেপিয়া উঠিলেন। তাঁহারা দলে দলে আসিয়া এক জায়গায়
 জমা হইতে লাগিলেন। সকলেই একবাক্যে বীরকেশরী
 উইলিয়ম্ টেল্কে জাতীয় সেনার অধিনায়ক নিযুক্ত করিলেন।
 জাতীয় দলের অনেকগুলি গুপ্ত অধিবেশন হইল। পরস্পরের
 প্রতি বিশ্বাস-রক্ষা ও মন্ত্রগুপ্তির জন্য পরস্পরের সমীপে
 পরস্পর শপথ গ্রহণ পূর্বক প্রতিজ্ঞাবদ্ধ হইলেন। সাধারণ
 অভ্যুত্থানের জন্য একটা দিন স্থির হইল। সকলেই উৎসুক
 মনে সেই দিনের প্রতীক্ষা করিতেছেন, এমন সময় একটা
 দুর্ঘটনায় সব উল্টাইয়া গেল। সুইজ্ গবর্নর আল্টর্ক নগরের

বাজারে একটি গাছের উপর তাঁহার টুপি রাখিয়া ঘোষণা করিয়া দিলেন যে, ‘সুইজরলণ্ডের সমস্ত লোককে এই টুপির নিকট নতজানু ও অনাবৃত-মস্তক হইতে হইবে। গবর্ণরের প্রতি তাহারা যে সম্মান করিতে বাধ্য, তাহাদিগকে ঐ টুপির প্রতিও সেই সম্মান প্রদর্শন করিতে হইবে’। উইলিয়ম্ টেল্ এই আদেশ প্রতিপালনে সম্পূর্ণরূপে অঙ্গীকৃত হইলেন। অষ্ট্রিয় পুলিশ তাঁহাকে ধরিয়া গবর্ণরের নিকট লইয়া গেল। গবর্ণর স্বাভাবিক নিষ্ঠুরতার বশবর্তী হইয়া আদেশ করিলেন যে, টেল্কে নিজ পুত্রের মস্তকে একটি আপল্ ফল রাখিয়া শরবিদ্ধ করিতে হইবে। ধনুর্বিদ্যায় টেলের সবিশেষ পারদর্শিতা ছিল, সুতরাং তিনি নির্ভয়ে শরসঙ্কান করিলেন। আপল্ বিদ্ধ হইল, কিন্তু পুত্রের মস্তকে বিন্দুমাত্রও আঘাত লাগিল না। সকলেই মন্ত্রমুগ্ধ হইয়া এই অদ্ভুত ঘটনা দেখিল। সুইজরলণ্ডের লোকে এই ঘটনার স্মরণার্থ যে স্মৃতি-স্তম্ভ নিশ্চিত করে, অদ্যাপি তাহা বিদ্যমান রহিয়াছে।

আপল্ বিদ্ধ হইলে টেল্ আর একটি শর লুকাইলেন। গবর্ণর তাহা দেখিতে পাইয়া জিজ্ঞাসা করিলেন “তুমি কি জন্য ঐ দ্বিতীয় শর আনিয়াছিলে?” টেল্ উত্তর করিলেন যে, “যদি প্রথম শর আপল্ ভেদ না করিয়া পুত্রের মস্তক স্পর্শ করিত, তাহা হইলে ঐ দ্বিতীয় শরে তোমায় শমনসদনে প্রেরণ করিতাম”। এই বাক্যে গবর্ণর ক্রোধে অধীর হইয়া টেল্কে শৃঙ্খলাবদ্ধ করিয়া নিজের নৌকায় লইয়া যাইতে আদেশ করিলেন, এবং নিজেও তাহাতে আরোহণ করিলেন। ইচ্ছা ছিল, কুচনাচ ছুর্গের কারাগারে তাঁহাকে ফেলিয়া

আসিবেন ; কিন্তু তাহা ঘটিল না। জনপথে হঠাৎ বড় উঠিল। গবর্ণর জানিতেন, টেল নৌচালনে বিশেষ দক্ষ, এই জন্য তাঁহাকে শৃঙ্খল-মুক্ত করিতে আদেশ দিলেন। টেল শৃঙ্খল-মুক্ত হইয়া অতিবেগে দাঁড় ফেলিয়া তরঙ্গমালা কাটিতে কাটিতে উপকূলভিমুখে উপস্থিত হইলেন। দূর হইতেই সেই বিরাট পুরুষ এক লক্ষ্যে ভীরে পতিত হইলেন। গবর্ণর, জলীয় অষ্টিয় অনুচরগণ সহ অতল জলে নিমগ্ন হইলেন। এদিকে সেই মহাপুরুষের পুনরাবির্ভাবে সকল ক্যান্টনই কয়েক ঘণ্টার মধ্যে বিদ্রোহী হইয়া উঠিল। অষ্টিয় সেনা পরাস্ত হইল, এবং শ্বইন্স জুর্গোপরি আবার জাতীয় পতাকা সগর্বে উড্ডীন হইল। উইলিয়ম্ টেলের অদ্ভুত অবদান-পরম্পরা জানেন না বোধ হয় এমন ইতিহাস পাঠক কেহ নাই। শ্বইজল গুপ্ত প্রতি ক্যান্টনে উইলিয়ম্ টেলের কীর্তিস্তম্ভ নিখাত আছে ; এবং সেই পার্শ্বতা প্রদেশের প্রতি অধিবাসীর হৃদয়-মন্দিরে তাঁহার স্মৃতি অদ্যাপি অতি ঘরে ও ভক্তিভাবে পবিত্রিত ও পরিপূজিত হইয়া থাকে। ধন্য বীর ! ধন্য তোমার স্বদেশানুরাগ !

জন্ হ্যাম্.ডেন্.

পাঠক, চল একবার শ্বেতদ্বীপে যাই। প্রাচীনতম আবাসভূমি ইংলণ্ডে কোন বীর সন্ন্যাসী জন্মিয়াছিলেন কি না, চল গিয়া সংবাদ লই। এই যে সম্মুখে এক পামাগময়ী প্রহিয়া বহিয়াছে, এ কোন্ দেবতার প্রতির্কাত ? কে যেন

উত্তর দিল “এ দেবমূর্তি নয়, নররূপী দেবতা জন্ হ্যাম্‌ডেনের প্রস্তরময়ী প্রতিমূর্তি । ঐ দেখ এই পাদপীঠ-বক্ষে কি খোদিত রহিয়াছে।” একবার পড়িয়া দেখ । ইহা তাঁহার জীবনের ইতিহাস । যাহা লিখিত আছে তাহার মূৰ্খ ও তৎসমালোচনা নিয়ে প্রদত্ত হইলঃ—

১৫৯৭ খ্রীষ্টাব্দে এই মহাপুরুষ লণ্ডন নগরীতে জন্ম গ্রহণ করেন । যখন প্রথম চার্লসের ছুর্কিবহ অত্যাচারে গ্রেট ব্রিটন জ্বালোড়িত হইতেছিল, যখন কেহই সাহস করিয়া তাঁহার কার্যের প্রতিবাদ করিতে সাহসী হন নাই, সেই সময় এই রাজনৈতিক সন্ন্যাসী জাতীয় স্বাধীনতা রক্ষার জন্য বন্ধ-পরিকর হইলেন । চার্লস অবৈধরূপে সকলের নিকট হইতে টাকা ধার করিতে লাগিল । কিন্তু হ্যাম্‌ডেন্‌ প্রতিজ্ঞা করিলেন, যে, তিনি প্রাণ থাকিতে টাকা ধার দিবেন না । ইনি তৎকালে হাউন্স অব কমন্সের একজন প্রতিভাশালী সভ্য ছিলেন । ইনি চার্লসকে দেখাইয়া দিলেন যে, প্রজার নিকট ঐরূপে টাকা ধার করা, ম্যাগ্না চার্টার * বিকৃত । ইহাতে চার্লসের রাগের আর সীমা রহিল না । “এত বড় স্পর্ধা যে, সামান্য প্রজা হইয়া রাজার কার্যের প্রতিবাদ করে ! রাজার সম্মুখে ম্যাগ্নাচার্টা আনিয়া তাঁহার গতি-রোধ করিতে চেষ্টা করে ! এরূপ ছুরাচারের—তাদৃশ পাপের—প্রায়শ্চিত্তের একমাত্র

* ১২১২ খ্রীষ্টাব্দের ১৫ই জুন তারিখে উইন্ডসর নগরের অনুরে রণীমুড়-ক্ষেত্রে ইংলণ্ডের জন্ সমবেত সামন্তবর্গকে এই ম্যাগ্নাচার্টা বা প্রধান বন্ধ-পত্র প্রদান করেন । এই বন্ধ-পত্রই ইংলণ্ডের স্বাধীনতার ভিত্তিভূমি এবং ইংরাজমাত্রেয়ই পূজার সামগ্রী ।

স্থান কারাগার’ । এই বলিয়া তিনি হ্যাম্‌ডেন্‌কে কারাগারে নিক্ষিপ্ত করিলেন । হ্যাম্‌ডেন্‌ কিছুকাল কারাগারে রহিলেন । কিন্তু তাঁহার বিরুদ্ধে কোন প্রমাণ না থাকায়, অগত্যা তাঁহাকে ছাড়িয়া দিতে হইল ।

স্বাধীনতা !—এ শব্দ হ্যাম্‌ডেনের শ্রবণে অতি মধুর । বহু-মূল্য হীরক অপেক্ষা ইহা তাঁহার নিকট অধিকতর মূল্যবান । কিন্তু তিনি নিজের ব্যক্তিগত স্বাধীনতার জন্য তত ব্যাকুল ছিলেন না । জাতীয় স্বাধীনতা—ধর্ম, নীতি, রাজনীতি, সমাজ-বিষয়ে জাতীয় মত-স্বাতন্ত্র্য—ইহার জন্য তাঁহার হৃদয়ের অনিয়ন্ত্রিত আকাঙ্ক্ষা । তিনি ইহারই রক্ষার জন্য যুদ্ধ করিতে, এবং প্রয়োজন হইলে সে যুদ্ধে প্রাণ বিসর্জন করিতেও প্রস্তুত ছিলেন ।

ডর্ভাগা চার্লস এ অন্তর্নির্গৃহিত বিশ্বব্যাপী জাতীয় ভাব বুদ্ধিতে পারিলেন না ; না বুঝিয়া অন্ধের স্তায় সেই জাতীয় ভাবপ্রোতের প্রতিকূলে দাঁড়াইলেন ; ভাবিলেন না যে, এক শতাব্দী পূর্বে অষ্টম হেনরী যাহা করিতে পারিয়াছিলেন, এক শতাব্দী পরে এখন তিনি তাহা করিতে গেলে বিফলপ্রযত্ন হইবেন ; ভাবিলেন না যে, রাজ্যসাগরে তরঙ্গ উঠিলে, রাজ-কীয় তরি তরঙ্গের প্রতিকূলে চালাইলে তাহা নিশ্চয় ডুবিবে ; ভাবিলেন না যে, এ সময় কমন্সগণের সঙ্গে মিটু না করিলে, তাঁহার আর রাজ্য-রক্ষার উপায়ান্তর নাই । এই সকল অগ্র-পশ্চাৎ না ভাবিয়া চার্লস উন্নতের স্তায় নিজ পথে চলিলেন । এই সময় তাঁহার সম্মুখীন হইয়া একথা বলে, হ্যাম্‌ডেন্‌ ভিন্ন, এমন বীরসন্ন্যাসী ইংলণ্ডে আর ছিলেন না । হ্যাম্‌ডেনের চক্ষু

দিয়া যেন রক্ত বাহির হইতে লাগিল । তাঁহার ললাট চিন্তায় আকুঞ্চিত হইল । তাঁহার অপ্রতিহত দৃষ্টি ভবিষ্য গগনে একখানি কাল মেঘ দেখিতে পাইল । তিনি দেখিলেন চার্লস এই উন্নত গতি হইতে যদি নিবৃত্ত না হন, প্রজার সহিত তাঁহার সংঘর্ষ অনিবার্য্য ; দেখিয়া তিনি স্পষ্টাক্ষরে চার্লসকে তাঁহার কার্য্যের দায়িত্ব বুঝাইয়া দিলেন ; বলিলেন, চার্লস যেৰূপ কার্য্য করিতেছেন তাহা ম্যাগনাচার্টার সম্পূর্ণ প্রতিকূলে । যদিও হ্যাম্‌ডেন্ জাতীয় স্বাধীনতা রক্ষার জন্ত রাজ-শরীরে অস্ত্র প্রহার করিতেও নঙ্কচিত ছিলেন না, তথাপি সেই ভাবী অমঙ্গল ভাবিয়া তাঁহার হৃদয় কাঁদিয়া উঠিল । উভয়দিক বাহাতে রক্ষা হয়, সেই জন্য সেই যোগী ঈশ্বরের নিকট এট বিনিয়া প্রার্থনা করিলেন “ঈশ্বর ! তুমি আমার জন্মভূমিকে রক্তপাত হইতে রক্ষা কর ; আমাদের রাজাকে তাঁহার ভ্রম দেখাইয়া দেও ; তাঁহার মন্ত্রিগণের হৃদয়কে সেই ভ্রান্ত পথ হইতে ফিরাইয়া আন ।” তাঁহার এই প্রার্থনা ঈশ্বর পূর্ণ করিলেন না । কিন্তু এই প্রার্থনায় তাঁহার চরিত্রের পবিত্রতা ও লক্ষ্মীর নিম্মলতা সুস্পষ্টরূপে পরিব্যক্ত হইল । বস্তুতঃ রাজ-তান্ত্রিকদলও তাঁহার বিরুদ্ধে কোন কথা বলিতে সাহস করেন নাই । বিনীত, সদানন্দ, সাহসী, একাগ্রচিন্ত, বাগ্মী, ও উদার-চরিত হ্যাম্‌ডেন্ সফল দলেরই পূজিত ছিলেন ।

রাজার বিরুদ্ধে অস্ত্রধারণ করিতে হইবে ভাবিয়া, হ্যাম্‌ডেন্ নিরতিশয় কাতর হইলেন । কিন্তু তিনি তাঁহার সূক্ষ্ম দৃষ্টিতে দেখিলেন, ইহা অনিবার্য্য । তিনি দেখিলেন, জাতীয় স্বাধীনতা অক্ষত রাখিতে হইলে, রাজবলি অপরিহার্য্য ।

এদিকে রাজার টাকার একান্ত অভাব হইয়া পড়িল। ধনাগার শূন্য, অথচ পার্লামেন্ট টাকা দিতে অস্বীকৃত। ইহাতে রাজা ক্রোধে উদ্ভূত হইয়া উঠিলেন। পূর্বকালে যখন দিনেমারেরা ইংলণ্ডের উপকূলে আসিয়া লুটপাট করিয়া সমস্ত লইয়া যাইত, সেই সময় ইংলণ্ডের উপকূলবাসী প্রজাবৃন্দকে কয়েক খানি রণতরি সুসজ্জিত করিয়া দিতে বাধ্য করিতেন। তাহারা রণতরির বিনিময়ে কিছু কিছু করিয়া কর দিত। ইহাকে “সিপ্‌মনি” বা জাহাজ-কর বলিত। যতদিন দিনে-মারদিগের উৎপাত থাকিত, ততদিনই এই কর আদায় করা হইত। এ নৈনিত্তিক করে রাজার সর্বস্বতোমুখী প্রভুতা ছিল। তিনি পার্লামেন্টের অনুমতি না লইয়া এই কর স্থাপন করিতে পারিতেন, এবং আপন ইচ্ছামত সে টাকা ব্যয় করিতেন। তাঁহাকে এ টাকার জন্য কাহারও নিকট জবাবদিহি করিতে হইত না। ১৬২৪ খ্রীষ্টাব্দের ২০ এ অক্টোবর লণ্ডনের অধিবাসিবৃন্দের উপর হঠাৎ রাজনান্যকিত এক পরওয়ানা বাহির হইল যে, ১লা নবেম্বরের মধ্যে তাঁহাদিগকে সর্বোপ-করণ সম্পন্ন সাত খানি রণতরি, লোকজনের ছয় মাসের বেতন সহ রাজার হস্তে সমর্পণ করিতে হইবে। নগরবাসিরা এক-বাক্যে ইহার প্রতিবাদ করিলেন। কিন্তু কে সে প্রতিবাদ শুনে? রাজা বধিরের স্থায় এই জাতীয় আপত্তি ও জাতীয় প্রতিবাদ কর্ণেও স্থান দিলেন না। নির্দিষ্ট সময়ে জাহাজ ও টাকা তাঁহার চাই-ই। এইরূপ পরওয়ানা উপকূলবাসী ও মধ্যপ্রদেশবাসী সকল প্রজাগণের উপরই জারি হইল। আবার আদেশ প্রচারিত হইল যে, জাহাজের পরিবর্তে টাকা দিতে

হইবে । প্রতি জাহাঙ্গীরের জন্ম ৩,৩০০ পাউণ্ড করিয়া দিতে হইবে । চতুর্দিকে উপদেশ পাঠান হইল যে, যাহারা টাকা না দিবে, তাহাদের যেন সম্পত্তি কোক হয় ।

এই বিশ্বজনীন বিপত্তিকালে হ্যাম্‌ডেন্ করদানে অস্বীকৃত হইলেন । যিনি স্বজাতির ও স্বদেশের মঙ্গলকামী, কারাগার তাঁহার সুখশয্যা, মৃত্যু তাঁহার স্বর্গদ্বার । হ্যাম্‌ডেন্ কারাগার ও মৃত্যু উপেক্ষা করিয়া রাজাজ্ঞার প্রতিবাদ করিলেন । ১০ টাকা মাত্র কর তাঁহার উপর ধার্য হইয়াছিল, ইহার জন্ম তিনি দেহ, প্রাণ, সম্পত্তি সমস্ত বিসর্জন দিতে প্রস্তুত হইলেন । কেন ? হ্যাম্‌ডেনের বিপুল সম্পত্তি থাকিতে যে কারণে তিনি পূর্বে রাজাকে টাকা ধার দিতে অস্বীকৃত হন, সেই একই কারণে আজ ১০ টাকা মাত্র সিপমনি কর দিতে অস্বীকৃত হইলেন । “রাজার এই টাকা ধার চাওয়া, ও এই কর-সংগ্রহ করায় জাতীয় স্বাধীনতার ভিত্তিভূমি ‘ম্যাগ্না চার্টার, প্রতিকূলাচরণ করা হইয়াছে’”—এই বলিয়াই তিনি বীরের ন্যায় তাহার বিরুদ্ধে দণ্ডায়মান হন । তিনি রাজার কার্যের অনুমোদন করিলে হয়ত ইংলণ্ডের প্রধানমন্ত্রিত্ব পদে অভিষিক্ত হইতে পারিতেন, কিন্তু জাতীয় স্বাধীনতার নিকট সে পদ তিনি তুচ্ছ মনে করিতেন । তিনি নিজ ব্যক্তিগত মঙ্গল, জাতীয় মঙ্গলে পূর্ণ আত্মত্যাগ দিয়াছিলেন বলিয়াই, আজ সে প্রলোভনে আকৃষ্ট হইলেন না । তিনি জাতীয় স্বাধীনতা-রক্ষার জন্য রাজপ্রাসাদ অপেক্ষা কারাগার সুখসেব্য মনে করিলেন । গ্রেট্‌ কিংসল প্রদেশের ত্রিশজন নিরুন্নতভোগী তাঁহার উজ্জ্বল দৃষ্টান্তের অনুবর্তন করিল । সুতরাং সম্রাসীর দল সংখ্যায় বাড়িয়া গেল ।

একস্বেচকর কোর্টে হ্যাম্‌ডেনের বিরুদ্ধে রাজপক্ষ হইতে নালিশ রুজু হইল। বার জন জজে বার দিন বসিয়া বিচার করিলেন। ‘যাহার অতুল সম্পত্তি সে বিশ সিলিঙ দিতে এত কাতর, ইহা অপেক্ষা অধিকতর লজ্জাকর আর কি হইতে পারে? হ্যাম্‌ডেনের উপর ২০ পাউণ্ড কর ধার্য্য করা উচিত ছিল’—রাজার উকিল হ্যাম্‌ডেনের প্রতি ইত্যাচার অনেক বাক্যবাণ প্রয়োগ করিতে লাগিলেন। কিন্তু সে বীরের হৃদয় বিচলিত হইবার নহে। কারণ টাকার পরিমাণ লইয়া তাঁহার আপত্তি নহে—এরূপ কার্য্য ইংলণ্ডের মূল বিধির বিরুদ্ধ বলিয়াই তাঁহার আপত্তি। সে অলজ্জা বিধির নিকট রাজারও মন্তক অবনত হওয়া চাই—ইহাই হ্যাম্‌ডেনের সঙ্কল্প। দেহ-সংশ্লিষ্ট মন্তক যদি অবনত না হয়, দেহ-বিচ্ছিন্ন মন্তক তথায় বিলুপ্তিত হইবে—ইহাই হ্যাম্‌ডেনের স্থির সিদ্ধান্ত।

জজেরা অধিকাংশই রাজার পক্ষ অবলম্বন করিলেন। জষ্টিস ক্রাউলে বলিলেন “রাজা রাখিতে হইলেই তাঁহাকে আপন ইচ্ছানুসারে আদায়ের ক্ষমতা দিতে হইবে। এ প্রভু-শক্তিবর্জিত রাজা হইতে পারে না, কারণ, তিনি সর্বোপরি প্রভুশক্তি।” অন্যতর জজ্ জষ্টিস বাক্লে’ বলিলেন যে “আইনে রাজাবে আবদ্ধ করিতে পারে না। আইন রাজার চির-বিশ্বাসিনী দাসী। প্রজা-শাসন করিবার জন্য ইহা রাজার প্রধান শাসন-বস্ত্র। আইন রাজা—এ কথা আমি কখন শুনি নাই—কিন্তু রাজ্যজ্ঞাই আইন—এই কথাই বরাবর শুনিয়া আসিতেছি—এবং ইহাই সত্য।” জষ্টিস ফিন্স বলিলেন “পার্লমেন্টীয় বিধি রাজার উপর খাটে না; যদিও প্রজার

ধন প্রাণ ও দেহের উপর ইহার সৰ্ব্বতোমুখী প্রভুতা আছে ।” এইরূপে বার জনের মধ্যে সাত জন জজ রাজার অনিয়ন্ত্রিত প্রভুতার স্বাপক্ষ্যে মত প্রদান করিলেন । এইরূপে তাঁহারা বিচার-স্বাধীনতা রাজপ্রসাদের নিকট বলি দিলেন । সামান্য চাকরির অনুরোধে তাঁহারা সতোর অপলাপ করিলেন । পাঁচ জন জজ হ্যাম্‌ডেনের অমুকূলে মত ব্যক্ত করিলেন । রাজা যে— আইনের উপরি—এ কথা তাঁহারা স্বীকার করিলেন না । প্রজার ধন সম্পত্তির উপরি যে তাঁহার সৰ্ব্বতোমুখী প্রভুতা, এবং তাঁহার কাণ্ডের ও ইচ্ছার নিয়ামক যে কিছুই নাই—এ মত তাঁহারা অশ্রদ্ধেয় বলিয়া প্রত্যাখ্যান করিলেন । কিন্তু হ্যাম্‌ডেনের প্রিতকূলে বিচারকের সংখ্যার বহুলতা ছিল বলিয়া, তাঁহাকে হারিতে হইল । কিন্তু এ হার তাঁহার পক্ষে প্রকৃত বিজয় । এ পরাজয়ে তিনি স্বজাতির হৃদয়মন্দিরে অতি উচ্চ আসন পাইলেন । সিপ্‌ননি-ষটিত ব্যাপারের পূর্বে অতি অল্প লোকেই হ্যাম্‌ডেনের নাহান্না জানিত । কিন্তু আজ ব্রিটনের এক প্রান্ত হইতে অপর প্রান্ত পয্যন্ত তাঁহার নাম প্রতিধ্বনিত হইতে লাগিল । তাঁহার যশ প্রতি গৃহে কীৰ্ত্তিত হইতে লাগিল । প্রতি জিহ্বা তাঁহার আন্দোলনে ব্যাপৃত হইল । যাহারা জানিত না, তাহারা অনুসন্ধান করিতে লাগিল এ মহাপুরুষ কে ? যিনি একরূপ নিজের দায়িত্বে স্বজাতির স্বাধীনতা ও ধন সম্পত্তি রক্ষা করিতে উদ্যত হইয়াছেন, এবং একরূপ অমিত-
 . সাহসে স্বদেশকে রাজার করাল গ্রাস হইতে মুক্ত করিতে কৃতসঙ্কল্প হইয়াছেন সে দেবতা কে ? এইরূপ প্রশ্ন ও প্রশ্নের উপরি উত্তর হইতে হইতেই সকলেই হ্যাম্‌ডেন্‌কে চিনিল ।

তখন ব্রিটনের আবাল বৃদ্ধ বনিতা উৎসুক নয়নে ইহাঁর দিকে তাকাইয়া রহিল। ইহাঁকে স্বদেশের উদ্ধারকর্তা জানিয়া সকলেই ইহাঁর উপর আত্মসমর্পণ করিল।

পরীক্ষার দিন ক্রমে নিকট হইয়া আসিল। হ্যাম্‌ডেন্ প্রভৃতি পাঁচ জন হাউস অব কমন্সের সভ্যকে চার্লস অভিযুক্ত করিলেন। কমন্সসভা বিচারের জন্য তাঁহাদিগকে রাজার হস্তে সমর্পণ করিতে অস্বীকৃত হইলেন। চার্লস প্রতিজ্ঞা করিলেন যে সশস্ত্র পুরুষ দ্বারা তাঁহাদিগকে বলপূর্ব্বক হাউস অব কমন্স হইতে গ্রেপ্তার করিয়া আনা হইবেন। তিনি স্বয়ং শতাধিক সশস্ত্র পুরুষ লইয়া হাউস অব কমন্সের অভিমুখে ধাবিত হইলেন। এ দিকে তাঁহার আসিবার পূর্বেই অভিযুক্ত ব্যক্তির সন্নিবিষ্ট পড়িয়াছিলেন; সুতরাং পার্লামেন্টে গিয়া তিনি নিতান্ত ক্ষুব্ধচিত্ত হইলেন। তিনি উপস্থিত সভ্যগণকে লক্ষ্য করিয়া বলিলেন—“আমি দেখিতেছি পিঞ্জরস্থ পক্ষিগণ উড়িয়া গিয়াছে। এক্ষণে আশা করি, পাখিগুলি ফিরিয়া আসিলে, আপনারা তাহাদিগকে আনার নিকটে পাঠাইয়া দিবেন।” পার্লামেন্ট সভা নীরবে রাজার এই উন্নত-প্রলাপ শুনিলেন, কোন উত্তর দিলেন না। তাঁহারা অত্যন্ত ক্ষুব্ধিত ক্রোধান্বিত অতি কষ্টে সংব্রমিত করিলেন। কিন্তু যখন চার্লস গৃহ-বহির্ভূত হইলেন, তখন তাঁহাদিগের হৃদয় ভেদ করিয়া শব্দ উঠিল, “অধিকারে হস্তক্ষেপ!—অধিকারে হস্তক্ষেপ!” এই ঘটনার পরে তাঁহারা সভাভঙ্গ করিয়া চলিয়া গেলেন। আর সে পুরাতন সভাগৃহে তাঁহারা বসিলেন না। এখন ইহঁতে রাজধানীর অভ্যন্তরে একটি বাটীতে সভার অধিবেশন হইতে লাগিল।

চার্লস নিরস্ত হইবার নহেন। তিনি রাজধানীর ভিতর দিয়া সেই পক্ষ সভ্যের গ্রেপ্তারের জন্য কমন্স সভার অভিযুগে ধাবিত হইলেন। পথে প্রজারা সম্মুখে বলিতে লাগিল ‘ধিক্ সে রাজায় ! যে প্রজার স্বত্বে হস্তক্ষেপ করে।’ দশ দিকে প্রতি ধ্বনি উঠিল, ‘ধিক্ সে রাজায় ! যে প্রজার স্বত্বে হস্তক্ষেপ করে।’ সকলেই একবাক্যে উচ্চৈঃস্বরে বলিতে লাগিল— ‘স্বাতক-হস্তে কারাগারের ভার্য্যাণ, দুর্গের সুদৃষ্টীকরণ—এ সকল দেখিয়া আমাদের মনে ভয়ের সঞ্চার হইতেছে। রাজা প্রজাদিগের এই সকল ধিকারে ও ক্রন্দনে কর্ণপাত না করিয়া, অভীষ্ট প্রদেশে গমন করিতে লাগিলেন। এই উপেক্ষায় প্রজাদিগের অন্তর্নিগূহিত বিদ্রোহানল প্রজ্বলিত হইয়া উঠিল। নাবিক, দোকানদার, ভদ্রলোক—সমস্ত নগরবাসী রাজবিরুদ্ধে অভ্যুত্থিত হইল ; সকলেই ঐ পক্ষ সভ্যকে ঘিরিয়া দাঁড়াইল। সকলেই রাজার সম্মুখে উচ্চৈঃস্বরে হ্যাম্‌ডেনের বশোগান করিতে লাগিল। ক্রোধে ও অভিনানে চার্লস ফিরিয়া গেলেন ; কিন্তু প্রতিজ্ঞা করিলেন যে, যদি তাঁহার সাধ্যাতীত না হয়, তাহা হইলে হাউস্ অফ্ কমন্স সভাকে তিনি পদ-দলিত করিবেন। চার্লসের এ প্রতিজ্ঞা পূর্ণ হইল না। ইহার পরিবর্তে তাঁহাকে অবনত মস্তকে পক্ষ সভ্যের বিরুদ্ধে অভিযোগ তুলিয়া লইতে হইল ; এবং রাজবেশে তাঁহাকে আর লগুনে ফিরিয়া আসিতে হইল না। তিনি আর এক দিন লগুনে প্রবেশ করিয়াছিলেন বটে, কিন্তু সে রাজবেশে নহে—কারাবাসীর বেশে। কমন্স সভার সহিত রাজার বিবাদ শীঘ্র মিটিবার নহে। এক্ষণে উভয় পক্ষ হইতে

বৃথা বাক্যব্যয় পরিত্যক্ত হইল । উভয় পক্ষ বুঝিলেন যে আর এক সঙ্গে রাজত্ব করা সম্ভব নহে । রাজা ও পার্লামেন্ট মিলিত হইয়া আর ইংলণ্ডের শাসন করিতে সক্ষম নহেন । এক্ষণে অন্যতরের কাহার রাজত্ব থাকিবে, প্রবলতরের শক্তি তাহার মীমাংসা করিবে ।

কমনস সভা স্মৃতিরাং সৈন্ত সংগ্রহ আরম্ভ করিলেন । হ্যাম্‌ডেন্ সর্কাগ্রে সৈনিক-পদে ব্রতী হইলেন । তিনি পদা-তিক সেনাদলের কর্ণেল পদে অভিষিক্ত হইতে স্বীকৃত হইলেন, এবং যুদ্ধের ব্যয় নিকাঁহার্থে স্বয়ং ২৪,০০০ টাকা প্রদান করিলেন । ধন্য হ্যাম্‌ডেন্ ! ধন্য তোমার আত্মত্যাগ ! ধন্য তোমার স্বদেশানুরাগ !

১৬৪৩ খ্রীষ্টাব্দে, জুন মাসে হ্যাম্‌ডেন্ এক দল ভলন্টিয়ার সৈন্ত লইয়া কুমার রুপার্টের অনুসরণে যাত্রা করিলেন । ম্যাগ্নেভ রণক্ষেত্রে তিনি সসৈন্য কুমারের সম্মুখীন হইলেন । উভয়ের মধ্যে তুমুল সংগ্রাম বাধিল । যুদ্ধের প্রারম্ভেই একটি গুলি আসিয়া হ্যাম্‌ডেন্‌কে আহত করিল । তাহার সেনা এই ঘটনায় ভগ্নদয় হইয়া রণে ভঙ্গ দিয়া পলায়ন করিল । কুমার তাহাদিগের অনুসরণে কিয়দূর গিয়া বিফল-প্রযত্ন হইলেন, এবং সেহ পার হইয়া অক্সফোর্ডে প্রত্যাবৃত্ত হইলেন ।

এ দিকে বীরবর হ্যাম্‌ডেন্ অশ্বপৃষ্ঠে ধীরে ধীরে যুদ্ধক্ষেত্র হইতে অপসৃত হইলেন । তাহার হস্ত ক্রমে অবশ হইয়া অশ্বপৃষ্ঠে লুপ্ত হইতে লাগিল, দেহ ক্রমে ক্ষীণ হইতে ও ক্ষীণতর হইতে লাগিল ।

যে অট্টালিকায় তাঁহার শ্বশুর বাস করিতেন, যে অট্টালিকা হইতে তিনি প্রিয়তমা ভার্যা এলিজাবেথকে বিবাহ করিয়া আনিয়াছিলেন, অদূরে সেই অট্টালিকা দেখা যাইতেছিল। বড় সাধ, তথায় গিয়া জীবনের শেষ দিন অতিবাহিত করেন, কিন্তু সে সাধ পূরিল না—শত্রুসৈন্য সেই পথ অবরুদ্ধ করিয়া রাখিয়াছে। তিনি দেম্ অভিযুখে অশ্ব ফিরাইলেন, তথায় আসিয়া যখন পহঁছিলেন—তখন তিনি যাকনায়ে প্রায় বাস্ত-জ্ঞান-রহিত। দেশের উদ্ধারসাধন করিতে পারিলাম না ভাবিয়া, তাঁহার হৃদয় ফাটিয়া যাইতে লাগিল। কিন্তু সেই মুমূর্ষু অবস্থাতেও আশা তাঁহাকে পরিত্যাগ করে নাই! তিনি ভাবিলেন—“আমি মরিলান, তাহাতে দুঃখ কি? সহস্র সহস্র হ্যাম্‌ডেন্ জীবিত রহিলেন—মায়ের কার্য্য তাঁহারাই উদ্ধার করিবেন।” এই আশায় প্রোৎসাহিত হইয়া হ্যাম্‌ডেন্ সেই মৃত্যুশয্যায় পত্র লিখিয়া বৈপ্লবিক অধিনায়কদিগের নিকটে বিদায় চাহিলেন ও কিরূপে জাতীয় সমর চালাইতে হইবে, তদ্বিষয়ে তাঁহাদিগকে উপদেশ দিলেন। পত্র লেখা সমাপ্ত হইল—আর সেই হস্ত নিষ্পন্দ হইল! সে দেহে আর চৈতন্য রহিল না। বেশী জীবনের কার্য্য সমাপ্ত হওয়ায়, সেই চৈতন্য-মূর্ত্তি এ পাপ পৃথিবী পরিত্যাগ করিয়া বৈকুণ্ঠধামে গমন করিলেন। চতুর্দিকে গগন বিদারিয়া হাহাকার ধ্বনি উঠিল! ইংলণ্ডের আবাল বৃদ্ধ বণিতা হ্যাম্‌ডেনের শোকে অতিভূত হইয়া পড়িল।

ইংলণ্ডের অধিবাসিগণ হ্যাম্‌ডেন্‌কে বীরোচিত সমাধি প্রদান করিলেন। জাতীয় সৈন্যদল বেরনেট্ অবনত করিয়া

তাহার মৃতদেহ সমাধি-নিহিত করিল। প্রত্যেক সৈনিক পুরুষ হ্যাম্‌ডেনের উজ্জল দৃষ্টান্তে উদ্দীপিত হইয়া প্রত্যেকে হ্যাম্‌ডেনের আত্মাকে সাক্ষী করিয়া মাতৃভূমির চরণে আত্ম-সমর্পণ করিল। তাহার পরে, তাহারা ঈশ্বরের মহিমা ও হ্যাম্‌ডেনের যশোগান কীর্তন করিতে করিতে সমাধিস্থল হইতে ফিরিয়া আসিল। ধন্য বীর, ধন্য! তুমি মরিয়াও অমরত্ব লাভ করিলে। তুমি মরিলে বটে, কিন্তু তোমার দৃষ্টান্তে ইংলণ্ডে সহস্র সহস্র হ্যাম্‌ডেন্‌ আবির্ভূত হইল। তুমি ভগ্ন-হৃদয়ে গমন করিলে বটে, কিন্তু তোমার আরক্ত কার্য্য তোমার শিষ্যেরা সম্পন্ন করিল। তুমি এ যজ্ঞে আত্মবলি না দিলে, কখন এ যজ্ঞ সমাপ্ত হইত না। যে হুর্ম্মদ চার্লস তোমার কেশস্পর্শ করিতে গিয়াছিল, ঐ দেখ, তাহার কাটামুও ভূমিতে গড়াগড়ি যাইতেছে। যে ইংলণ্ডের স্বাধীনতার জন্য তুমি প্রাণ দিয়াছিলে, ঐ দেখ সেই ইংলণ্ড আজ স্বাধীন, উন্মুক্ত, এবং উজ্জল ও নববাসে বিভূষিত। আজ সাধারণতন্ত্রী ইংলণ্ডের প্রতাপে মেদিনী কম্পমান। যে মুর্থ, সেই বলে—মহাপুরুষের মৃত্যু হয়; না—মহাপুরুষের মৃত্যু নাই। তিনি অমর ও তাহার কীর্তি অনন্তকালস্থায়িনী!

বিশ্বপ্রেম ও বিশ্বপ্রেমিক উইলবার্‌ফোর্স,
হাউয়ার্ড ও রমিলী।

যে দেশে স্বজাতি-প্রেম ও স্বদেশাত্মরাগের কার্য্য পরিস-
মাপ্ত হয়, সেখানে বিশ্বপ্রেম ও বিশ্বনাগরিকতার কার্য্য আরম্ভ

হয় । উন্নতিশীল মন গতিপ্রবণ । সে কোন স্থানেই স্থির
 হইয়া থাকিতে পারে না । ক্রমেই অগ্রসর হইতে থাকে, এবং
 অগ্রসর হইতে হইতে ক্রমে কার্য্যপরিধি বাড়াইয়া লয় । আপন
 হইতে পরিবার, পরিবার হইতে আত্মীয় স্বজন, আত্মীয় স্বজন
 হইতে স্বদেশ ও স্বজাতি, স্বদেশ ও স্বজাতি হইতে সমস্ত
 পৃথিবী ও মানবজাতি, মানবজাতি হইতে প্রাণিজগৎ—ক্রমেই
 তাঁহার প্রেমের বিষয় হইয়া দাঁড়ায় । হৃদয় প্রশস্ত হইতে
 ক্রমেই প্রশস্ততর হইয়া এই ক্রম অবলম্বন করে । প্রাণি-
 জগৎ পর্য্যন্ত কেবল শাক্যসিংহ প্রভৃতি কতিপয় আৰ্য্য ঋষি
 উত্তীরাছিলেন।--‘না হিংসা সৰ্ব্বভূতানি।’ “সৰ্ব্বভূতেসু
 সমদৰ্শী”—সৰ্ব্বভূতে অহিংসা ও সমদৰ্শিতা—ভারত ভিন্ন
 এ প্রকাণ্ড নীতি আর কোন দেশ শিক্ষা দিতে পারে
 নাই । কিন্তু মানবজাতির প্রতি প্রেম অনেক দেশ শিক্ষা
 দিয়াছে । মানবজাতির জন্ত অধুনাতন সকল দেশ অপেক্ষা
 ইংলণ্ড অধিক করিয়াছেন ও অধিক ভাবিয়াছেন । কারণ,
 ইংলণ্ডে স্বদেশানুরাগ ও স্বজাতিপ্রেমের প্রধান প্রধান কার্য্য
 অনেক দিন পরিসমাপ্ত হইয়াছে । ব্যক্তিগত ও জাতিগত
 স্বাধীনতার পূর্ণতায় ইংলণ্ড জগতের আদর্শ । ইংলণ্ড—ইউ-
 রোপ ও আমেরিকার রাজনৈতিক শিক্ষাগুরু । ইংলণ্ড
 ছাড়িয়া যাইবার পূর্বে তথায় মানবপ্রেম ও জগদনুরগের কি
 কি কার্য্য হইয়াছে, কোন্ কোন্ সন্ন্যাসী সেই মহৎ যজ্ঞে আত্ম-
 আভিতি প্রদান করিয়াছেন—এই সকল বিষয়ে কিছু আলোচনা
 করিব । আমরা তিন জন মাত্র সন্ন্যাসীর জীবনী অঙ্কিত করিব ।
 বিশ্বপ্রেমিকের জীবন অতি মহৎ । বিশ্বপ্রেমিকের জীবনের

ব্রত দেবতারও অনুকরণীয় । যাহাকে সকলে অশ্রদ্ধা বা অবহেলা করে, তাহার জন্ত ভাবিব; যে উৎপীড়িত বুক দিয়া তাহাকে রক্ষা করিব; যাহাকে সকলে নির্গাতন করিতেছে, তাহাকে আশ্রয় দিব; যে কষ্ট পাইতেছে তাহার কষ্ট নিবারণ করিব, যে শোক পাইয়াছে, তাহাকে সাহসনা দিব, তাহার অশ্রুজল মুছাইব; যে অসহায়, তাহার সহায় হইব; যে পড়িয়া যাইতেছে, তাহাকে ধরিয়া তুলিব; যে দুর্বল, তাহার বলবৃদ্ধি করিব; যে জাতি পদদলিত, তাহা পক্ষ সমর্থন করিব—যে মহাপুরুষ দেশ, জাতি, বর্ণ, ধর্ম প্রভৃতি প্রভেদ ভুলিয়া সকলের প্রতি সমভাবে এই সকল কার্য্য কবিত্তে পারেন, তিনি দেবতার দেবতা । কারণ, স্বজাতিপ্রেমিক আমাদের উপাস্য দেবতা । বিশ্বপ্রেমিক সে দেবতাবও দেবতা । যেমন পারিবারিক প্রেম স্বজাতি প্রেমের একটি ক্ষুদ্র অংশমাত্র, সেইরূপ স্বজাতিপ্রেমও বিশ্বপ্রেমের একটি সামান্য ভগ্নাংশমাত্র । মানব হৃদয়ের উত্তিবার এই তিনটী ক্রম । এক একটীতে সিদ্ধি না হইলে, অপরটীতে উত্তিবার অধিকার জন্মে না । ইংলও স্বজাতিপ্রেমের উৎকর্ষ দেখাইয়াছেন বলিয়াই, ঠাহার সেই সর্বোচ্চ ক্রমে যাইবার অধিকার জন্মিয়াছে । এই জন্যই ইংলণ্ডকে জগতের শিক্ষা-গুরু বলিয়া মনে করি । এই জন্যই ইংলণ্ডে অনেক বিশ্বপ্রেমিকের আবির্ভাব দেখিতে পাওয়া যায় । আমরা এখানে কেবল তিন জনমাত্র বিশ্বপ্রেমিকের চিত্রিত করিব—উইনবারফোর্স, হাউয়াড ও রোমিলী ।

উইল্‌বার্‌ফোর্স ও দাসত্ব প্রথা ।

বহুকাল হইতে জগতে দাসত্বপ্রথা চলিয়া আসিতেছে । সকল দেশেই কোন না কোন প্রকারে এই প্রথার অস্তিত্ব দেখিতে পাওয়া যায় । ইহা লইয়া মধ্য মধ্য অনেক আন্দোলন হইয়া গিয়াছে সত্য, কিন্তু প্রকৃত প্রস্তাবে ইহা তুলিয়া দিবার চেষ্টা কেবল ইংলণ্ড ও আমেরিকাতেই হইয়াছে । স্পার্টার হেলট্, রোমের গ্রাডিএটর, ও আধুনিক নিগ্রো দাসদিগের অবস্থা পর্যালোচনা করিলে, পানাগও বিগলিত হয় । মানুষ স্বার্থে অন্ধ হইলে, কি ভীষণ পৈশাচী মূর্তি ধারণ করিতে পারে এই দাস-প্রভুগণ তাহার নিদর্শন ।

১৪৪০ খ্রীষ্টাব্দে এন্থনী গার্সালেজ নামক এক জন পটু গিজ্ কাপ্তেন আফ্রিকার উপকূলে বাণিজ্যার্থ যাইয়া সাহারার প্রবেশপথ হইতে কয়েক জন মুরকে ধরিয়া আনিয়া দাসরূপে পরিণত করেন । দুই বৎসর পরে যুবরাজ হেনরী এই সংবাদ শুনিতে পান । তিনি পূর্বোক্ত কাপ্তেনকে তৎক্ষণাৎ আদেশ করেন, ‘উহাদিগকে যথাস্থানে রাখিয়া আইস ।’ কাপ্তেন তাহাদিগকে ফিরিয়া লইয়া যাওয়ায় মুরেরা তাঁহার প্রতি সন্তুষ্ট হইয়া তাঁহাকে স্বর্ণচূর্ণ ও দশ জন নিগ্রো উপহার দেয় । তিনি তাহাদিগকে লইয়া আসিয়া দাসরূপে পরিণত করেন । এইরূপে নিগ্রো দাসত্বের উৎপত্তি হয় ।

যখন স্পেনীয়েরা প্রতীচ্য দ্বীপ দখল করে, তখন খনি খনন ও কৃষিকার্য্য করণাদির জন্ত তাহাদিগের শ্রমজীবীর প্রয়োজন হইয়া উঠে । তাহারা দেখিল, আফ্রিকা উপকূল হইতে দাস আনিয়া এই কার্য্য সম্পন্ন করা সৰ্ব্বাপেক্ষা সহজ ও সুলভ ।

১৫০৩ খ্রীষ্টাব্দে পটু'গিজেরা স্পেনীয় উপনিবেশ সকলে দাস বিক্রয় করিয়া আইসে। তৎপশ্চাৎ স্পেনীয় বণিকেরা অধিক ত্বর লাভজনক দেখিয়া স্বয়ং এই দাস-ব্যবসারে প্রবৃত্ত হন। স্বর্ণচূর্ণ আনিতে তাহারা পূর্ষ হইতেই গিনি উপকূলে যাইত, কিন্তু এক্ষণে স্বর্ণচূর্ণ-ব্যবসায় ততদূর লাভজনক নহে দেখিয়া, তাহারা অধিকতর লাভকর দাস ব্যবসায় আরম্ভ করিল। ক্রমে গবর্ণমেন্ট ও আইন দ্বারা ইহার বৈধতা সম্পাদন করিলেন। অনবরত জাহাজে করিয়া বোঝাই হইয়া নিগ্রো দাস সকল আমেরিকায় চালিত হইতে লাগিল। হতভাগ্যগণের অশ্রুজলে আটলান্টিক-বক্ষ ভাসিয়া গেল। ১৫১৭ খ্রীষ্টাব্দে সম্রাট্ পঞ্চম চার্লস এক ব্যক্তিকে বৎসরে বৎসবে ৭,০০০ করিয়া নিগ্রো দাস হিস্পানিওয়ালা, কিউবা ও জামেকা, এবং পোর্টরিকোতে লইয়া যাইবার জন্য একচেটির পাট্টা দিলেন। তাঁহাকে ইহাব জন্য পরে অনুতাপনলে দণ্ড হইতে হইয়াছিল। কিন্তু তাহাতে কিছু ফল ফলে নাই। বীজ বপন করা যত সহজ, সেই বীজ দূরপ্রাপ্তিমূল বৃক্ষরূপে পরিণত হইলে, তাহা ছেদন করা তত সহজ নহে। ফরাসিরাও ত্রয়োদশ লুই ও 'ঈশ্বরের মহিমা বিস্তার ও নিগ্রোদিগের মঙ্গলের ব্যপদেশে' দাসত্ব ব্যবসায় বিধিবদ্ধ করিয়াছিলেন! রাজ্ঞী এলিজাবেথের সময় ইংরেজেরা সন্দেহ প্রথমে এই ব্যবসাতে প্রবৃত্ত হন। সার্জন হাকিংস সর্ব প্রথম দাস-ব্যবসায়ী। তিনি এলিজাবেথের নিকটে প্রতিশ্রুত হন যে, যে নিগ্রো দাস হইতে আপত্তি করিবে, তিনি তাহার গাত্রস্পর্শ করিবেন না। কিন্তু তিনি সে প্রতিজ্ঞা রক্ষা করেন নাই। অচিরকাল-মধ্যে তিনি অসংখ্য নিগ্রোকে বলপূর্বক

জাহাজে প্রেরণ করিতে লাগিলেন । অন্যান্য জাতি অর্থ দ্বারা রাজি করিয়া নিগ্রোকে দাস করিয়া লইয়া যাইত, কিন্তু ইংরেজেরাই সর্ব প্রথমে দাস্যবৃত্তি আরম্ভ করিলেন । বল-পূর্ব্বক নিগ্রোদিগকে ধরিয়া লইয়া যাইবার প্রথায় তাঁহারা ই পথদর্শক হইলেন । এই প্রথা ক্রমেই অতি ভীষণ আকার ধারণ করিল । ষ্টুয়ার্টবংশের রাজ্যকালে প্রতীচ্য দ্বীপপুঞ্জের প্রত্যেক হাটে নিগ্রো দাস পণ্য দ্রব্যের ন্যায় বিক্রীত হইত ।

গুনিয়া পাঠকগণ বিস্মিত হইবেন যে, ১৭০০ হইতে ১৭৮৬ খ্রীষ্টাব্দের মধ্যে ব্রিটন্ শুদ্ধ জামেকাদ্বীপে ৬,১০,০০০ দাস প্রেরণ করেন ; ১৬৮০ হইতে ১৭৮৬ খ্রীষ্টাব্দ পর্য্যন্ত ব্রিটিশ উপনিবেশ সকলে ২১,৩০,০০০ দাস প্রেরিত হয় । ১৭৭১ খ্রীষ্টাব্দে যখন এই জঘন্য ব্যবসায় ইহার চরম সীমায় উপনীত হয়, সেই বৎসরেই ১৯২ খানি ইংরাজ বাণিজ্যতরী ৪৭,১৪৬ জন নিগ্রো দাস লইয়া আমেরিকায় গমন করে !! ১৭৯৩ খ্রীষ্টাব্দের তালিকা গ্রহণ করিয়া দেখিতে পাই, সমস্ত ইউরোপ বৎসরে ৭৪,০০০ হাজার করিয়া নিগ্রোকে দাসত্ব-শৃঙ্খলে আবদ্ধ করিতেন ; তাহার মধ্যে একা ইংরাজ বাহাদুরই ৩৮,০০০ হাজার করিয়া আমদানি করিতেন । যাহাঁর হৃদয়ে বিন্দুমাত্র দয়া আছে, যাহার কণা-বাত্ত মনুষ্যত্ব আছে, এমন কোন্ ব্যক্তি এই কথা গুনিয়া লজ্জায় মুগ্ধ না লুকাইবেন ? মানবকূলে এমন কোন্ ব্যক্তি আছেন, যাহার এই কথা গুনিয়া আপনাকে মানুষ বলিয়া পরিচয় দিতে মাথা কাটা না পড়িবে ? উপরে যে সংখ্যাবলী প্রদান করিলাম, তাহা কাহারও কল্পনা নহে, সাম্যবাদিগণের অতিরঞ্জিত চিত্র নহে ; দাস-প্রভুগণের প্রদত্ত দাস-তালিকা—মানবজাতির

অকালনীয় কলঙ্কের অসন্দিগ্ধ কীর্তিধ্বজা! ধিক্ মানব!
তোমার অসাধ্য কিছুই নাই। ধিক্ ইউরোপ!! শত ধিক্
তোমায় ইংলণ্ড!!

ইংলণ্ডের পাপের ভরা পূর্ণ হইল দেখিয়া, কয়েক জন
মনীষীর হৃদয় কাঁদিয়া উঠিল। শার্প, উইলবার্ফোর্স, ব্র্যাম,
বক্‌স্টন প্রভৃতি মনীষিগণ স্বদেশের ও স্বজাতির এই গুরুতর
পাপের প্রায়শ্চিত্ত করিবার জন্য কৃতসঙ্কল্প হইলেন। ইহারা
প্রতিজ্ঞা করিলেন যে, যে কোন প্রকারে ইংলণ্ড হইতে দাসত্ব-
বাবসায় উঠাইয়া দিয়া ইংলণ্ডকৃত পাপের কথঞ্চিৎ প্রায়শ্চিত্ত
করিবেন। উইলবার্ফোর্স এই মনীষিগণের অধিনায়ক
মনোনীত হইলেন। এই কার্য্য সিদ্ধ করিতে এই মহাপুরুষ
আপনার সমস্ত জীবন ব্যয় করিয়াছিলেন। এইস্থানে আমরা
সেই ঋষি-প্রবরের জীবনের গুটিকত ঘটনা উল্লেখ করিব।

উইলবার্ফোর্স।

এই মহাত্মা ১৭৫৯ খৃষ্টাব্দের শরৎকালে ইংলণ্ডের অন্তর্গত
হল নগরে জন্মগ্রহণ করেন। দশম বৎসরে পদার্পণ না করিতেই
তাহার পিতার পরলোক-প্রাপ্তি হয়। পিতার মৃত্যুর পর তিনি
পিতৃব্যের ঘরে লালিত পালিত হন। তিনি কালেজ ছাড়িয়াই
একবিংশতি বৎসর বয়সের সময় হল নগরের প্রতিনিধিরূপে
পার্লিমেণ্টে প্রবিষ্ট হন। কেম্ব্রিজ বিশ্ববিদ্যালয়ে অধ্যয়নকালে
নব্বি-প্রবর পিটের সহিত তাহার সখ্য সংস্থাপন হয়। পার্লে-
মেণ্ট-কার্য্যক্ষেত্রে আসিয়া তাহাদের সেই সখ্য দৃঢ়ীভূত হয়।
উইলবার্ফোর্সের স্বাভাবিকী প্রতিভা নিরন্তর পরিমার্জনে

অধিকতর পরিপুষ্ট ও পরিবর্দ্ধিত হইয়াছিল । তিনি বাণ্ঠিক বলিয়া বিশেষ প্রতিপত্তি লাভ করিয়াছিলেন । সুতরাং হাউস অব্‌ কমন্সে তাঁহার প্রতিষ্ঠা দিন দিন বাড়িতে লাগিল । তিনি বৈধিক সংস্কার-কার্য্যে মন্ত্রিপ্রবর পিটের প্রধান হস্তাবলম্বন হইয়াছিলেন ।

১৭৮৭ খ্রীষ্টাব্দে দাসব্যবসায়-সম্বন্ধে তাঁহার চিন্ত আকৃষ্ট হয় । এই সময় মৃত্যুকাল পধ্যস্ত তিনি সন্ন্যাসী । নিজে স্বথ, নিজের দুঃখ ও নিজের সৌভাগ্যে তিনি পূর্ণ উদাসীন ছিলেন । কি নিদ্রায়, কি জাগরণে, কি গৃহে, কি বাহিরে—তাঁহার মনে এই একই সৰ্ব্ব-গ্রাসিনী চিন্তা—কেমন করিয়া ইংলণ্ডের অক্ষালনীয় কলঙ্কের অপনয়ন করিবেন, কেমন করিয়া দাস-ব্যবসায় উঠাইয়া দিবেন । তিনি দেখিলেন, দাস-ব্যবসায় ইংলণ্ডের অমল ধবল যশে গভীর কলঙ্ক-রেখা । তিনি দেখিলেন, এই প্রথা ষাকিতে ইংলণ্ডের স্বাধীনতা-শ্রিয়তা জগতের পরিহাসোদ্দীপক । অসংখ্য দাসপতি অগণ্য মূর্খা দিয়া লক্ষ লক্ষ দাস ক্রয় করিয়াছেন, তাহাদের পরিশ্রমে অতুল সম্পত্তির ঈশ্বর হইয়াছেন—এক্ষণে কেমন করিয়া তাঁহাদিগকে এ লাভকর বাণিজ্য হইতে নিরস্ত করেন—ভাবিয়া ভাবিয়া—নিরস্তর ভাবিয়া, তাঁহার তনু ক্ষীণ হইল । তথাপি তাঁহার একই সঙ্কল্প । কি রূপে ইহা সংস্কৃত করিবেন—তাহা জানেন না, অথচ এই লক্ষ্য সংসাধনে তিনি নিজ জীবন উৎসর্গ করিলেন । অবিচলিত, স্মৃদ্ধ ও একাগ্র চিত্তে তিনি এই কঠোর তপস্যায় নিমগ্ন হইলেন । সেই বহুকাল-ব্যাপী তপস্যায় তিনি যে ধৈর্য্য,

হৃদয়দর্শিতা ও সংসাহস প্রকটীকৃত করিয়াছিলেন, তাহাতে ইংলণ্ড বিন্মিত ও মুগ্ধ হইয়াছিলেন। ১৭৮৯ খৃষ্টাব্দে তিনি সর্বপ্রথমে পার্লামেন্টে এই প্রস্তাব অবতারণ করেন। তিনি প্রতিবার প্রস্তাব করিতেছেন, প্রতিবার তাঁহার প্রস্তাব প্রত্যাখ্যাত হইতেছে। কিন্তু সেই নিঃস্বার্থ বিশ্বপ্রেমিক কিছুতেই ভীত বা বিচলিত হইবার নহেন। প্রোভুঙ্গ হিমা-চলের ন্যায় তিনি অটলভাবে সমস্ত আপত্তি-ঝটিকা সহিতে লাগিলেন। বৎসর বৎসর তাঁহার প্রস্তাব উন্মত্ত-প্রলাপ বলিয়া প্রত্যাখ্যাত হইতে লাগিল। অথচ সে যোগীর ধ্যান ভঙ্গ হইল না। সাগরগামিনী শ্রোতস্বিনীর গতির ন্যায় অভিলষিত বিষয়ে কৃতসঙ্কল্প মনের গতিকে কে রোধ করিতে পারে? এক এক করিয়া ক্রমে বিশ বৎসর অতীত হইল। এ ঘোর তপস্যা পার্লামেন্ট আর সহিতে পারিলেন না। এই তপস্যানলে ক্রমে পাবাণ গলিয়া জল হইল। যে নয়ন এত দিন শুষ্ক ছিল, আজ তাহা হইতেও অবিরল বারি-ধারা পড়িতে লাগিল। উইলবারফোর্স কাদিয়া কাদিয়া--অবিরাম কাদিয়া--শেষে পার্লামেন্টকে কঁাদাইলেন। এত দিনে পার্লামেন্টের চৈতন্য হইল, তাঁহারা কি কুঁকাজ করিয়া আসিয়াছেন; দাস-ব্যবসায়ের অল্পমোদন করিয়া তাঁহারা কি দূরপন্থ্য কলঙ্কের অংশভাগী হইয়া আসিয়াছেন; আজ তাঁহাদের পাপ তাঁহারা বুঝিতে পারিয়াছিলেন বুঝিয়া তাহার উপযুক্ত প্রায়শ্চিত্ত করিতে কৃতসঙ্কল্প হইলেন। ব্রিটিশ সাম্রাজ্যে যত দাস ছিল, পার্লামেন্ট দাস-প্রভুদিগের নিকটে সমস্ত কিনিয়া লইয়া, তাহাদিগকে পূর্ণ মুক্তি দিলেন; আর

ভবিষ্যতের জন্য বিধান করিলেন, যে ব্রিটিশ সাম্রাজ্যে আর
বেহ কখন দাস ক্রয় করিতে পারিবে না । যেমন পাপ, তেম-
নই প্রায়শ্চিত্ত ! প্রায়শ্চিত্তে জগৎ বিমুক্ত হইল । জাতীয় আত্ম-
ত্যাগেব এরূপ দৃষ্টান্ত জগতে আর কখন দেখা যায় নাই ।
এক উইলবার্ফোর্সের আত্মত্যাগের দৃষ্টান্তে সমস্ত ইংলণ্ড
আত্মবিসর্জন শিখিল । এক জনের কঠোর তপস্যায় সমস্ত
পারলমেন্ট সভা সন্ন্যাসি-সমিতিতে পরিণত হইল । যে জাতি
এক টাকা ছাড়িতে কাতর ছিলেন, সে জাতি আজ কোটি
কোটি টাকা অকাতরে বিসর্জন করিলেন ; কোটি কোটি টাকা
দিয়া দাস প্রভুগণের নিকট দাসগণের স্বাধীনতা ক্রয় করিলেন ।
যে জাতি, একদিন ঈশ্বরের মূর্তিমতী প্রকৃতি মানব-আকৃতি
হইয়া বাণিজ্যপথজা উড়াইয়াছিলেন, এই মহাপুরুষের চরিত্র-
গৌরবে সেই জাতির রণতরী সকল পৃথিবী হইতে দাস ব্যবসায়
উঠাইবার জন্য আজও সপ্ত সমুদ্র আলোড়ন করিয়া বেড়াই
তেছে । ধন্য উইলবার্ফোর্স ! ধন্য তোমার জীবন ! কতদিন
হইল তুমি পৃথিবী ত্যাগ করিয়া * বৈকুণ্ঠ-ধামে গমন করি-
য়াছ, কিন্তু তোমার জীবন্ত বিশ্বপ্রেম আজও প্রতি ইংরাজকে
দেবতা করিয়া রাখিয়াছে !

জন্ হাউয়ার্ড ও কারাসংশোধন ।

আব একজন সন্ন্যাসীর জীবনী ধরি । চল, একবার অষ্টা-
দশ শতাব্দীর ইউরোপীয় করাগারের অভ্যন্তরে যাই- যথায়

* ১৮৩৬ খ্রীষ্টাব্দের ২৭ জুলাই এই মহাপুরুষের মৃত্যু হয় ।

যমসদৃশ জেলারেরা কশা হস্তে হতভাগা এবং হতভাগিনীর দলকে তাড়াইয়া লইয়া বেড়াইতেছে, কোন কাজ করিতে একটু বিলম্ব হইলে তৎক্ষণাৎ কশাঘাতে তাহাদিগের পৃষ্ঠদেশ ক্ষতবিক্ষত করিতেছে, সমস্ত দিন কঠিন পরিশ্রম করাইয়া অনশনে বা অর্দ্ধাশনে তাহাদিগকে পশুপালের ন্যায় পবন-দেবসম্পর্ক-বিরহিত ভীষণ অন্ধকারাগারে পুরিয়া চাবি দিতেছে । তথায় দাঁড়াইয়া সেই হতভাগা ও হতভাগিনীদিগের হৃৎখে যিনি নীরবে অশ্রুবিসর্জনে করিতেছেন, ঐ মহাপুরুষ কে ? যিনি কুষ্ঠরোগাক্রান্ত রোগীদিগের ক্লেশঘার পার্শ্বে দাঁড়াইয়া অমানবদনে তাহাদিগের শুশ্রূষা করিতেছেন, ঐ দেবতা কে ? উনিই প্রাতঃস্মরণীয়-চরিত ডন্ হাউয়ার্ড । সেই অভাগা ও অভাগিনীগণের দুঃখ-কাহিনী উনিই যুক্তকণ্ঠে রুগতে প্রচার করেন । যখন সমস্ত পৃথিবী অপরাধী ও অপরাধিনীগণের দুঃখ-যন্ত্রণায় সম্পূর্ণ উদাসীন ছিল, সেই সনয়ে তাহাদের অবস্থা ভাবিয়া হাউয়ার্ডের প্রাণ কাঁদিল । যাগ-দিগকে পৃথিবী পরিত্যাগ করিয়াছে, বিস্মৃতিজলে বিসর্জন দিয়াছে, সেই অভাগা ও অভাগিনীগণের প্রতি হাউয়ার্ডের হৃদয় প্রেম বিগলিত ভাবধারণ করিল । কারাবাসীকে দেখিলে লোকের মনে ঘণার উদ্রেক হইত, কিন্তু তাহাদের হৃৎখে তাহাদের হতাশা-পীড়িত অবস্থায়, তাঁহার হৃদয় নিদারুণ ব্যথিত হইত । তিনি প্রতি কাবাগারে তাহাদিগের অবস্থা দেখিয়া বেড়াইতেন । শুদ্ধ ইংলণ্ড নয়, সমস্ত ইউরোপ তাঁহার কার্যা-ক্ষেত্র ছিল । তিনি ইউরোপের সমস্ত কারাগার পরিদর্শন করিয়া বিভিন্ন দেশের কারাবাসীদিগের অবস্থা তুলনায় সমা-

লোচনা করিতেন। কারাগারের প্রস্তরময় প্রাচীর ভেদ করিয়া যে ছুংথের কাহিনী বাহিরে বাহিত না, হাউয়ার্ড আজ সেই ছুংথের কাহিনী ভগতে গাইয়া বেড়াইতে লাগিলেন। অনাহারে, কশাঘাতে, কত শত নরনারী কারাগারের অভ্যন্তরে সমাধিনিহিত হইত, পৃথিবী তাহার সংবাদ রাখিত না; আজ হাউয়ার্ড সে সকল গুপ্তহত্যার সংবাদ ভগতে প্রচার করিয়া বেড়াইতে লাগিলেন। কারাগারের তনোময় নিভৃত নিবাসে কত লোক মলমূত্রে পচিয়া মরিয়া থাকিত, ভগৎ তাহার সন্ধান রাখিত না, আজ হাউয়ার্ড সেই সকল শোচনীয় ঘটনা ভগতে প্রচার করিয়া বেড়াইতে লাগিলেন। কালে তাঁহার প্রচারের ফল সকল দেশেই ফলিতে লাগিল। ইউরোপের সকল কারাবাসীই তাহার পরিশ্রমের উপকার কিছু কিছু পরিমাণে পাইতে লাগিল। এমন যে ইউরোপের সর্বত্র বায়ু-সঞ্চালিত, সুপ্রশস্ত, সুপরিদৃত, সুসজ্জিত, বিলাসদ্রব্যপূর্ণ কারাগার সকল দেখিতে পাওয়া যায়, তাহা এই মহাপুরুষের কীর্তির ফলমাত্র।

জন্ হাউয়ার্ড ।

১৭৩৬ খ্রীষ্টাব্দে জন্ হাউয়ার্ড ইংলণ্ডের অন্তর্গত হার্কনে নামবে জন্মগ্রহণ করেন। তাহার পিতা একজন ব্যবসায়ী লোক ছিলেন, এবং ব্যবসায় দ্বারা যথেষ্ট সম্পত্তি করিয়াছিলেন। তিনি পুত্রকেও ব্যবসায় শিখাইবার জন্য এক কারখানায় শিক্ষানবীশ রাখিলেন। সেই সময়েই তাঁহার মৃত্যু হইল

মৃত্যুকালে তাঁহার বিপুল সম্পত্তি তিনি উইল দ্বারা আপ-
নার পুত্র ও কন্যাকে দিয়া গেলেন; কিন্তু বন্দে'বস্ত
করিয়া গেলেন যে, পুত্রের ২৫ বৎসর বয়স না হইলে, তিনি
প্রাপ্তবয়স্ক বলিয়া বিবেচিত হইবেন না। পিতার মৃত্যুব
পরে হাউয়ার্ড' শিক্ষা-নবীশি ছাড়িয়া দিলেন। কারণ,
বাবসায় তাঁহার ভাল লাগিল না। ছাড়িয়া দিয়া তিনি
ষ্টোক নিউইংটন নগরে ক্রাইষ্ট ষ্ট্রীটে একটী বাসা লইলেন।
তাঁহার শরীর এ সময়ে বড় অসুস্থ ছিল। সারা লাডেন
নামক এক প্রবীণা বিধবা রমণী সেই বাসাবাড়ীর অধিস্থা-
মিনী ছিলেন। তিনি প্রাণপণে হাউয়ার্ডের শুশ্রূষা করিতে
লাগিলেন। হাউয়ার্ড' অতিরিকাল মধ্যে নিরানন্দ হইয়া উঠি-
লেন। তিনি কৃতজ্ঞতার চিহ্নস্বরূপ তাঁহার পাণিগ্রহণে ইচ্ছুক
হইলেন। বিধবা রমণী তাঁহা অপেক্ষা প্রায় ২৪।২৫ বৎসরের
বড়। এই জন্য তিনি অনেক আপত্তি করিলেন। কিন্তু
হাউয়ার্ড' সে আপত্তি গ্রাহ্য করিলেন না। প্রবীণা রমণী
তাঁহার আগ্রহাতিশয়ে শেষে অগত্যা সম্মত হইলেন। হাউয়ার্ড'
লোকেব নির্দাতন ভয়ে গোপনে তাঁহাকে বিবাহ করিলেন।
১৭৫২ খৃষ্টাব্দে এই বিবাহ হয়। কিন্তু তিনি মনেক দিন এই
পতিপরায়ণা রমণীর শুশ্রূষা ভোগ করিতে পারেন নাই।
কারণ, তিন বৎসরের মধ্যেই তিনি বিপত্নীক হন। ১৭৫৫
খৃষ্টাব্দের ১০ই নবেম্বর চুয়ান বৎসর বয়সে তাঁহার পত্নীর মৃত্যু
হয়। তাঁহার এই তিন বৎসর অতি সুখে কাটাষ্টয়াছিল।
পত্নীর মৃত্যুতে হাউয়ার্ড' অতিশয় শোকাবুল হইলেন।

পর বৎসরে (১৭৫৬ খৃঃ) তিনি একখানি পর্চুগীজ জাহাজে

করিয়া লিস্বনে যাইতেছিলেন। একখান ফরাসী জাহাজ পশ্চিমধ্যে তাঁহাদিগকে গ্রেপ্তার করিল। ফরাসি কারাগারের দুর্ভিক্ষ যন্ত্রণা নিজে অনুভব করিয়া তিনি কারাগার-সংস্কারে জীবন উৎসর্গ করিতে কৃতসংকল্প হইলেন। দুই দিন নিরন্তর উপবাসী অবস্থায় তাঁহারা ফ্রান্সের অন্যতম বন্দর ব্রেষ্ট নগরে দুর্গে নীত হইলেন। সেখানে তিনি ছয়রাত্রি শুদ্ধ খড়ের উপর পড়িয়া রহিলেন। তখাকার মর্টেক্স, কাটেক্স, ব্রেষ্ট, মালেক্স, ও ডুইনাইন প্রভৃতি নগরের কারাগারে অনেক ইংরেজ বন্দী ছিল। তাহাদিগের সহিত তাঁহার লেখালিপি চলিতে লাগিল। তিনি বিবিধ প্রমাণ পাইলেন যে, ইংরাজ বন্দীদিগের প্রতি ফরাসীরা অতি নৃশংস ব্যবহার করিয়া থাকেন। এই নৃশংস ব্যবহারে কত শত ইংরাজ বন্দী শমন-সদনে প্রেরিত হইয়াছে। পাঠক! এই বলিলেই মৃত্যুসংখ্যা অনুমান করিতে পারিবেন যে, ডুইনানে একটা গর্তে এক দিনে ছত্রিশ জন ইংরাজ বন্দীকে জীবন্ত প্রোথিত করা হয়। হাউয়ার্ডের কোমল হৃদয় ইহাতে বিগলিত হইল। তিনি ইংলণ্ডে আসিয়া এই সকল কথা জানাইলে, ব্রিটিশ গবর্ণমেন্ট ফরাসী গবর্ণমেন্টকে ভৎসনা করিয়া চিঠি লিখিলেন। তাহাতে ফরাসী গবর্ণমেন্ট লজ্জিত হইয়া অবশিষ্ট ইংরাজ বন্দীদিগকে ছাড়িয়া দিলেন।

তাহার পরে তিনি ইতালীর কারাগার সকল পরিদর্শন করিতে ইতালী স্বাত্রা করিলেন। ইতালী হইতে প্রত্যাগত হইয়া তিনি আবার বিবাহ করিলেন। এই রমণী একটা পুত্র সন্তান প্রসব করিয়া স্মৃতিকাগারেই প্রাণত্যাগ করিলেন। সন্তানটীও কালে

উন্মাদ-রোগগ্রস্ত হইল। হাউয়ার্ড ভগ্নমনে ইংলণ্ডের অন্তঃপাতী বেড্‌ফোর্ড নগরের অদূরবর্তী নিজ জমীদারীতে গমন করিলেন। এইখানেই তাঁহার জীবনের মাহাত্ম্য বিশেষরূপে প্রচারিত হয়।

১৭৭৩ খৃষ্টাব্দে তিনি বেড্‌ফোর্ড কাউন্টির সেরিফশিপে অভিষিক্ত হন। বেড্‌ফোর্ডের কারাগার সকল ও কারাবাসি-গণের অবস্থা তাঁহার চিন্তকে আকৃষ্ট করে। প্রথমে তাঁহার বোধ হইয়াছিল যে, বেড্‌ফোর্ডের কারাগার সকলের মত জঘন্য ও নৃশংসতার আবাসভূমি কারাগার বুঝি ব্রিটনে আর কোথাপি নাই। এই বিষয়ে নিঃসন্দেহ হইবার জন্য তিনি ইংলণ্ড, স্কটলণ্ড ও আয়ারল্যান্ডের কারাগার সকল পরিদর্শন করিয়া বেড়াইলেন। বতই অনুসন্ধান করিতে লাগিলেন, ততই মর্শ্বভেদী ঘটনা সকল বিদিত হইতে লাগিলেন। তিনি স্বচক্ষে দেখিলেন, স্মরণ্য তাঁহার প্রতীতি জন্মিল যে, ব্রিটনের কারাগার সকল নিলজ্জতার গহ্বর ও পাপের অগ্নিকুণ্ড। যাহারা কারাগারে যায়, শুদ্ধ তাহাদিগেরই শরীর ও নীতি যে কলুষিত হয়, এক্রপ নহে; কিন্তু তাহারা বাহির হইয়া আসিয়া সমাজমধ্যে সেই শারীরিক ও নৈতিক পীড়া সংক্রামিত করে। হাউয়ার্ড প্যারলিমেন্টকে এই বিষয় বিদিত করিলেন। প্যারলিমেন্ট তাঁহার স্বাক্ষ্য গ্রহণ করিয়া, তাঁহাকে ধন্যবাদ দিলেন।

এই সকল কারাগারে তৎকালে এক প্রকার সংক্রামক জরের অতিশয় প্রাদুর্ভাব ছিল। ইহাকে কারা-জ্বর বলিত। ঘাতকের হস্তে বত কারাবাসী না মরিত, এই জরের হস্তে তাহা অপেক্ষাও অনেক অধিক কারাবাসী মরিত। শুদ্ধ কারাবাসী নয়—জল, মাজিষ্ট্রেট, জুরী, স্বাক্ষী ও জেলদারোগা—যাহারা কার্য-

গতিকে কারাবাসীর নিকটবর্তী হইতেন, তাঁহারাও এই সংক্রামক জ্বরে আক্রান্ত হইয়া অকালে কালকবলে পতিত হইতেন । তিনি আরও দেখিলেন—দাওয়ানী ও কোজদারী জেল একজু মিশিয়া আছে ; অপরাধী ও ঋণী একপ্রকার শাসনের অধীনে রহিয়াছে ; দেখিলেন, যাহারা আপীলে খালাস পাইয়াছে, তাহারা ফিজ্ দিতে না পারায় এখনও কারাগারে রহিয়াছে । এই সমস্ত দেখিয়া তাঁহার দৃঢ় বিশ্বাস জন্মিল যে,—“এই কারাগার সকল ‘সংশোধনাগার’ না হইয়া পাপাগার হইয়া পড়িয়াছে ; এই সকল হইতে সমাজের যেকোন ভীষণ অনিষ্ট হইতেছে, এমন আর কিছু হইতেই নয় ; একজন লোক কারাগারে যাইবার সময়ে যে পরিমিত পাপ লইয়া যায়, ফিরিয়া আসিবার সময়ে তাহার শতগুণ পাপ লইয়া আইসে ; সুতরাং বর্তমান কারাগার সকল হইতে সমাজের যে পরিমাণে ইষ্ট হইতেছে, তাহার শত গুণ অনিষ্ট হইতেছে ।’

এই হতভাগ্যগণের দুঃখে হাউয়ার্ডের হৃদয় কঁটিয়া গেল । তাঁহার সমস্ত মানসিক শক্তি, তাঁহার সমস্ত সম্পত্তি, এবং তাঁহার পদের সমস্ত প্রভাব, তিনি এই হতভাগ্যদিগের দুঃখাপনোদনে ব্যয়িত করিতে একান্ত কৃত-সঙ্কল্প হইলেন । আহার নাই, নিদ্রা নাই, বিশ্রাম নাই—যোগী হাউয়ার্ড নিরন্তর এই কার্যে নিযুক্ত । তাঁহার উদ্দীপনায় গবর্ণমেন্টও উত্তেজিত হইলেন । তাঁহার হস্তে গবর্ণমেন্ট কারা-সংস্কারের ভার অর্পণ করিলেন । তাঁহার অভীষ্ট কিয়ৎপরিমাণে সূক্ষ্ম হইল । তাঁহার তত্ত্বাবধানে অনেকগুলি কারাগার ভাঙ্গিয়া নূতন প্রণালীতে গঠিত হইল ; অনেকগুলিতে কারাবাসিগণের

আহারের সুব্যবস্থা করা হইল; প্রত্যেক ক্ষুদ্র কুঠরীতে বাইবেল রাখা হইল; কারাশাসিগণের ধর্মবুদ্ধি পরিপুষ্ট করিবার জন্ত প্রতি কারাগারে এক এক জন করিয়া ধর্ম-যাজক নিযুক্ত করা হইল।

দেশে কৃতকার্যতা লাভ করিয়া উৎসাহিত হইয়া হাউয়ার্ড সমস্ত ইউরোপের কারাগার পরিদর্শন করিতে কৃতসঙ্কল্প হইলেন। এই উদ্দেশে হাউয়ার্ড ফ্রান্স, ফ্লাণ্ডার্স, হল্যান্ড, জার্মানী, সুইজারল্যান্ড, প্রুসিয়া, অষ্ট্রিয়া, ডেনমার্ক, সুইডেন, রুসিয়া, পোলাণ্ড, স্পেন ও পর্তুগেল—ক্রমে এই সমস্ত দেশ প্রদক্ষিণ করিলেন। পূর্বে ইতালী দেখিয়া আসিয়া-ছিলেন, সুতরাং এবার আর ইতালীতে বাইলেন না। পাঠক! আজ কাল ইউরোপের চতুর্দিকে যেরূপ নৌহবয় নির্মিত হইয়াছে, ভাবিবেন না যে, তখনও সেইরূপ ছিল। ইউরোপের এ সকল উন্নতি বর্তমান শতাব্দীতে ঘটিয়াছে মাত্র। সুতরাং সেই ঘোর যোগী হাউয়ার্ডকে পাদযানে বা নৌযানে এই প্রকাণ্ড ইউরোপ ভূমি প্রদক্ষিণ করিতে হইয়াছিল। ইহাতে তিনি ধনে প্রাণে গিয়াছিলেন বলিলেও অতুক্তি হয় না। প্রকৃতির শোভা-বৈচিত্র্য দর্শন বা রাজ-প্রাসাদের প্রসাদভোগ করিতে তিনি যান নাই যে, তাঁহার দেহ ও মন পুলকিত হইবে। কারাগারের পৃথিবীবিষিষ্ট ছন্দ্রবেশ স্থান সকল তাঁহার একমাত্র তীর্থস্থল ছিল। সেই সকল তীর্থস্থলে চোর, ডাকাত, বদনাবেস—তাঁহার একমাত্র সহতীর্থ ছিল। তিনি তাহাদিগকে কখন অর্থ দিয়া, কখন উপদেশ দিয়া, কখন বা শুদ্ধ মিষ্ট কথা বলিয়া তাহাদিগের কষ্ট কথঞ্চিৎ দূর

করিতে চেষ্টা করিতেন । এই অনন্ত বিশ্ব সেই বিশ্বপ্রেমিকের গৃহ ছিল । তিনি সকল স্থলেই আত্মনির্বিশেষে সকলকে ভালবাসিতে পারিতেন । বিশেষতঃ যে সকল কারাবাসীগণের হৃৎপ কেহ জানিত না, কেহ গুনিত না, তিনি পুত্র-নির্বিশেষে তাহাদিগকে ভালবাসিতেন । তাঁহার সময় ও সম্পত্তি তিনি তাহাদিগের কার্য্যে উৎসর্গ করিয়া দিয়া ছিলেন । তাঁহার অতুল সম্পত্তি এই কার্য্যে ব্যয় করিয়া তিনি 'ভিখারী হইয়াছিলেন, তথাপি এক দিনও স্থলিত-ব্রত হন নাই ।

তাঁহার হৃদয় ইহাতেও পরিতৃপ্ত হইল না । তিনি দেখিলেন, কারাবাসীগণের আয় গলিত-কুষ্ঠরোগাক্রান্ত ব্যক্তিগণের সংবাদ পৃথিবী লয় না । তাহারা চিকিৎসালয়ের দূষিত বায়ুতে যে জীবন্ত সমাধিনিহিত হইতেছে, পৃথিবী সে দিকে জ্ঞেপও করে না । কিন্তু যাহাদিগের দিকে তাকাইবার কেহ নাই, যাহাদিগের হৃৎকান্ডিনী গুনিবার কেহ নাই, হাউয়ার্ডের দৃষ্টি ও শ্রুতি তাহাদিগের দিকেই ধাবিত হইত । তিনি ইংলণ্ড, ফ্রান্স, ইতালী—অধিক কি মন্ট্র আর্থা ও কনেষ্টাণ্টিনোপল—পর্য্যন্ত এই উদ্দেশে ভ্রমণ করিয়া বেড়াইলেন । কুষ্ঠরোগের অব্যর্থ ঔষধ সঙ্গী লইয়া নিজে রোগাদিগকে থাওয়াইতে লাগিলেন ; রোগীর রুগ্নশয্যার পার্শ্বে বসিয়া তাহার শুশ্রূষা ও সাহসনা করিতে লাগিলেন । কুষ্ঠরোগীর রুগ্নশয্যের দূষিত বায়ুর অবিরাম অনুসেবনে তিনি কনেষ্টাণ্টিনোপলে সংক্রামক জ্বরাক্রান্ত হইলেন । এবার অতি কষ্টে তাঁহার প্রাণ রক্ষা হইল । তিনি অনেক দিন পরে ইংলণ্ডে প্রত্যাগত হইয়া, দেখিয়া আশ্চর্য্যিত হইলেন যে, তাঁহার কারাগার-সংস্কার-বিষয়ক প্রস্তাব সকল

প্রায়ই কার্যো পরিণত হইয়াছে। তিনি ইংলণ্ডে আসিয়া আপনার পরিদর্শনের ফল পুস্তকাকারে মুদ্রিত করিলেন। তাহা পাঠ করিয়া পামাণও বিগলিত হইল।

কুষ্ঠরোগের দূষিত বায়ুর অনুসেবনে একবার প্রাণ হারাইতে হারাইতে রহিয়া গিয়াও হাউয়ার্ডের চৈতন্ত হইল না। অথবা কেন হইবে? পরহিতব্রতে উৎসর্গীকৃত-প্রাণ কোন্ মহাপুরুষ কবে মৃত্যুভয়ে কর্তব্যের অনুষ্ঠান হইতে পরায়ুপ হইয়াছেন? হাউয়ার্ড ১৭৮৯ খ্রীষ্টাব্দে আবার ইংলণ্ড পরিত্যাগ করিয়া প্রাচ্য দেশাভিমুখে গমন করিলেন। সন্ন্যাসী কুম্ভসাগর-তীরবর্তী রুশীয় নগরী খার্সনে আসিয়া উপস্থিত হইলেন। কিন্তু এবার তাঁহার জীবনের দিন সংক্ষিপ্ত হইয়া আসিয়াছিল; অর্দ্ধাশনে বা অনিয়মিতাশনে নিরন্তর প্যাটনে তাঁহার শরীর ভগ্নপ্রায় হইয়া গিয়াছিল; সুতরাং এগনৈকার কুড়াশয় সকল পরিদর্শন করিতে করিতে তিনি সহসা অরাক্রান্ত হইলেন; কয়েক ঘণ্টার মধ্যে সেই হ্রস্ব ব্যাধি তাঁহাকে এ পৃথিবী হইতে লইয়া গেল। তথায় একজন ফরাসী ভদ্রলোক তাঁহার অতিশয় যত্ন করিয়াছিলেন। হাউয়ার্ডের ইচ্ছানুসারে সেই ফরাসী ভদ্রলোকের উদ্যানে তাঁহার দেহ সন্মাদিনিহিত করা হইল। নরদেহ মাটির জিনিষ; মাটিতে মিশিয়া গেল। কিন্তু কীর্তি অমর, সুতরাং হাউয়ার্ডের কীর্তি অনন্তকাল রহিয়া গেল। কে জানিত যে, আজ এই সুদূর অমুগাঙ্গ প্রদেশের নির্জন কুটীরে বসিয়া এই ভারত-যুবক সেই মহাপুরুষের যশোগান করিবে? কে জানিত—আজ সেই দেব হাউয়ার্ডের প্রেত দেহের উদ্দেশে এই ভারত-যুবকের নমন বহিরা অশ্রধারা

পতিত হইবে ? কোথায় তিনি, আর কোথায় আমি ? তথাপি কেন আজ আমি তাঁহাকে সম্মুখে দেখিতেছি ? কে বলে, হাউয়ার্ড মরিয়াছেন ? না—তিনি মরেন নাই । যিনি অসংখ্য প্রাণের রক্ষার জন্ত নিজের প্রাণ বলি দেন, তিনি কখনই মরেন না ।

সার্ সামুয়েল্ রোমিলী ও দণ্ডবিধি-সংশোধন ।

আমরা এখানে ইংলণ্ডের আর একজন মহাপুরুষের নাম উল্লেখ করিব । তাঁহার নাম সার্ সামুয়েল্ রোমিলী ।

যে ইংরাজ জাতি আজ জগতের সভ্যত্ব জাতি বলিয়া অভিমান করিয়া থাকেন, ঊনবিংশ শতাব্দীর প্রারম্ভ পর্যন্ত তাঁহাদিগের দণ্ডবিধি এরূপ নৃশংস ছিল যে, তাহাদিগকে যে ভারতবাসীরা রাক্ষস বলিত, তাহা নিতান্ত নিরর্থক বলিয়া প্রতীত হয় না । ভারতবর্ষে তাঁহাদিগের সেই রাক্ষসাতারের জলন্ত দৃষ্টান্ত মহাৰাজ নন্দকুমারের কাঁশি । তাৎকালিক ব্রিটিশ দণ্ডবিধির সার্ব শত ধারায় প্রাণদণ্ডের ব্যবস্থা ছিল । দুঃখপোষ্য শিশুও এই ভীষণ দণ্ডবিধির হস্ত হইতে মুক্ত হইতে পারিত না । চঞ্চলমতি বালকও কাহার একটা কুল ছিঁড়িলেও, কারাগারে প্রেরিত হইত । কাঁশিকাষ্ঠ সর্বদাই সজ্জিত থাকিত । রবিবার ভিন্ন এমন বার ছিল না, যে বারে কোন না কোন লোকের কাঁশি না হইত । তবে সোমবার অতি প্রশস্ত বলিয়া বিবেচিত হইত । কারণ, যাহার প্রাণদণ্ডাজ্ঞা হইত, দণ্ড করিয়া তাহাকে মৃত্যুর জন্য প্রস্তুত হইবার নিমিত্ত

এক দিন সময় দেওয়া হইত। শুক্রবারে বিচার হইয়া তাহার প্রাণদণ্ডাজ্ঞা হইলে, অভাগা শনি রবি দুই দিনের সময় পাইত। কারণ রবিবার নিষিদ্ধ দিন। এই জন্য সাধারণতঃ শুক্রবার বিচার ও সোমবার ফাঁশি হইত।

ইংরাজ জজ কেবল ফাঁশিতেই সন্তুষ্ট হইতেন, একরূপ নহে। কখন কখন দণ্ডিতকে অস্থপদে বাঁধিয়া অস্থ ছাড়িয়া দিতে বলিতেন। অস্থ ক্রমাগত দৌড়িতে থাকিত, এবং সেই সঙ্গে সঙ্গে দণ্ডিতের দেহ ভিন্ন ভিন্ন হইয়া যাইত। কখন কখন তাহার শিংশ্ছেদনের আদেশ হইত। কখন বা তাহার অস্থ প্রত্যঙ্গ সকল কাটিয়া দিবার, এবং কখন বা তাহাকে জীবিত দগ্ধ-করণের আদেশ প্রদান করা হইত। তাহা অপেক্ষাও ভয়ঙ্কর শাস্তি ছিল—জীবিত মনুষ্যের পেট চিরিয়া নাড়ী ভুঁড়ি বাহির করিয়া লওয়া হইত। কখন বা তাহাকে টিক্‌টিকিতে চড়াইয়া পাথর ছুড়িতে ছুড়িতে তাহার প্রাণ বাহির করিয়া ফেলা হইত। কখন বা তাহাকে বেত ঝারিতে ঝারিতে “নিউগেট” হইতে “টাইবরণে” লইয়া যাওয়া হইত, এবং “টাইবরণ” হইতে “নিউগেটে” ফিরাইয়া আনা হইত। কিন্‌কি দিয়া রক্ত ছিটিয়া পড়িয়া সকলের গা ভাসিয়া বাইত, তথাপি বিচারকদিগের মনে দয়ার উদ্রেক হইত না। এই ব্যতীরাতেই অনেক দণ্ডিতের প্রাণ-বিরোগ হইত। রাক্ষস রাজার রাক্ষস বিচারক, এবং রাক্ষস-বিচারকের রাক্ষসী শাস্তি!

ইংরাজ যে আজ কাল কথঞ্চিৎ সভ্য হইয়াছেন, সে সার সামুয়েল রোমিলীর প্রাণোৎসর্গে। পূর্বের অসভ্যতার চিত্র-স্বরূপ ফাঁশি ও বেত্রাঘাত ইংরাজ দণ্ডবিধিকে আজও দৃষ্টি

করিয়া রাখিয়াছে।—ইংরাজ দণ্ডবিধির এই ঘোর নৃশংসতা-
কলঙ্ক অপনোদন করিবার জন্তই যেন সার্স সামুয়েল বোমি-
লীর জন্ম হয়। তিনি তাঁহার অতি পরিমার্জিত মন ও অত্যা-
দার হৃদয়কে এই মহৎ ব্রত সাধনে আজীবন নিযুক্ত রাখিয়া-
ছিলেন। বাল্যকাল হইতেই তাঁহার অন্তরে নিষ্ঠুরতার প্রতি
বলবতী ঘৃণা পরিদৃষ্ট হইয়াছিল। তাঁহার নিজের কথায় আমরা
তাঁহার মনের ভাব ব্যক্ত করিব। “নরহত্যা বা অন্য কোন
নৃশংস কার্যের বিবরণ পাঠ করিলে, আমার হৃদয়ে ভয়ানক
ভাবের আবির্ভাব হইত। নিউগেট কারাগারে যে সকল উৎ-
সৃষ্টপ্রাণ* ব্যক্তিগণকে জীবন্ত দণ্ড করা হইত, তাঁহাদিগের
বিবরণ পাঠ করিয়া আমি কত রাত্রি ভয়ে নিদ্রা যাইতে পারি
নাই, নিদ্রা যাইলেও, স্বপ্নে তাহার ব্যাঘাত সম্পাদন করিত।
স্বপ্নে সেই সকল অর্দ্ধদণ্ড বিকট মূর্তি আমার সম্মুখে উপস্থিত
হইত, অমনি নিদ্রা ভাঙ্গিয়া যাইত। কল্পনা আমার সম্মুখে
সতত ফাঁশি, নরহত্যা ও শোণিতপাতের দৃশ্য অবতারণিত
করিত। আমি সেই সকল দেখিয়া ভয়ে অভিভূত হইয়া
শয্যায় দেহ লুকাইবার চেষ্টা করিতাম। রজনীর গাঢ় অন্ধ-
কারে আমি জাগিয়া থাকিতে ভয় করিতাম, কিন্তু ভীষণ
উপদ্রবে নিদ্রা যাইতে পারিতাম না। এই জন্য আমি সাক্ষ্য
উপাসনার সময়ে প্রতিদিন ঈশ্বরের নিকটে প্রার্থনা করিতাম,
যে তিনি সে রাত্রি বিনা ভীষণ স্বপ্নদর্শনে আমাকে নিদ্রা
যাইতে দেন।” নৃশংসতাবিদ্বেষের কি অপূর্ব চিত্র !

সার সেমুয়েল রোমিলী ।

এই সুযোগে আমরা রোমলীর জীবনচরিত-সম্বন্ধে কিছু বলিব । রোমিলীর পিতা একজন ফরাসি প্রোটেষ্ট্যান্ট ছিলেন । তিনি ক্যাথলিক গবর্ণমেন্টের নিষ্যাতনে দেশ ছাড়িয়া লণ্ডনে আসিয়া বাস করিয়াছিলেন । লণ্ডনবাসিনী একটি ফরাসি রমণীর সহিত তাঁহার বিবাহ হয় । এই বিবাহে অনেকগুলি সন্তান জন্মিয়া ছিল, কিন্তু তিনটা বই দীর্ঘজীবী হয় নাই । সার সামুয়েল তাহার মধ্যে সর্ব-কনিষ্ঠ । একজন সুশিক্ষিত ফরাসী রমণী বাল্যে ইহার শিক্ষাকার্য্যে নিযুক্ত ছিলেন । ইনিও ক্যাথলিক নিষ্যাতনে স্বদেশ পরিত্যাগ করিতে বাধ্য হইয়া-ছিলেন । তাঁহার স্নেহ-প্রবৃত্তির তীক্ষ্ণতা ও সবিবাদ ভাবুকতার মূল এই ধর্ম্মপরায়ণা বিহবী ফরাসি রমণী ।

রোমিলী কিছু বড় হইলে, তাঁহাকে একটা স্কুলে দেওয়া হয় । এই স্কুলের শিক্ষক পড়াইতে যত পারন্ আর নাই পারন্, বেত্রপ্রহারে বিশেষ পারদর্শী ছিলেন । তিনি নব নব শাস্তির উদ্ভাবন করিয়া বিদ্যার অভাব পরিপূরণ করিতেন । শিক্ষকের এই নিষ্ঠুরতায় রোমিলী নৃশংসতাবিদ্বেষী হইয়া উঠিলেন । যাহা হউক, এই শিক্ষকের নিকট 'কিক্সিং ইংরাজী' শিখিয়া তিনি স্কুল ছাড়িলেন । তাঁহার পিতার জহরতের ব্যবসায় ছিল । তিনি স্কুল ছাড়িয়া সেই ব্যবসায়ের হিসাব পত্রাদি-বিষয়ে পিতার সাহায্য করিতে লাগিলেন । হিসাবপত্র রাখিয়া তিনি অনেক অবসর পাইতেন । সেই অবসরকালে তিনি আপন চেষ্টায় গ্রীক ও ল্যাটিন শিখিলেন । এইরূপে দুই তিন বৎসর যায়, এমন সময়ে কোন আত্মীয় মৃত্যুকালে

উইল দ্বারা তাঁহাদিগকে দেড় লক্ষ টাকা দিয়া যান। এই অভাবনীয় ধনাগমে উৎসাহিত হইয়া রোমিলীর পিতা তাঁহাকে ব্যবহারাজীবের ব্যবসায়ে দীক্ষিত করিবার সঙ্কল্প করেন। তদনুসারে ১৭৭৮ খৃষ্টাব্দে রোমিলী ‘গ্রেজ ইনে’ প্রবিষ্ট হন, এবং যথাসময়ে ব্যারিষ্টার হইয়া ব্যবহারাজীবের ব্যবসায়ে প্রবৃত্ত হন।

‘বারে’ (Bar) প্রাধান্ত লাভ করিতে রোমিলীর অনেক দিন লাগিল। দণ্ডবিধির সংস্কার-সাধনে তিনি যে কৃতসঙ্কল্প ছিলেন, এ কথা তিনি এক দিনও গোপন রাখেন নাই। দেওয়ানী ও ফৌজদারী আদালতে আইনের দোহাই দিয়া প্রতিদিন যে সকল নীতিবিগর্হিত কার্য্য অনুষ্ঠিত হইত, তিনি মুক্তকণ্ঠে সে সকলের প্রতিবাদ করিতে কখনই ভীত হইতেন না। যদিও ইহাতে আপাততঃ তাঁহার পশারের কিছু ক্ষতি হইল—যদিও আপাততঃ বড় বড় জমীদার ও ধনী চটিয়া যাইতে লাগিলেন, তথাপি তাঁহার প্রতিভা—কালে এত ক্ষুণ্ণি পাইল যে, সকল দুর্লভ্য বিষয় সম্বন্ধে তাঁহার পশার অতিশয় বাড়িয়া গেল। ক্রমে তাঁহার নাম দিগন্তব্যাপী হইয়া উঠিল। এই উন্নতিমুখে ১৭৯৮ খ্রীষ্টাব্দে তিনি ইংলণ্ডের অন্তঃপাতী হার্টফোর্ড শায়ারের মিস্ গার্সেট নাম্নী এক যুবতীকে বিবাহ করিলেন।

১৮০৬ খ্রীষ্টাব্দে রোমিলী সলিসিটর জেনারেলের পদে অভিষিক্ত হইলেন। সেই সময়েই তিনি ‘কুইন্সবারার’ প্রতিনিধি-রূপে হাউস্ অব্ কমন্সে প্রবিষ্ট হন, এবং সার্স সামুয়েল্ হন। এই সময় হইতেই তাঁহার জাতীয় জীবন আরম্ভ হয়। সাধারণ জীবনের ক্রমানুবর্তী শাস্তি ও তরঙ্গের মধ্যেও তিনি

আপনার জীবনের লক্ষ্য হইতে বিচ্যুত হন নাই। পালে-
মেণ্টের প্রতি সেশনেই তিনি ফৌজদারী আইনের সংশোধনের
জন্য প্রাণপণে চেষ্টা করিতেন। তাঁহার বাগ্মিকতা—সত্য, স্মার
ও মনুষ্যত্বের সমর্থনেই সতত ব্যয়িত হইত। আত্মীয় স্বজনের
আদরে সুখী, পতিপ্রাণা ভার্য্যার প্রেমে সুখী, সম্ভান সম্ভতি-
দিগের প্রতি বাৎসল্যে সুখী, এবং সাধু ও মহৎ লোকের শ্রদ্ধা
ভক্তিতে সুখী হইয়াও সার সামুয়েল্ দুঃখীদিগকে ভুলেন নাই।
নিজে সৌভাগ্য-সূর্য্যের আলোকে সমাসীন হইয়াও দুর্ভাগ্যের
অন্ধতমসে যাহারা বসিয়া আছে, তাহাদিগকে তিনি ভুলেন
নাই। তিনি জানিতেন যে, তিনি যে সময়ে সুখে কাল কাটাই-
তেছেন, তখন কত শত লোক দুঃখ যন্ত্রণায় মরিয়া যাইতেছে।
এইজন্য তাঁহার মনে সর্বদাই হর্ষে বিরাদ উপস্থিত হইত। এই
জন্য তিনি তাহাদিগের দুঃখমোচনে নিজের ধন প্রাণ উৎসর্গ
করিয়া ছিলেন। যদিও তিনি নিজের জীবদ্দশায় আপনার অজস্র
চেষ্টার বিশেষ ফল দেখিয়া যাইতে পারেন নাই, তথাপি ইহা
মূলকণ্ঠে স্বীকার করিতে হইবে যে, তাঁহার অক্লান্ত চেষ্টা নিফলা
হয়নাই। তাঁহার সেই জ্বালাময়ী বক্তৃতায় পাষণ্ড ও বিগলিত
হইতে লাগিল। সেই বক্তৃতার মোহিনী-শক্তিবলে ইংরাজ
জাতির অয়োময় হৃদয়ও বিগলিত হইল। ইংলণ্ডের পালে-
মেণ্টে এই বিষয় লইয়া ঘোরতর আন্দোলন উপস্থিত হইল।

এই সময়ে (১৮১৮ খ্রীষ্টাব্দে) সহসা তাঁহার প্রণয়িনীর
সাংঘাতিক পীড়া উপস্থিত হইল। উভয়ের জীবন যে একতাবে
কেমন গ্রথিত ছিল, রোমিলীর দৈনন্দিন আত্মবিবরণী * হইতে

এক ছত্র তুলিয়া পাঠককে উপহার দিয়া তাহা বুঝাইতেছি ।
 “৯ই অক্টোবর—আজ স্ত্রী একটু ভাল ছিলেন বলিয়া কত
 দিন পরে ঘুমান্না বাঁচিয়াছি।” কিন্তু বিধাতা তাঁহার
 অদৃষ্টে অধিক দিন ঘুম লিখেন নাই । • তাঁহার স্ত্রীর পীড়া
 তাহার পরেই আবার বাড়িয়া উঠিল । ২০এ অক্টোবরে তাঁহার
 স্ত্রী মানবলীলা সংবরণ করিলেন । শোকে রোমিলী ক্ষিপ্ত হইয়া
 গেলেন । সে আঘাত তাঁহার মস্তিষ্কের স্বপ্ন ধমনীমণ্ডলকে
 ছিন্ন ভিন্ন করিয়া ফেলিল । যে জীবন নিরন্তর মানবজাতির
 দুঃখাপনোদনে ব্যয়িত হইত, আজ সার্স নামুয়েল্ মনের অসহ
 বেদনায় নিজ হস্তে সেই জীবনের উপসংহার করিলেন । ধন্য
 রোমিলি ! ধন্য বীর ! ধন্য তোমার মানবপ্রেম ! ধন্য তোমার
 পত্নীপ্রেম ! পুরুষ হইয়া সহমরণে যায়, কে কোথায় শুনি-
 য়াছে ? আজ পুরুষজাতির সেই ঘোর কলঙ্ক তুমি অপনোদন
 করিলে । তুমি আজীবন যে ব্রতে জীবন উৎসর্গ করিয়া-
 ছিলে, তাহার উদ্ঘাপনা করিয়া যাইতে পারিলে না,—এই
 ক্ষোভ তোমার রহিয়া গেল । কিন্তু তোমার তপস্তার ফলে
 আজ ইংরাজ-জাতি ঘোরতর পাপ হইতে নিম্নুভূত । তোমার
 পুণ্যবলে আজ ইংরাজ-জাতি সভ্যপদবাচ্য । তোমার মৃত্যুর
 পরে তোমার তপস্তার ফল ফলিল । ইংরাজ-দণ্ড-বিধির
 সার্বশত-সংখ্যক ধারায় প্রাণদণ্ডের ব্যবস্থা ছিল । তোমার
 মৃত্যুর পরে সে ধারাগুলি দণ্ডবিধি হইতে অপসারিত হইল ।
 হুই একটা আজও আছে বটে, কিন্তু তোমার অতীত তপো-
 মাহাত্ম্যে তাহাও এক দিন অপসারিত হইবে । তুমি যে লক্ষ্য
 সংসাধনের জন্য ধন প্রাণ উৎসর্গ করিয়াছিলে, আসিয়া দেব !

এববার দেখ তাহা প্রায় সম্পন্ন হইয়াছে । আসিয়া আর এক বার পার্লামেন্টের আসনে আসীন হইয়া তোনার হৃদয়ভেদ-কারিণী বক্তৃতায় পাষণ্ড গলাইয়া ইংরাজ দণ্ডবিধির এখনও যে ছুই একটি কলঙ্ক আছে, শীঘ্র তাহার ক্ষালন কর । দেব ! এই শেষ নিনতি ও পদে ।

গ্যারিবল্ডীর প্রতিমা-প্রতিষ্ঠা ।

পাঠক ! ইলও হইতে আমেরিকায় বাইব, মনে সঙ্কল্প ছিল । কিন্তু একবার কিরিতে হইল । একবার প্রাণোৎসর্গের জীবন্ত ও জলন্ত ক্ষেত্র ইতালীতে যাইতে হইল । এই তীর্থযাত্রার প্রারম্ভে যে মহাপুরুষকে ইতালীর গ্রহরী বলিয়া উল্লেখ করিয়া আসিয়াছিলাম, যিনি সেই বৃদ্ধাবস্থায় ক্যাপেরা দ্বীপে ইতালীর মঙ্গলার্থে শবসাধনা করিতেছিলেন—সেই মহাপুরুষ—সেই ইতালীর প্রাণের প্রাণ গ্যারিবল্ডী গত (১৮৮২ খৃঃ ৩রা জুন) মানবলীলা সংবরণ করিয়াছেন । জগৎকে কাঁদাইয়া, ইতালীকে আঁধার করিয়া, সেই ইতালীগতপ্রাণ মহাপ্রাণ বীর, ইহলোক পরিত্যাগ করিয়া গিয়াছেন । সমস্ত ইতালী স্তব্ধ ও হতজ্ঞান হইয়া পড়িয়াছে । যে ইতালীকে তিনি এক দিন নবজীবনে অল্পপ্রাণিত করিয়াছিলেন, আজ তাঁহার বিরহে সেই ইতালী প্রাণহারা হইয়া পড়িয়া রহিয়াছে । যে দেহের অন্তিম বলে এক দিন প্রকাণ্ড অষ্ট্রীয় জাতি ধুলির ছায় ইতালীক্ষেত্র হইতে উৎক্ষিপ্ত হইয়াছিল, সেই অন্তিম-বল বীরদেহ, ৩রা জুন ক্যাপেরা দ্বীপের মৃত্তিকায়

সমাধিনিহিত হইয়াছে। এস, এক বার ইতালীর অধিবাসিবৃন্দের সহিত প্রাণ ভরিয়া কাঁদি। সমস্ত ভারতবাসী এস, একবার ক্রন্দনরোলে গগন বিদারিয়া সেই স্বজাতি-প্রেমিকের জন্ত কাঁদি। ভারতের অশ্রুজল ইতালীর অশ্রুজলেব সহিত মিশিয়া অপূৰ্ণ শান্তিবারির সৃষ্টি করুক। সমস্ত ভারতবাসী সেই শান্তি-জলে উক্ষিত হইয়া নব জীবন প্রাপ্ত হউক !

ঐ যে অষ্ট কৃষ্ণ তুরঙ্গে পরিচালিত কৃষ্ণবস্ত্রে সমাচ্ছাদিত রথ-খানি শোক-হৃৎর গতিতে ধীরে ধীরে ‘পোর্টাডেল্পোপোলো’ হইতে ক্যাপিটলাভিমুখে যাইতেছে, ও সঙ্গে সঙ্গে অসংখ্য সৈনিক পুরুষ কৃষ্ণপতাকা উড্ডীন করিয়া যাত্রা করিতেছে, আর অবনত মস্তকে ও নগ্ন পদে অগণ্য ইতালীর লোক কৃষ্ণ পরিচ্ছদ পরিয়া সাক্ষ্যলোচনে স্থলিতপদে চলিতেছে, ও কোন্ দেবতার রথ ? দোকানদার দোকান ফেলিয়া, শিল্পী যন্ত্র ছাড়িয়া, লেখক কলম ফেলিয়া, রাজনৈতিক রাজ্যচিন্তা পরিত্যাগ করিয়া এবং রমণীরা বিলাস ত্যজিয়া যে রথযাত্রার যোগ দিবার জন্ত দ্রুত-গতিতে পশ্চাৎ পশ্চাৎ ছুটিতেছে, ও কোন্ দেবতার রথ ? ঐ যে অসংখ্য লোকে রথ হইতে খেত প্রস্তরময় অর্ধ-মূর্তি ক্যাপিটলের চত্বারতপের নিম্নে সংস্থাপিত করিল, উনি কোন্ দেবতা ? আর ঐ যে তাঁহার পশ্চাতে দাঁড়াইয়া পূর্ণ-শ্বেত-প্রস্তরময়ী দেবী দক্ষিণ হস্তে বিজয়-মুকুট লইয়া প্রথম দেবতার মস্তকে পরাইয়া দিতেছেন এবং বামহস্তে দণ্ড ধারণ করিয়া রহিয়াছেন, ইনিই বা কোন্ দেবতা ? ঐ যে অর্ধমূর্তি দেখিতেছ, উহা ইতালীর উদ্ধারকর্তা গ্যারিবল্ডী ; আর ঐ যে দেবীমূর্তি দেখিতেছ, উহা স্বয়ং ইতালীদেবী। গত ১৮৮২

সালের ১১ই জুন গ্যারিবল্ডীর স্মরণার্থ সমস্ত ইতালীবাসী মিলিয়া এই প্রতিমা প্রতিষ্ঠা করিয়াছেন। যেমন প্রাণোৎসর্গ, তেননি প্রতিষ্ঠা! এই প্রাণোৎসর্গের প্রতিষ্ঠা করিতে গিয়াই ভারতবাসীরা এক দিন চৌষট্টি কোটা দেবতার উপাসক হইয়াছিলেন। ঐ যে জগন্নাথদেবকে দেখিতেছে যাহার রথের রজ্জুস্পর্শ করিতে পারিলেও, ভারতবাসী যে, আপনাকে স্বর্গের অধিকারী বলিয়া বিবেচনা করেন; যাহার রথচক্রে নিষ্পেষিত হইলেও, ভারতবাসী যেন স্বশরীরে স্বর্গে যান, সেই জগন্নাথদেব দেবতা নহেন—একজন প্রসিদ্ধ বৌদ্ধ প্রচারক। আর ঐ যে বৌদ্ধ মন্দিরে প্রশান্ত মুক্তিকামী শ্বেত-প্রস্তরনয় মূর্তি দেখিতেছ, উনি দেবতা নন—কপিলবস্ত্র নগরের অদীশ্বর জগদারাদ্য মহাপ্রাণ শাক্য সিংহ। যে নিরীশ্বর বৌদ্ধজগৎ স্বর্গ ভুলিয়াছেন, ঈশ্বরও ভুলিতে পারিয়াছেন, সে বৌদ্ধজগৎও বুদ্ধের পূজা ভুলিতে পারেন নাই। যে খ্রীষ্টনওলী দেবতা পূজা অতিশয় ঘৃণা করেন, তাহারও বেথেলহেমের সেই পরমযোগী দীনবন্ধু খ্রীষ্টের পূজা ভুলিতে পারেন নাই। যে মুখে যত বলুক, যাহার হৃদয়ে ভক্তি, প্রেম ও কৃতজ্ঞতা আছে, সে পৌত্তলিক না হইয়া থাকিতে পারে না। তাহার আদর্শ-পুরুষ ও আদর্শ-রমণীর নিকটে তাহাকে অবনত মস্তক হইতেই হইবে। যতকাল নিঃস্বার্থ প্রেম ও নিরভিসন্ধি ধর্ম্মের প্রতি মানুষ্যেব ভক্তি অচলা থাকিবে,—ততদিন এ পূজা, এ পৌত্তলিকতা নিবারণ করে, কাহার সাধ্য? ইদানীং এই মহাপ্রাণ-পূজা কেবল কন্ট প্রকাশ্যরূপে স্বীকার করিয়াছিলেন। ভারতীয়

প্রাচীন আর্যেরাও এক দিন এইমহা-প্রাণ-পূজা করিয়াছিলেন; কিন্তু তাঁহারা মানুষকে ঈশ্বরের অবতার কল্পনা না করিয়া, তাহা করিতে পারেন নাই। তাঁহারা মানুষে অতিমানুষ গুণ দেখিলেই, তাঁহাকে ঈশ্বর বলিয়া মনে করিতেন। কিন্তু আমাদের মতে ঈশ্বর মানুষরূপে জন্ম গ্রহণ করেন না, মানুষ যোগবলে ঈশ্বরত্ব লাভ করেন। এই যোগ নিঃস্বার্থ প্রেম ও নিরভিসন্ধি ধর্মের সাধনা। বুদ্ধ, খ্রীষ্ট, চৈতন্য প্রভৃতি সেই সাধনায় সিদ্ধ হইয়াছিলেন বলিয়াই, লোকে তাঁহাদিগকে দেবতা বলে এবং তাঁহাদিগের পূজা করে। গ্যারিবল্ডীও সেই সাধনায় সিদ্ধ হইয়াছিলেন বলিয়া, আজ ইতালীবাসীরা তাঁহার ঈশ্বরত্ব স্বীকার করিয়াছেন,—তাই আজ তাঁহার পবিত্র প্রস্তরময়ী মূর্তি পবিত্র রাজধানী রোমে প্রতিষ্ঠাপিত করিলেন।

ইতালী গ্যারিবল্ডীর কিরূপ উপাসক, তাহার আর একটি নিদর্শন না দিয়া থাকিতে পারিলাম না! গত ১৮৮২ সালের ৩রা জুন গ্যারিবল্ডীর মৃত্যু হয়। এই সমাচার রজনীতে যখন ইতালীর রাজধানীতে পৌঁছিল, তখন নাট্যশালায় নৃত্য, গীত ও অভিনয়াদি হইতেছিল। এই সংবাদ শ্রবণে বহুসংখ্যের স্ত্রীসকলে যে যেমন অবস্থায় ছিল, নির্বাক হইয়া সেই অবস্থায় রহিল। রঙ্গালয়ের অধ্যক্ষ মাননীয় ডেলি অভিনয়াদি বন্ধ করিবার প্রস্তাব করিতে গেলেন, কিন্তু বাকা ও বর্গ বন্ধ হইয়া গেল। মিউনিসিপাল সভার অধিবেশন হইতেছিল, এই সংবাদ আসিবা-মাত্র সভ্যেরা সকলেই উঠিয়া দাঁড়াইলেন। তৎক্ষণাৎ রাজ-প্রাসাদের পতাকাগুলি নিম্ন ও শিথিল করা হইল। গ্যারি-

বল্লীর সংকার-কার্যের ব্যয়-নির্বাহার্থ তৎক্ষণাৎ সাধারণ রাজস্ব হইতে পর্যাপ্ত অর্থ প্রেরণ করা হইল ।

- গ্যারিবল্দির জীবদ্দশায় তাঁহার জীবনী লিপিবদ্ধ না, সন্দেহ ছিল—এই জন্ত প্রস্তাবের প্রারম্ভে তাহা লেখা হয় নাই । কিন্তু এখন গ্যারিবল্দি অতীত ঘটনা, সুতরাং এখন আর সে আপত্তি হইতে পারে না । গ্যারিবল্দির বিস্তৃত জীবনী লিপিবদ্ধ বলবতী ইচ্ছা সত্ত্বেও, এখানে তাঁহার জীবনের গুটিকতম ঘটনার উল্লেখ না করিয়া থাকিতে পারিলাম না । সেই ঘটনাগুলি নিম্নে প্রদত্ত হইল ।

গ্যারিবল্দি ।

গ্যারিবল্দি ১৮০৭ খ্রীষ্টাব্দের ২২এ জুলাই ইতালীর অন্তর্গত নাইস্ নামক নগরে জন্মগ্রহণ করেন । যে সকল মহাত্মা ইতালীকে দ্রুত স্বাধীন জাতির স্বাক্ষর হইতে মুক্ত করিয়াছিলেন, গ্যারিবল্দি তাঁহাদের শীর্ষস্থানীয় । তাঁহার জনক জননী অতি দরিদ্র ছিলেন, এইজন্য শৈশবে পুত্রের সুশিক্ষার সুব্যবস্থা করিতে পারেন নাই । সুতরাং তিনি অতি অল্প বয়সেই সার্বভৌম নৌসেনার অন্তর্নিবিষ্ট হন, এবং সেই অল্প বয়সেই সাহস ও ধৈর্যের জন্য খ্যাতি লাভ করেন । তাঁহার মন সেই নবীন বয়স হইতেই উন্নতিশীল ছিল, সেইজন্য তিনি দেশের তাদৃশ দুর্গতি দেখিয়া স্থির থাকিতে পারিলেন না । এই সময়ে ইতালীতে অষ্ট্রিয়ার বিরুদ্ধে একটা জাতীয় অভ্যুত্থান হয় । জেনোয়া নগরে বৈপ্লবিকদিগের যে বড়যন্ত্র হয়, তিনি তাহাতে লিপ্ত ছিলেন বলিয়া, নির্দাসন দণ্ডে

দণ্ডিত হয়েন। সেই সময়ে তিনি পলাইয়া ফ্রান্সে আশ্রয় গ্রহণ করেন।

এই সময়ে তাঁহার জীবন, উপস্থাসের নায়কের জীবনের, জায় অদ্ভুত ঘটনাপূর্ণ হইয়াছিল। তাহাকে প্রয়োজন মত নানা মূর্ত্তি ধারণ করিতে হইয়াছিল। অবশেষে অজ্ঞাতবাসে ছদ্মবেশে পর্য্যটন করিয়া তিনি মার্সেলিসে একটা নিরাপদ আশ্রয় গ্রহণ করিলেন। এই মার্সেলিসেই ম্যাট্‌সিনের সহিত তাঁহার প্রথম আলাপ হয়। তখন তিনি ম্যাট্‌সিনির নিকটে মস্ত গ্রহণ পূৰ্ব্বক নব্য ইতালীয় সমাজের অন্তর্ভুক্ত হন। সেই সময় হইতে তাঁহার জীবন ইতালীর উদ্ধার-সাধনে উৎসর্গীকৃত হয়। এইখানে তিনি দুই বৎসর কাল থাকিয়া গণিতবিজ্ঞানে বিশেষ পারদর্শিতা লাভ করিলেন। তিনি কার্যক্ষেত্রে অব-
তীর্ণ হইবার চতুর্নিত্য ব্যগ্র হইয়া একখানি নিশরদেশীয় জাহাজে কক্ষ লইয়া মার্সেলিস্ হইতে টিউনিস্ যাত্রা করিলেন, এবং টিউনিসে বাইরা তথাকার নৌসেনার অন্তর্নিবিষ্ট হইলেন। কিন্তু তাঁহার কার্যপ্রবণ মন যে কার্যক্ষেত্রে খুঁজিয়া বেড়াইতেছিল, সেখানে তাহার কোন আশা নাই দেখিয়া, তিনি কয়েক মাসের মধ্যেই টিউনিস্ পরিত্যাগ পূর্ব্বক আমেরিকার অন্তর্গত রাইও জেনিরোতে প্রস্থান করিলেন।

রাইও জেনিরো ডেল্‌ সল্‌ এই সময়ে সাধারণতন্ত্ররূপে পরিণত হইয়াছিল। গ্যারিবল্ডী এই নবাধিষ্ঠিত সাধারণতরে অধীনে বাধ্য গ্রহণ করিতে স্বীকৃত হইলেন। সেই সময়েই বুয়েলস্‌ এয়ারেস্‌ নামক জাতির সহিত এই সাধারণতন্ত্রের যুদ্ধ

বাধিয়াছিল। উক্ত সাধারণতন্ত্র গ্যারিবল্ডীকে অভিযানোদ্যত মোসেনার অধিনায়ক করিয়া পাঠাইলেন।

সকলেই সতৃষ্ণ নয়নে এই ইউরোপীয় আগন্তকের কৃত-কার্য্যতার দিকে লক্ষ্য করিয়া রহিলেন। তাহার পারগতা, তাঁহার বিচক্ষণতা, অধিক কি—তাঁহার সাহসিকতার বিষয়ে সন্ধিহান লোকেরও অপ্রতুল ছিল না। এই রণবীর কি ধাতুর লোক, তাহার পরিচয় পাইতে লোকের অধিক দিন বিলম্ব সহিতে হয় নাই। তাঁহার অতি-মানুষ অবদান-পরম্পরা কয়েক সপ্তাহের মধ্যেই সৰ্ব্বত্র পরিব্যাপ্ত হইল। অনেকেই জল্পনা করিতে লাগিল—এ মানুষ নয়, নররূপী দৈত্য। রণস্থলে তিনি নির্ভীক চিত্তে মৃত্যুর সম্মুখীন হইতে লাগিলেন, অথচ তাঁহার শরীর একটাও ত্রণ-চিহ্ন ধারণ করিল না দেখিয়া অনেকেই তাঁহাকে মস্তুরক্ষিত বলিয়া মনে করিতে লাগিল। তিনি কতিপয়-মাত্র সহচর-সমভিব্যাহারে গভীরতম রণক্ষেত্রে তীরবেগে ছুটিয়া অকৃত শরীরে মুহূর্ত্ত মধ্যে আপন সৈন্তমধ্যে পুনরায় আবির্ভূত হইতেন। জলন্ত গোলা গুলি সকল ঝাঁকে ঝাঁকে তাঁহার গাত্রের নিকট দিয়া ছুটিতেছে, অথচ তাঁহাকে স্পর্শ করিতেছে না। দেখিলে আপাততঃ বোধ হয়, গোলা গুলি যেন লৌহ-প্রাকারে প্রতিহত হইয়া বেগে ফিরিয়া আসিতেছে। তিনি শৌর্য্যে ও বীর্য্যে যেমন লোকের বিশ্বয়জনক হইরাছিলেন, দয়াতেও ঠিক সেইরূপ বিশ্বয় উদ্দীপন করিয়াছিলেন। তিনি বিজয়ের পূর্বে বা পরে কোন সন্ময়েই অকারণে শত্রুর রক্তপাত করিয়া বীরধর্ম্ম কলঙ্কিত করিতেন না। তাঁহার বিচিত্র রণবেশ, হাকু'লীয় আকৃতি ও তেজোময় মুখশ্রী—

তাঁহার অলৌকিক গুণগ্রামের সহিত মিশ্রিত হইয়া অপূৰ্ণ শোভা ধারণ করিয়াছিল। বাহু ও আভ্যন্তরীণ শোভায় তিনি জগন্মনোমোহন হইয়াছিলেন। তাঁহার সেনা নস্তুমুগ্ধের তায়, তাঁহার আদেশের অমুবত্তী হইত। রাইও জেনিরোর সাধারণ-তন্ত্র গ্যারিবল্ডীর নিকটে চির-কৃতজ্ঞতা-পাশে আবদ্ধ হইলেন; এবং কৃতজ্ঞতার চিত্তস্বরূপ এই আদেশ প্রচার করিলেন যে, 'এখন হইতে সকল যুদ্ধেই গ্যারিবল্ডীর সেনা গৌরব-সূচক দক্ষিণ পার্শ্ব অধিকার করিবে। তদীয় সেনা যুদ্ধস্থলে থাকিতে জাতীয় সেনাও এ গৌরব পাইবে না'। অজ্ঞাত-কুলশীল আগন্তুক বৈদেশিকের পক্ষে এ সম্মান বড় উপেক্ষণীয় নহে।

এ দিকে গ্যারিবল্ডীর অদ্বুত বিজয়পরম্পরার সংবাদ স্বদেশে প্রসৃত হইল। সমস্ত ইতালী এই সমাচারে আনন্দ ও উৎসাহে উদ্ভূত হইয়া উঠিল। কুরেল তাঁহার সম্মানার্থ তাঁহাকে এক খানি তরবারী উপঢৌকন দিবেন বলিয়া, প্রকাশ্যরূপে ঘোষণা করিলেন। কিন্তু এ সম্মানসূচক উপহার গ্রহণ করিবার পূর্বেই ইতালীর উদ্ধার-সাধনের জন্য তদীয় প্রবলতর ভূজ-বলের প্রয়োজন হইয়া উঠিল। ১৮৫৮ খৃষ্টাব্দের বৈশ্ববিক অভ্যুত্থান গ্যারিবল্ডীকে বহু দিনের নির্দাসনের পরে স্বদেশে আনয়ন করিল। তিনি অবিলম্বেই দক্ষিণ টাইরলাভিমুখে অষ্ট্রীয় সেনার বিরুদ্ধে বুদ্ধযাত্রা করিলেন। তাঁহার রাইফল বন্দুক সকল অবিরাম অগ্নি উদ্দীর্ণ করিয়া শত্রুসেনাকে ত্রস্ত বাস্ত করিয়া তুলিল।

গ্যারিবল্ডী পীডমন্টরাজ চারল্‌স আলবার্টের নিকটে কার্য্য করিতে চাহিলেন। কিন্তু সেই ভীক নরপতি তাহাতে

সহজে সম্মত হইলেন না। তিনি কেবল অনুগ্রহ করিয়া গ্যারিবল্ডীকে অস্থায়ী অবৈতনিক সেনাদলের (ভলান্টীয়ার) সৈন্য সংগ্রহ করিবার অনুমতি প্রদান করিলেন। এই আদেশ প্রচার হইবামাত্র দলে দলে স্বজাতি-প্রেমিক রণোন্মত্ত অসংখ্য ইতালীয় যুবক তাঁহার পতাকামূলে আসিয়া দাঁড়াইলেন। এই জাতীয় সেনা লইয়া তিনি অষ্ট্রিয়গণের উপরি ক্রমাগত কয়েকটা যুদ্ধে জয় লাভ করিলেন। তিনি যে অবশেষে পরাজিত হইলেন, সে তাঁহার দোষ নয়। জাতীয় বিশ্বাসঘাতকতা ও জাতীয় সাহায্যের অভাবই তাহার মূল।

তাঁহার ও তদীয় সেনার শৌর্য্য-বীর্য্য ও দয়াদাক্ষিণে রণবীর অষ্ট্রিয় সেনানায়কেরাও মুগ্ধ হইয়াছিলেন। তাঁহারা বিজয় লাভ করিয়াও, বিজিত গ্যারিবল্ডীর সেনার ভূয়সী প্রশংসা করিয়াছিলেন। তিনি অকৃতকার্য্য হইয়া সৈন্য সকলকে বিদায় দিয়া বিষন্ন মনে ইউনাইটেড ষ্টেট্‌সে যাত্রা করিলেন; এবং তথায় বাণিজ্যোপজীবী হইয়া শুভদিনের প্রতীক্ষায় বসিয়া রহিলেন।

এমন সময়ে পেরুদেশে যুদ্ধ বাধিয়া উঠিল। পেরুর সৈন্য্য-পত্নী তাঁহার হস্তে সনর্পিত হইল। তাহারই তাঁহার যশঃ-দৌরভ সমস্ত পৃথিবীতে পরিব্যাপ্ত হইল।

পেরুদেশের যুদ্ধের অবসানে গ্যারিবল্ডী স্বদেশে আবার প্রত্যাগত হইলেন; এবং পুত্রগণ সহ ক্যাপ্তেরা দ্বীপে পাঁচ-বৎসর কাল অজ্ঞাতবাসে অবস্থিতি করিতে লাগিলেন; কিন্তু তাঁহার কার্য্যকরী মানসিক বৃত্তি স্থির থাকিবার নহে। তিনি এই দ্বীপে বিস্তৃত কৃষিকার্য্য আরম্ভ করিয়া দিলেন, অনেক

পতিত জমির আবাদ আরম্ভ করিলেন এবং প্রকাণ্ড প্রকাণ্ড গোলাবাড়ী সকল প্রস্তুত করিলেন । অচিরকাল-মধ্যে তাঁহার গৃহ ধন-ধন্থে পরিপূর্ণ হইল । তিনি কৃষিজাত পণ্যসকল নানা-স্থানে বিক্রয়ার্থ প্রেরণ করিবার জন্য একখানি সমুদ্রবান প্রস্তুত করাইলেন । সময়ে সময়ে তাহাতে চড়িয়া তিনি স্বয়ং বাণিজ্যার্থ ইতালীর অন্তর্গত নাইস্ নগরে গমন করিতেন । তাঁহার আদর্শ জীবন, তাঁহার প্রকুল শ্রমপ্রবণতা, তাঁহার হৃদয়ের ও মনের রমণীয় গুণাবলী—অচিরকাল-মধ্যে তাঁহাকে পরিচিত ব্যক্তি মাত্রেই ভক্তি ও প্রীতির পাত্র করিয়া তুলিল । ভারতীয় যুবক ! চাকরী হইল না বলিয়া, হতাশ হইও না । জননী ভারতভূমি রত্নগর্ভা । গ্যারিবল্ডীর ন্যায়, জননীর আরাধনা করিতে শিখ । তিনি বক্ষঃ চিরিয়া শরীরের কৃষির দিয়া তোমাদিগকে খাওয়াইবেন । ভারতীয় সম্মান হইয়া তোমাদিগকে পরের দাসত্ব করিতে হইবে না ।

দাসত্বের মন্মথদ আঘাতে জর্জরিত ইতালী আবার মাথা তুলিল । ‘ইতালী দীর্ঘজীবী হউক !’ ‘ইতালীর জয় !’ ইত্যাদি শব্দে আবার গগন উদ্বেষিত হইল । এই শেষ স্বাধীনতা-সমরে জাতীয় নম্রন আবার গ্যারিবল্ডীর দিকে পতিত হইল । সেই জাতীয় আহ্বানে গ্যারিবল্ডীর আসন টলিল । তাহার হৃদয়স্থিত প্রাণ্মিত বীৰ্য্যবাহি অনিয়া উঠিল । স্বজাতির উদ্ধার-সাধন-রূপ ত্রুতের উদ্যাপনার দিন উপস্থিত দেখিয়া তিনি আর আপন আশ্রমে স্থির থাকিতে পারিলেন না । স্বদেশের স্বাধীনতা-মন্দিরে বসি দিতে তাঁহার কিছুই অদেয় ছিল না । ইতালীর স্বাধীনতা-উদ্ধারের জন্য তিনি নিজের প্রাণ—অধিক

কি প্রাণাধিক স্ত্রীপুত্র পর্য্যন্তও বলি দিতে প্রস্তুত ছিলেন । তিনি বৈপ্লবিক দস্যু ছিলেন না, বিপ্লবকালীন অরাজকতার সুবিধা লইয়া পরস্ব লুণ্ঠন করা তাঁহার উদ্দেশ্য ছিল না । তিনি লক্ষ্মীকামী সৈনিক পুরুষ ছিলেন না—আপনার অদ্ভুত বীরত্ব দেখাইয়া লোককে মুগ্ধ করিয়া রাজসিংহাসন অধিকার করা তাঁহার লক্ষ্য ছিল না । তিনি রঙ্গালয়ের নায়কের ন্যায় মৌখিক অভিনয় করিয়া স্বজাতিপ্রেমের পরাকাষ্ঠা দেখাইতে প্রস্তুত ছিলেন না । তিনি প্রকৃতির সন্তান ছিলেন, তাঁহার হৃদয়ে কপটতা ছিল না, তিনি ইতালীকে প্রাণাপেক্ষা ভাল-বাসিতেন, তাই ইতালীর জন্য প্রাণ দিতে প্রস্তুত ছিলেন । ইতালীর উদ্ধারের জন্য প্রকৃতি তাঁহাকে জাতীয় অধিনেতা করিয়া পাঠাইয়াছিলেন, তাই আজ জাতীয় স্বাধীনতা-সমরে সমস্ত ইতালী এক বাক্যে তাঁহাকে সৈনাপত্যে বরণ করিলেন । তিনি প্রাচীন রোমীয় ডিক্টেটরের ন্যায় হলকর্ষণ পরিভ্যাগ করিয়া জাতীয় অধিনেতৃত্বে অভিষিক্ত হইলেন । তিনি কখনই এ জাতীয় বিশ্বাসের অপবাহার করেন নাই । নেপোলিয়নের ন্যায় তিনি এই মহতী জাতীয় সেনা লইয়া ইতালীর সম্রাট হইতে পারিতেন । কিন্তু সেই স্বজাতি-প্রেমিকের হৃদয় নিজের পাখির উন্নতির জন্য ব্যাকুল ছিল না । শত্রুদিগকে ইতালী-ক্ষেত্র হইতে বিদূরিত করিয়া তিনি ভিক্টর ইমানুয়েলের হস্তে ইতালীর অপ্রতিদ্বন্দ্বী সাম্রাজ্য ন্যস্ত করিয়া আবার দীনবেশে নিজ ধাপাবাসে আসিয়া উপস্থিত হইলেন । ভিক্টর ইমানুয়েলের তাঁহাকে অদেয় কিছুই ছিল না । উচ্চ পদ,পেন্সন ও জাইগির—একে একে তিনি সমস্তই গ্যারিবল্ডীকে

দিতে চাহিলেন । কিন্তু তিনি সমস্তই প্রত্যাখ্যান করিলেন । তিনি স্বদেশের স্বাধীনতা উদ্ধারের জন্ত অসি নিক্ষেপিত করিয়াছিলেন, আজ সে ব্রতের উদ্‌ঘাপনা হইল ; অমনি, অসি কোবসাৎ করিয়া সেই দ্বীপস্থ পর্ণকুটীরে গমন করিলেন ; আবার হলচালনা দ্বারা জীবিকা নির্বাহ করিতে আরম্ভ করিলেন । তিনি যেখানে যাইতেন, সেই খানেই লোকে তাঁহার জয়ধ্বনি করিত দেখিয়া, তিনি ক্রমে লোকালয় পরিত্যাগ করিয়া নির্জন স্থানে বাস আরম্ভ করিয়াছিলেন । জগতের ভাগ্যে এরূপ লোক সচরাচর ঘটে না । ভারতে এরূপ এক জন লোক জন্মিলে, ভারতের এ দুর্দশা কয় দিন থাকে ?

তিনি জাতীয় সেনার অধিনায়ক হইয়া লম্বাডীতে গিয়া লম্বার্ডগণকে উল্লেখ করিয়া যে ঘোষণাপত্র প্রচার করেন, তাহাতে তাঁহার হৃদয়ের ভাব অক্ষরে অক্ষরে লিখিত আছে । সে ঘোষণাপত্র এই—“লম্বার্ডগণ ! আপনারা নব জীবন লাভের জন্ত আহুত হইয়াছেন । আশা করি, পন্সিডীয়া ও লেগ্নানো সমরে আপনাদিগের পিতৃপুরুষগণের ন্যায় আপনারাও এই যুদ্ধে অগ্রসর হইবেন । এবারও সেই শত্রু, ভীষণ ঘাতক, নিস্বর্ম ও লুণ্ঠনশীল, সেই অষ্ট্রীয়গণ ! ইতালীর অন্যান্য প্রদেশস্থ তদীয় ভ্রাতৃগণ একবাক্যে শপথ গ্রহণ করিয়াছেন যে, তাঁহারা যুদ্ধে হয় জয় লাভ করিবেন, নয় প্রাণ পরিত্যাগ করিবেন । আমুন, আপনারাও সেই শপথে আবদ্ধ হউন । আমরা বিংশতি-পুরুষব্যাপী দাসত্ব, অত্যাচার ও অপমানের প্রতিশোধ লইতে হইতেছে । জাতীয় সাম্রাজ্যকে বৈদেশিক দাসত্বের কলঙ্ক হইতে বিধৌত করিয়া নিষ্কলঙ্ক ও

পবিত্র অবস্থায় ভবিষ্যপুরুষের হস্তে সমর্পণ করিতে হইবে । সমস্ত ইতালীয় জাতি একবাক্যে যে ভিত্তির ইমানুয়েলের হস্তে জাতীয় নেতৃত্ব প্রদান করিয়াছেন, তিনিই আমাকে আপনাদিগের নিকটে পাঠাইলেন । তাঁহার ইচ্ছা আপনারা এই জাতীয় স্বাধীনতা-সমরের নিমিত্ত দলবদ্ধ ও বদ্ধ-পরিকর হন । সে পবিত্র কার্যের ভার আমার হস্তে তুল্য হইয়াছে, আমি কায়মনোবাক্যে তাহার সিদ্ধি কামনা করিতেছি । আমি যে জাতীয় সৈন্যপত্যে বৃত্ত হইয়াছি, তজ্জন্ত আমি আপনাকে বিশেষ গৌরবান্বিত মনে করি । ভ্রাতৃগণ ! আর কেন ? অস্ত্র গ্রহণ করুন । ইতালীর স্বাধীনতা-সূর্য্য দাসত্ব-মেঘে আচ্ছন্ন হইয়া আছে । আপনাদের বায়ব্য অস্ত্রে তাহা অবিলম্বে অপসারিত করুন । যে যে ব্যক্তি অস্ত্র-গ্রহণকর্ম হইয়াও অস্ত্রগ্রহণে বিরত থাকিবে, সেই সেই ব্যক্তি জাতীয়-বিশ্বাসহস্তা বলিয়া দণ্ডিত হইবে । যে দিন ইতালীর বিচ্ছিন্ন পুত্র কত্যাগণ একত্র নিলিত হইবে, যে দিন অধীনতার দুর্ভর শৃঙ্খল তাঁহাদিগের চরণ হইতে স্থলিত হইবে, সেইদিন ইতালী আবার পূর্দগৌরবে প্রতিষ্ঠাপিত হইবে ! ইউরোপীয় জাতি-নিচয়ের মধ্যে ইতালী এক দিন যে উচ্চতম আসন গ্রহণ করিয়াছিলেন, সেই দিন ইতালী সেই উচ্চতম আসন পুনরধিকার করিবে ।”

এইরূপ উদ্দীপনা-বাক্যে কাহার হৃদয় না অগ্নিময় হইয়া উঠে ! গ্যারিবল্ডীর এইরূপ উদ্দীপনাবাক্যে ইতালীর সমস্ত প্রদেশেই অষ্ট্রিয়গণের বিরুদ্ধে অভূতখিত হইল । তাঁহার লোহিত কঞ্চুক চতুর্দিকে বিদ্রোহানল সঙ্কুচিত করিতে লাগিল ।

দলে দলে ইতালীর যুবকসম্প্রদায় গৃহের মায়ায়—প্রাণের আশায়—জলাঞ্জলি দিয়া তাঁহার অদৃষ্টান্তসারী হইল। সমস্ত ইতালী গেন রণে মাতিয়া উঠিল! ঝড়ের সম্মুখে তুলারাশির, ন্যায়, এই প্রচণ্ড জাতীয় বলের সম্মুখে অস্ত্রীয় সেনা উড়িয়া গেল। ইতালীগগনে বহুদিনের পরে সৌভাগ্য-তপন পুনরায় উদ্ভিত হইল। ধন্য গ্যারিবন্দি! ধন্য তোমার কীর্ত্তি! তুমি স্বদেশের জন্য—স্বাধীনতার জন্য—বাহা করিলে, ইতিহাসের প্রতি পত্রে জলদঙ্করে তাহা লিখিত থাকিবে। তোমায় আদর্শ-পুরুষ করিবার জন্য বিধাতা বীরোচিত দেহ, প্রশস্ত ললাট, প্রকুল মুখকান্তি, সুবর্ণ বর্ণ, লোহিত ধূসর সূচিক্তন আকৃষিত কেশরাজি, উজ্জল ঈবৎ-ধূসর নয়নবয়, সুপরিষ্কৃত বীণাবিনিম্বিত মধুর স্বর, অনিষন্ত্রিত বিনয়নম্র গতি—প্রভৃতি যে সকল বাহ্য সৌন্দর্য্যো তোমায় বিভূষিত করিয়াছেন, সেগুলি কালে সকলই লয় প্রাপ্ত হইবে; কিন্তু তোমার অক্ষয় কীর্ত্তি অনন্ত কাল বিরাজমান থাকিবে।

ম্যাট্‌সিনি।*

পাঠক! ঐ যে নিভৃত প্রদেশে একটা সামান্য ও মলিন দেবমন্দির দেখিতেছ, উহার অভ্যন্তরে ইতালীর মহাপ্রাণ

* ১৮০৫ খৃষ্টাব্দের ২২এ জুন জেনোয়ার অন্তর্গত ট্রাডা লোমেন্‌চিনী নগরে এই মহাপুরুষ জন্মগ্রহণ করেন। তাঁহার পিতা জিয়াকমো ম্যাট্‌সিনি ঐ নগরের মেডিকেল কলেজের শারীর বিদ্যার অধ্যাপক ও এক জন বিখ্যাত চিকিৎসক ছিলেন। তাঁহার জননী মেরিয়া ম্যাট্‌সিনি সৌন্দর্য্যো, বুদ্ধিমত্তায়

নিহিত আছেন। যাহার মস্তবলে ইতালী-শাসনক্ষেত্রে শত শত গ্যারিবল্ডী সৃষ্ট হইয়াছিলেন; যাহার সঞ্জীবন ঔষধে ইতালী মৃতোখিতা হইয়াছেন; যাহার উদ্দীনার লক্ষ লক্ষ ইতালীয়ের রুদ্ধ রক্তস্রোত তাঁহাদিগের ধর্মীতে বৈদ্যাতিক বেগে প্রবাহিত হইয়াছিল; যাহার প্রদীপ্ত জীবনের অদ্ভুত আত্মত্যাগের দৃষ্টান্তে সহস্র সহস্র ইতালীয় যুবক, জনক জননী ও দারা স্মৃত পরিত্যাগ করিয়া সন্ন্যাসাশ্রম গ্রহণ করিয়াছিলেন; যাহার মস্তের মোহিনী শক্তিবলে অশিক্ষিত বা অধ্বশিক্ষিত সামান্য পদাতিক দৈন্যও স্বজাতিপ্রেমে আত্ম-বিসর্জন করিতে শিখিয়াছিল; যাহার দীক্ষাবলে দীক্ষিত যুবক বীরের ন্যায় দাড়াইয়া বক্ষ পাতিয়া গুলি ধারণ করিয়াছিলেন, তথাপি দীক্ষামন্ত্র ও দীক্ষিত ব্রাহ্মণের নাম প্রকাশ করেন নাই; যাহার চরিত্রগৌরবে মুগ্ধ হইয়া ইতালীর যুবকগণ দলে দলে জন্মভূমি পরিত্যাগ পূরক তদীয় মার্সেলিস্থিত আশ্রমে আসিয়া উপস্থিত হইয়াছিলেন; শুদ্ধ ইতালীর যুবক কেন, যাহার বিশ্বপ্রেমের মস্ত্রে দীক্ষিত হইবার জন্য পোলণ্ডীয়, রুমীয়, জর্মণীয়, স্কটল্যান্ডীয় ও ফরাশীয় বৈপ্লবিকগণও দলে দলে আসিয়া তদীয় আশ্রমে উপস্থিত হইয়াছিলেন ও তাঁহার নিকটে মন্ত্র গ্রহণ করিয়াছিলেন;—সেই ভগদত্ত ইতালী-সঞ্জীবক মহাপ্রাণ ম্যাট্‌সিনি এইখানে মহানিদ্রায় অভিভূত রহিয়াছেন— অকৃতজ্ঞ ইতালী একবার

ও হৃদয়বক্তার অনাধারণ রমণী বলিয়া স্থিতি ছিলেন। ম্যাট্‌সিনি নির্দাসন অবস্থায় জননীর নিকট অনেক সহায়তা প্রাপ্ত হন। ১৮৭২ সালের ১ই মার্চ গাইমা নগরে এই মহাপুরুষের মৃত্যু হয়।

সেদিকে তাকাইয়া দেখিতেছে না । যিনি গ্যারিবল্ডীর দীক্ষাগুরু ; যিনি গ্যারিবল্ডীর সহ-সমরিগণেরও মন্ত্রগুরু ; যিনি ইতালীর জন্য—ইতালীর উদ্ধার-কামনায়—আজীবন নৈষ্ঠিক ব্রতচর্য্য ব্রত গ্রহণ করিয়াছিলেন ; যিনি ইতালীর শোকে আশেষব ক্রোধ পরিচয় পরিধান করিয়াছিলেন ; যিনি বিদ্যালয়ের কাষ্টমঞ্চকে বসিয়া করতলে কপোল বিস্তৃত করিয়া বিষন্ন মনে ইতালীর বর্তমান অবস্থা ভাবিয়া অশ্রুজল ফেলিয়াছিলেন ও ইতালীর উদ্ধারের উপায় চিন্তা করিয়াছিলেন ; ও যিনি ব্যবহারাদ্বীপের পরীক্ষায় উত্তীর্ণ হইয়াও, ইতালীর উদ্ধার কামনায় নিজের আর্থিক উন্নতিব দিকেও দৃষ্টিপাত করেন নাই ; যিনি পিতার অতুল সম্পত্তির একনাত্র উত্তরাধিকারী হইয়াও, ইতালীর উদ্ধার কামনায় দারিদ্র্য-ব্রত গ্রহণ করিয়াছিলেন ; যিনি সেই সুমহৎ ব্রতের উদ্গাপনার রক্ত কারাগারের কঙ্কল শব্দ্যাকে সুকোমল পুষ্পশব্দ্য এবং নির্কাসনকে নৃত্তির অবস্থা বলিয়া মনে করিতেন ; যিনি নির্কাসন-অবস্থায় ফরাসী গবর্ণমেণ্টের নির্যাতনে দিবসে দিন-মধ্যে লুঙ্ঘিত থাকিয়া রক্তনীতে উঠিয়া নিজ মনের ভাব লিপিবদ্ধ করিয়া অপূর্ণ উদ্দীপনাপূর্ণ প্রবন্ধ সকল “নব্য ইতালী” নামক পত্রিকায় প্রকাশিত করিয়া অসংখ্য শিষ্যবর্গ দ্বারা পরদিনে সমস্ত ইতালীতে প্রচারিত করিতেন—যে পত্রিকাপ্রচার, হৃদ্যন্ত অষ্ট্রিয়ার সমস্ত নিবারণ-চেষ্টা বিফল করিয়াছিল—ফ্রান্সের নির্যাতনও নিষ্ফল করিয়াছিল ; যাহার প্রদীপ্ত উদ্দীপনাপূর্ণ রচনা সকল ইতালীতে মতবিপ্লব উপস্থিত না করিলে—ইতালীকে পূর্ণ হইতে অগ্রিময় করিয়া না রাখিলে,—বোধ হয়,

সহস্র গারিবন্ডীর অশ্রুও ইতালীর উদ্ধার সাধন হইত না ;
 যিনি শয়নে স্বপনে, অশনে বসনে, নির্বাসনে নির্বাতনে,
 ধ্যানে জ্ঞানে ইতালী বই জানিতেন না ; যিনি বিশ্বশ্রেনিক
 ও বিশ্বনাগরিক হইয়াও, ভবিষ্য বিশ্বজনীন সাধারণতন্ত্রের
 নেতৃত্ব ও কেন্দ্রস্থে ইতালীকে অতিক্রম করার সঙ্কল্প পরিত্যাগ
 করিতে পারেন নাই ; সংক্ষেপতঃ যিনি ইতালীর জন্ত পদে
 পদে মৃত্যুকে আশির্জন করিয়াছিলেন ;—গ্রাণোৎসর্গের সেই
 অপূর্ণ দৃষ্টান্তস্থল, ইতালীয়নয়-ভীষিত, মহাপ্রাণ ম্যাট্‌সিনি
 এখানে অনন্ত নিদ্রায় অভিভূত রহিয়াছেন, অন্ধ ইতালী তাহা
 দেখে না । রাজতান্ত্রিক ইতালী—সেই পূর্ণ লোকতান্ত্রিক
 ম্যাট্‌সিনির নানান্না অজ্ঞ ও বুদ্ধি উত্তিতে পারে নাই,—
 তাই সেই বিশ্বপ্রাণ মহাপুরুষের পূজা করে না । অবোধ
 ইতালী ! এক দিন তোমাকে ইহার জন্ত গুরুতর অনুশোচনা
 করিতে হইবে ; এক দিন তোমাকে এই ঘোরতর পাপের
 ঘোরতর প্রারম্ভিত করিতে হইবে । ম্যাট্‌সিনি তোমাকে
 বে উচ্চ আদর্শে লইয়া বাইতে চাহিয়াছিলেন, তুমি আজ
 সেখানে বাইতে চাহিলে না ; কিন্তু কাল হউক, পরশ্ব হউক,
 এক দিন তোমায় সে স্থানের অভিনাযিণী হইতেই হইবে, তখন
 তোমার বক্ষ আবার ক্রুদ্ধ-কন্দনিত হইবে । এবার প্রধানতঃ
 বৈদেশিকগণের রক্তে তোমার বক্ষ কন্দনিত হইয়াছিল, সুতরাং
 তত ননোবেদনা পাও নাই । কিন্তু আগামী বারে উভয় পক্ষেই
 তোমার পুত্রগণ থাকিবে ; সেই রাজতন্ত্র ও সাধারণতন্ত্রের
 বিবাদে তোমার বক্ষঃ ক্ষত বিক্ষত হইবে । যদি সাধারণ-
 তন্ত্রের জয় হয়, তখন তুমি ম্যাট্‌সিনির পূজা আরম্ভ করিবে ।

প্যারিসবন্দীও প্রথমে সাধারণতত্ত্ববাদী ছিলেন, কিন্তু ভিটর উমানুইলের গুণে মুগ্ধ হইয়া বা উপায়ান্তর না দেখিয়া পরে রাজতান্ত্রিক হইয়াছিলেন। কিন্তু ম্যাট্‌সিনির চিত্তশল্যাকা চূষকশল্যাকার স্তায় সকল অবস্থাতেই সেই এক দিক্ লক্ষ্য করিয়াছিল। এই দিক্‌দর্শনের উপদেশ উল্লঙ্ঘন করিয়া বিপথ-গামী হওয়ার ফল ইতালীকে একদিন ভোগ করিতেই হইবে।

ভগবন্! অকৃতজ্ঞ ইতালী তোমার পূজা না করুক, পবিত্র-জাহ্নবী-সলিল-বিধৌত ভারতে তোমার পূজা আরম্ভ হইয়াছে। তুমি যে স্বজাতি-প্ৰেমের মস্ত্রে ইতালীয় যুবকগণকে দীক্ষিত করিয়াছিলে, আজ সেই মস্ত্রে ভারত-যুবক অনুপ্রাণিত হইয়াছে। তোমার সম্মীবনোবধে ভারতের শিরায় শিরায় জীবন সঞ্চার হইতে আরম্ভ হইয়াছে। মৃতোত্তিত ইতালীর স্তায় সম্মীবিত ভারতেও ক্রমে ক্রমে দুই একটি জীবন-লক্ষণ স্পষ্ট পরিব্যক্ত হইতেছে। যে শাক্যসিংহের মহিমা ভারত বুদ্ধিতে পারেন নাই বলিয়া, তাঁহার অনাদর করিয়াছিলেন, সেই শাক্যসিংহই আজ জগতের এক-তৃতীয়াংশের ঈশ্বর। সেইরূপ, তুমি ইতালীতে অনাদৃত হইয়াও, ভারতে পূজিত। দেব! তাই আজ ভারতযুবক তোমার সমাধিমন্দিরের দ্বারে উপস্থিত। চীন পরিত্রাজক যেমন বুদ্ধ গয়ার আসিয়া তীর্থ পর্য্যটনের চরম ফল লাভ করেন, আজ ভারতযুবকও তোমার সমাধি দর্শন করিয়া সেই ফল লাভ করিল। দেব! একবার উঠিয়া পদধূলি দেও। একবার দেখা দিয়া আশীর্ব্বাদ কর—
“ভক্তের মনোবাঞ্ছা পূর্ণ হউক” !।

জর্জ ওয়াসিংটন্।

পাঠক! এখন ইউরোপ ছাড়িয়া একবার আনেরিকার 'চল। ঐ দেখ! হুইজন মহাপুরুষ—ওয়াসিংটন ও পার্কার—মার্কিন ভূমির মুখ উজ্জ্বল করিয়া রাখিয়াছেন। প্রথমে যে মহায্যার নাম উল্লেখ করিলাম, ইনিই আনেরিকার দাসত্ব-বিমোচন করেন। ইহার জীবনী পাঠ করিলে, হৃদয় ভক্তিরসে আশ্রুত হয়। আমরা ইহারই জীবনী আলোচনা করিয়া আশ্রুতঃ সিবৃত্ত হইব।

যে সকল ইংরাজ-পরিবার ব্রিটিশ সিংহেব অত্যাচারে দ্বর্জ-ক্লিষ্ট হইয়া স্বদেশের মনতায় ভলাঞ্জলি দিয়া আটলান্টিক মহাসাগরের পাশ্চাত্য উপকূলে আশ্রয় গ্রহণ করেন, ওয়াসিংটনের পূর্বপুরুষ তাঁহাদিগের অন্যতন। ওয়াসিংটন বংশ ১৬৫৭ খৃঃ ভার্জিনিয়ায় আসিয়া বসতি করেন। ওয়াসিংটনের পিতা মেরিল্যান্ডেও যথেষ্ট বিষয়াদি করিয়াছিলেন, এবং মৃত্যুকালে সেই সমস্ত বিষয় তাঁহার ছয় পুত্রকে বিভাগ করিয়া দেন।

ওয়াসিংটন্ তাঁহার তৃতীয় পুত্র। ১৭৩২ খৃষ্টাব্দের ২২ শে ফেব্রুয়ারী তারিখে এই মহায্য জন্মগ্রহণ করেন। পিতার মৃত্যুকালে তাঁহার বয়স একাদশ বৎসর মাত্র হইয়াছিল। তিনি মেরিল্যান্ডের কোন সামান্য বিদ্যালয়ে বিদ্যা শিক্ষা করিয়াছিলেন। তথাপি তিনি ত্রিকোণমিতি ও জরিপ বিষয়ে বিশেষ পারদর্শিতা লাভ করিয়াছিলেন। বিদ্যালয় ছাড়িয়া তিনি একান্তমনে কেবল গণিত-বিজ্ঞানের আলোচনার নিযুক্ত হইলেন। তিনি লরেন্স নামক ভ্রাতার ভার্গন্-গিরিস্থিত আবাসে

শীতকাল যাপন করিতেছিলেন, এমন সময়ে লর্ড ফেয়ার-
ক্যাম্পের চিত্ত আকৃষ্ট করিলেন। লর্ড ফেয়ারফ্যাক্স গণিত-
বিজ্ঞানে ও জরিপ কার্যে তাঁহার সুবিশেষ অভিজ্ঞতা দেখিয়া,
পটোমাক নদীতীরস্থিত সুবিশাল ভূমিরূপের জরিপ কার্যে
তাঁহাকে নিযুক্ত করিলেন। তিনি এই কার্যে একরূপ সূচাক্রমে
সম্পন্ন করিলেন যে অতিরিকাল-মধ্যে গবর্ণমেন্টের সৰ্ভেয়ারের
পদে নিযুক্ত হইলেন। এই কার্যে থাকিয়া তাঁহাকে
ক্রমাগত তিন বৎসর আলিঘানি পর্বতের নিবিড় অরণ্য মধ্যে
বিসরণ করিয়া বেড়াইতে হইরাছিল। সেই সময়ে আমেরি-
কার প্রায় সকলেই রাজতান্ত্রিক ছিলেন। ওয়াসিংটনেরও
রাজভক্তি এই সময় অচলা ছিল।

যখন হউনাইটেড্ স্টেট্‌সের প্রাস্তানীমা আদিম অধিবাসিগণ
কর্ডক আক্রান্ত হইবার সম্ভাবনা উপস্থিত হয়, এবং ফ্রান্সের
সহিত ইংলণ্ডের যুদ্ধ বাধিবার উপক্রম হয়, তখন ভার্জিনীয়া
ভাবী বিপদের আশঙ্কায় সামরিক প্রদেশ সকলে বিভক্ত হয়।
এই সময়ে ওয়াসিংটন্ মেজরের পদে অভিষিক্ত হইয়া একটী
প্রাদেশিক সেনার অধিনায়কত্ব প্রাপ্ত হন। ১৭৫৪ খৃষ্টাব্দে
তিনি ভার্জিনীয় উপসেনার * দ্বিতীয় অধিনায়কত্ব প্রাপ্ত হন।
এই বৎসরেই প্রীমের প্রারম্ভে ফ্রান্সের সহিত যুদ্ধ বাধিয়া উঠে।
এই সময়ে ফরাসি সেনাপতি কর্ণেল জুমোন্‌ভিলের অধীনস্থ
ফরাসি সেনার সহিত তাঁহার প্রথম সশুধ-যুদ্ধ হয়। এই যুদ্ধে
ফরাসি সেনা পরাজিত হয় ও ফরাসি সেনাপতি হত হইলেন।
এই বিজয়ের জন্ত তিনি ভার্জিনীয়ার ব্যবস্থাপক সভা হইতে

Militia. নাগরিক সৈন্য বাহা কেবল যুদ্ধকালে আহৃত হয়।

ধন্যবাদ প্রাপ্ত ও ভার্জিনীয় উপসেনার প্রধান নেতৃত্ব-পদে অভিষিক্ত হন । তিনি সেনাপতি পদে বৃত্ত হইয়া একরূপ কৌশল ও দক্ষতার সহিত পশ্চাৎপাদ হইয়া মহতী ফরাশি সেনার করাল গ্রাস হইতে, আত্মরক্ষা করিয়াছিলেন যে, ব্যবস্থাপক সমাজ তাঁহাকে ধন্যবাদ না দিয়া থাকিতে পারেন নাই ।

১৭৫৫ খৃষ্টাব্দে ওয়াশিংটন্ সেনাপতি ব্রাডকের সহযোগী হইয়া যুদ্ধে গমন করেন । এই যুদ্ধে তাঁহাদিগের পরাজয় ও সেনাপতির মৃত্যু হয় । এই দুর্ঘটনার পরে তিনি ভার্ননস্থ গৈরিক আবাসে প্রত্যাপত হন । ওয়াশিংটনের ভ্রাতা লরেন্সের মৃত্যুতে ভার্ননগিরিস্থিত তাঁহার ষাবদীর বিষয় উত্তরাধিকারস্থত্রে তাঁহার হস্তগত হয় । এই সম্পত্তি হস্তে পাইয়া তিনি বিস্তৃত আকারে আতিথ্য ক্রিয়া আরম্ভ করিলেন । আমেরিকার আদি ইংরাজ ঔপনিবেশিকেরা অতিথি-সংকারকার্যে বিশেষ আস্থাবান ছিলেন বলিয়া প্রসিদ্ধি ছিল । ওয়াশিংটন পূর্বপুরুষগণের সেই কীর্তি বজায় করিলেন । এই সময়ে ১৭৫৯ খৃঃ তিনি জষ্টিস নামক কোন ব্যক্তির বিধবা রমণীকে বিবাহ করেন ।

এই সময়ে তিনি বিপুল সম্পত্তির অধীশ্বর ও সবিশেষ মান্য গণ্য হইয়া উঠিলেন । এইরূপে সুখে ও স্বচ্ছন্দে তাঁহার বহুদিন অতীত হইল । যে সকল অমাত্যগণে তিনি পরে জগতে উজ্জল ও অক্ষয় কীর্তি লাভ করেন, এখনও সে সকলের তাদৃশ কোন আভাস পাওয়া যায় নাই । যে জাতীয় স্বাধীনতা-সমর উপলক্ষে তাঁহার সেই সকল গুণ বিকাশ প্রাপ্ত হয়, এবং যে সকল কারণে সেই সময়ের উৎপত্তি, আমরা এক্ষণে তদ্বিষয়ে কিঞ্চিৎ বলিব ।

আদিম অধিবাসী ও ক্রাসিদিগের সহিত সমরে ইউনাই-

টেড্‌ ষ্টেটসের সমূহ ক্ষতি হয়। বিখ্যাতনানা সেনাপতি উল্ফ এই সমরে হত হন। পীড়ায় ও শত্রুর অজ্ঞাবাহতে প্রায় ত্রিশ সহস্র জাতীয় সৈন্তের প্রাণ বিনষ্ট হয়। জাতীয় ঋণ চল্লিশ কোটি টাকায় পরিণত হয়। এই সময়ের আংশিক ব্যয় নির্বাহার্থ ইংলণ্ডকেও চতুর্দশ কোটি টাকা ঋণগ্রস্ত হইতে হইয়াছিল, এবং বিজয়লব্ধ রাজ্য সকল সুপ্রতিষ্ঠিত রাখিবার জন্য উপনিবেশে স্থায়ী সেনা রাখিতে হইয়াছিল।

যখন সমরে কোলাহল তিরোহিত হইল, যখন শেষ কামানের শব্দ শূন্যে মিশাইয়া গেল, যখন সমরে হত বীরবৃন্দ আপন আপন সমাধি-শয্যায় শয়ান হইয়া চির-নিদ্রায় আচ্ছন্ন হইলেন, যখন আহত সৈন্ত সকল আপন আপন গৃহে আসিয়া পরিবারবর্গকে আনন্দাশ্রুতে ভাসাইল, যখন মহাতেজা পার্কীয় সেনা আদিম অধিবাসিগণের নিভৃত স্থান সকলের আলোড়নে বিরত হইয়া আপন আপন সৈন্তাবাসে আশ্রয় গ্রহণ করিল, সংক্ষেপতঃ যখন সমস্ত আমেরিকায় শান্তি বিরাজিত হইল, তখন ইংলণ্ড ও আমেরিকা ভাবিবার সময় পাইয়া বিগত যুদ্ধের ক্ষতি লাভ গণনা আরম্ভ করিলেন। তাহারা দেখিলেন, যদিও বিজয়লব্ধী তাঁহাদিগের করতলস্থ হইয়াছে, যদিও তাঁহাদিগের বিজয়গৌরবে জগৎ ঝলসিত হইতেছে, তথাপি তাঁহারা বিশেষ লাভবান হইতে পারেন নাই, বরং প্রভূত পরিমাণে জাতীয় রুধির ও জাতীয় অর্থ ব্যয়িত হওয়ায় তাঁহারা দুর্বল হইয়া পড়িয়াছেন। এ দিকে ইংলণ্ড এই সুযোগে জাতীয় ঋণ পরিশোধচ্ছলে আমেরিকার নিকটে সাহায্য প্রার্থনা করিলেন।

এ দিকে বিগত সমরে আমেরিকাও সর্বস্বাস্ত হইয়া পড়িয়া ছিলেন। সুতরাং তাঁহারা একরূপ প্রার্থনায় বড় সন্তুষ্ট হইতে পারিলেন না। তাঁহারা দেখিলেন যে, জাতীয় ক্রোধের ও জাতীয় অর্থে তাঁহারা এই বিজয় লাভ করিলেন। কিন্তু ইংলণ্ড আংশিকমাত্র এই ব্যয়ভার বহন করিয়া এই বিজয়ের পূর্ণ ফলভোগী হইতেছেন। তথাপি তাঁহার দুঃস্বাদ মন পরিতৃপ্ত হইতেছে না। তিনি আমেরিকার উপরে কর ধাৰ্য্য করিয়া সেই আংশিক ক্ষতি পূরণ করিবার চেষ্টা করিতেছেন। আমেরিকা এত দিন আপনাকে দুর্বল বলিয়া জানিতেন, সুতরাং ইংলণ্ডের সমস্ত অত্যাচার মুখ বুজিয়া সহিয়াছিলেন। কিন্তু আজ আমেরিকা আপনার বল জানিতে পারিয়াছেন। সুতরাং ইংলণ্ডের অত্যাচার এখন তাঁহার দুর্ভিক্ষ বলিয়া বোধ হইল। বিগত সমরে ঔপনিবেশিকেরা বিশেষ বীরত্ব দেখাইয়াছিলেন। তাঁহারা স্বচক্ষে দেখিয়াছিলেন যে, বন্দুক ধারণে ও কামান চালনে ইংলণ্ডীয় সেনা অপেক্ষা তাঁহারা কিছুতেই নূন নহেন। বিশেষতঃ তাঁহারা রণে একরূপ অভ্যস্ত হইয়া পড়িয়াছিলেন যে, সমর-নিবৃত্ত থাকা যেন তাঁহাদিগের পক্ষে কিছু ক্লেশকর হইয়া পড়িয়াছিল। আজ রণক্ষেত্র আমেরিকবাসিগণের নিকট ক্রীড়াপ্রাঙ্গণস্বরূপ অনুমিত হইতেছে। এই আভ্যন্তরীণ বল বৃদ্ধিতে পারিয়াই আজ আমেরিকা ইংলণ্ডের সর্বস্বতোমুখী প্রভুতায় আপত্তি করিলেন।

ঔপনিবেশিকেরা দেখিলেন—ইংলণ্ড আমেরিকাকে সাম-
রিক বিদ্যালয়ে পরিণত করিয়াছেন। সীমান্ত প্রদেশের রাজ্য
নকলের সহিত অকারণে যুদ্ধ বাধাইয়া আমেরিকার ব্যয়ে ও

আমেরিকার বক্ষে কতকগুলি ইংরাজসৈন্য ও কতিপয় ইংরাজ সেনাপতিকে রণদীক্ষিত করিয়া লইতেছেন। আজ আমেরিকা আপনার বল বৃদ্ধিতে পারিয়াছেন, তাই ইহা তাঁহার অসহ্য হইয়া উঠিল।

ইংলণ্ডের মনে মনে অভিমান ছিল, আমেরিক ঔপনিবেশিকেরা তাঁহার সন্ততি, তাঁহার যত্নে প্রতিষ্ঠাপিত, তাঁহার আদরে পরিবর্দ্ধিত, এবং তাঁহার বাহুবলে পরিরক্ষিত। ইউনাইটেড ষ্টেটসের কোষাধ্যক্ষ এই চিরলালিত অভিমানের প্রভুত্বেরে লিখিয়াছেন—“ইংলণ্ড তুমি বলিয়া থাক যে, আমরা তোমার যত্নে আমেরিকায় স্থাপিত! না, এ কথা সত্য নহে—বরং তোমারই দৌরাণ্ড্যে আমরা আমেরিকায় অধিবাসিত! তুমি বল, আমরা তোমার স্নেহে লালিত! না, বরং তোমারই অবহেলায় পরিপুষ্ট। তুমি শ্লাঘা করিয়া থাক—আমরা তোমারই বাহুবলে পরিরক্ষিত! না ইংলণ্ড! বরং তোমারই গৌরব রক্ষা করিতে গিয়া আমরাগকে জাতীয় ক্রোধ ও জাতীয় অর্থ ব্যয় করিতে হয়!”

এইরূপ ভাব এই সময় আমেরিকাবাসী সাধারণের অন্তরে প্রবল হইয়া উঠিয়াছিল। আমেরিকার আদিম ঔপনিবেশিকগণ সকলেই সাধারণতান্ত্রিক ছিলেন। রাজা দেবানুগৃহীত, তিনি মানব নিয়মের অধীন নহেন—ইত্যাদি রাজতান্ত্রিক মত সকল তাঁহাদিগের হৃদয়ে স্থান পায় নাই। তাঁহারা সংখ্যায় দুর্বল বলিয়াই অগত্যা ইংলণ্ডের আধিপত্য স্বীকার করিয়াছিলেন, কিন্তু তাঁহাদিগের সন্তানগণ এখন আত্মবল বুদ্ধিগায়ে অধীনতাশৃঙ্খল ভেদ করিতে কৃতসঙ্কল্প হইলেন।

এদিকে ইংলণ্ডের লোকে ভাবিতে লাগিলেন, ‘আমেরিকা ইংলণ্ডের উপনিবেশমাত্র ; সকল বিষয়েই মাতৃরাজ্যের মুখাপেক্ষী ; তবে তাঁহার আদেশ মাথা পাতিয়া পালন না করিবে কেন ?’ এই ভাবিয়া তাঁহারা আইনের উপর আইন জারি করিয়া আমেরিকাকে অষ্টপৃষ্ঠে বাঁধিবার চেষ্টা করিতে লাগিলেন । একটা আইন জারি হইল যে, কেহ ইংলণ্ডীয় জাহাজ বাতীত অন্য জাহাজে করিয়া উপনিবেশ হইতে ইংলণ্ডে মাল আমদানি করিতে অথবা ইংলণ্ড হইতে উপনিবেশসমূহে মাল রপ্তানি করিতে পারিবে না । ইহাতে ইংলণ্ডীয় বাণিজ্যপোতের অধ্যক্ষগণ অতিশয় ধনবান্ হইয়া উঠিতে লাগিলেন । কতকগুলি হুন্নীতিকর নিষেধক আইন জারি হইল যে, যে সকল গাছের তক্তায় জাহাজ নির্মিত হয়, আপন আপন সীমার বহির্ভূত এমন গাছ কেহ কাটিতে পাইবে না ; কেহ লোহার কারখানা করিতে পারিবে না ; কেহ ইস্পাত প্রস্তুত করিতে পারিবে না ; যে দেশ বীবরে পরিপূর্ণ, সে দেশের কেহ বীবরের টুপি তৈয়ার করিতে পারিবে না ; কোন কারবারী এক সময়ে দুই জনের অধিক শিক্ষানবিশ রাখিতে পাইবে না ইত্যাদি । এদিকে বিলাতী মদ ও চিনি প্রভৃতির আমদানী বাড়াইবার জন্য দেশীয় চিনি, গুড় ও মদ প্রভৃতির উপরে বেজার শুল্ক নির্দিষ্ট করা হইল । এই সকল আইন অকেজো হইয়া পড়িয়া না থাকে, এই জন্য সন্ধিগ্ধ ব্যক্তি মাত্রেয় ঘরে খানাতল্লাসী আরম্ভ হইল । এই সকল দুর্কিষহ অত্যাচারে লোকে জর্জরীভূত,—এমন সময় ১৭৬৪ খৃষ্টাব্দে ষ্ট্যাম্প আইন প্রস্তাবিত হইল । পূর্বে দলিল পত্র ও আদালতের দরখাস্তাদি সাদা

কাগজে লিখিলেই হইত ; কিন্তু এই আইন অনুসারে সকলকেই সাদা কাগজের পরিবর্তে ষ্ট্যাম্পযুক্ত কাগজ ব্যবহার করিতে হইবে। সংবাদ পত্র, সাময়িক পত্রিকা, পঞ্জিকা প্রভৃতিরও উপরে শুদ্ধ নির্দ্ধারিত হইল। এই আইনের পাণ্ডুলিপি ব্রিটিশ পার্লামেন্টে অবতারণিত হইয়া আমেরিকাবাসিগণের ক্রোধানলে যতাহাতি প্রদান করিল। আমেরিকা এক্ষণে একবাক্যে ও যুক্তকণ্ঠে ব্রিটিশ পার্লামেন্টের এ অধিকার অস্বীকার করিলেন, কিন্তু ইংলণ্ডের জর্জ কিছুতেই বিচলিত হইবার লোক ছিলেন না। তাঁহার প্রভাবে ষ্ট্যাম্প আইন হাউন্স অব কমন্স ও হাউন্স অব লর্ডস্ উভয়ত্রই অবিসংবাদিত ভাবে পাশ হইল। ভবিষ্য অভ্যুত্থানের সম্ভাবনায় ইহার সঙ্গে সঙ্গে একটা বিদ্রোহ-আইনও পাশ হইয়া গেল। যদি আমেরিকার কোন অংশে বিদ্রোহ উপস্থিত হয়, তাহা নিবারণ করিবার জন্য ইংলণ্ড তথায় যত সৈন্য প্রেরণ করিবেন, এই আইনের বিধানানুসারে তথাকার অধিবাসিগণকে তাহাদিগের জন্য উপযুক্ত বাসস্থান, স্নাকোমল শয্যা, স্নানধার পানীয়, শুষ্ক কাঠ, স্নুগন্ধি সাবান ও স্নানিঞ্চল বাতি প্রদান করিতে হইবে।

এই কঠোর আইন জারি হওয়ায় বেন্জামিন্ ফ্রাঙ্কলিন্ প্রভৃতি মনীষীর হৃদয় বিকম্পিত হইল। তিনি কোন প্রিয়-বন্ধুর নিকটে লিখিয়া পাঠাইলেন, “আমেরিকার স্বাধীনতাস্বা অনন্তকালের জন্য অন্তমিত হইল ! এক্ষণে শ্রমশীলতা ও মিতব্যয়িতার বাতি জালিয়া কথঞ্চিৎ জীবন ধারণ করা ভিন্ন আমাদিগের আর কোন আশা নাই !” সাহসিকতর প্রিয়বন্ধু প্রত্যুত্তরে লিখিয়া পাঠান — “ভাই ! এক্ষণে আমাদিগকে অন্য-

প্রকার বাতি জালিতে হইবে।” প্রত্যুত এই ঘটনার পরেই আমেরিকার সর্বত্র বিদ্রোহানল জলিয়া উঠিল ।

এই সময়ে ক্যাড্ডওয়ালার কোল্ডেন্ নামক এক জন অশীতিবর্ষবয়স্ক ইংরেজ নিউইয়র্কের গবর্ণর ছিলেন । অতি পবিত্রচরিত ও উদারপ্রকৃতি বলিয়া ইহাকে সকলেই শ্রদ্ধা করিত । ইহার সমিতির সভ্যগণও অতি উচ্চমনাঃ ছিলেন । এরূপ মন্ত্রিগণ-পরিবেষ্টিত হইয়াও এবং এরূপ মহদাশয় হইয়াও এই প্রবীণ শাসনকর্তাকে রাজশাসনের অনুরোধে লোক সাধারণের অভ্যুত্থানের প্রতিকূলে দণ্ডায়মান হইতে হইয়াছিল । ইতিহাসে এই জন্য তাঁহার নাম স্বাধীনতার শত্রু বলিয়া কলঙ্কিত হইয়াছে । তিনি স্বাধীনতার প্রতিকূলে দণ্ডায়মান হইলেন বটে, কিন্তু সে গতিরোধ করা তাঁহার সাধ্যাতীত হইয়া পড়িল । স্বাধীনতার অনুকূল সম্প্রদায় চতুর্দিকে দলবদ্ধ হইতে লাগিলেন । সংবাদপত্র সকল নিষ্পোক পরিত্যাগ পূর্বক অকুতোভয়ে আমেরিকার স্বাধীনতা ঘোষণা করিতে লাগিল । ইংলণ্ডের সহিত বিচ্ছেদ অপরিহার্য হইয়া উঠিয়াছে, এই কথা তাঁহার নুজুকণ্ঠে বলিতে লাগিলেন । ১লা নবেম্বর ষ্ট্যাম্প আইন প্রচারের দিন স্থির ছিল । সেই দিন যত নিকটবর্তী হইতে লাগিল, ততই আমেরিকার অধিবাসিগণ অধীর হইয়া উঠিতে লাগিলেন । চতুর্দিকে সভা বসিতে লাগিল, পথ ঘাট লোকে পরিপূর্ণ হইল । আবাল বৃদ্ধ বনিতা দেশের জন্য, স্বাধীনতার জন্য—প্রাণ বিসর্জন করিতে দৃঢ়প্রতিজ্ঞ হইল । ধন্য স্বজাতিপ্রেম ! ধন্য স্বদেশানুরাগ !

৩:এ অক্টোবর একটা মহতী জাতীয় সভার অধিবেশন

হইল। এই সভায় ষ্ট্যাম্প আইনের বিরুদ্ধে ব্রিটিশ পার্লে-
মেন্টের নিকটে এক খান আবেদন পত্র পাঠান হইল।
দেশের সমস্ত বড় লোক ইহাতে স্বাক্ষর করিলেন। জেন্স
ইভার্স নামক এক ব্যক্তি ষ্ট্যাম্প বিলি করিবার ভার প্রাপ্ত
হইয়া ইংলণ্ড হইতে আসিয়াছিলেন। 'র্তাহাকে অগত্যা কয়েক
পরিত্যাগ পূর্বক দেশে ফিরিয়া যাইতে হইল।

নিউইয়র্কের দুর্গের নাম ফোর্ট সেন্ট জর্জ। ২৩এ অক্টোবর
ইংলণ্ড হইতে নূতন ষ্ট্যাম্প সকল আসিয়া এই দুর্গে সংরক্ষিত
হইলে, এই দুর্গের উপর আক্রমণ সম্ভাবনা করিয়া ইংরাজেরা
ইহার রীতিমত জীর্ণ সংস্কার করিলেন, এবং ইহাকে পূর্বাভিক্ষা
অধিকতর সুসংরক্ষিত করিয়া লইলেন। দুর্গের কানানউলিহ
মুখ নগরাভিমুখে সংস্থাপিত হইল, এবং ইংলণ্ডীয় রণতবি সকল
বগসজ্জায় সজ্জিত হইয়া নগরের বন্দরে আসিয়া লাগিল।
নিউইয়র্ক অবরুদ্ধ নগরীর আকার ধারণ করিল। কিন্তু
আমেরিকাবাসীরা ইহাতে ভীত না হইয়া দলে দলে নগরে
আসিয়া জুটিতে লাগিলেন। যিনি—যে অস্ত্র পাইলেন, লইয়া
নগরাভিমুখে ধাবিত হইলেন। ব্রিটিশ কমানরাজি যেন
মস্ত্রৌষধিরুদ্ধবীর্যে সপের ন্যায় অকণ্ঠ্য হইয়া রহিল। কেন
না শত্রু হইলেও ইংরাজসেনাপতির এত লোকের উপরে গোলা
চালন করিতে হৃদয় বাধিত হইল। ক্রমে জনতা এত বাড়িয়া
উঠিল যে ইংরাজেরা বিদ্রোহিদিগের হস্তে সমস্ত ষ্ট্যাম্প অর্পণ
করিতে বাধ্য হইলেন। অবশেষে ইংলিশ পার্লেমেন্টকে ষ্ট্যাম্প
আইন অগত্যা রহিত করিতে হইল। কিন্তু অবিলম্বে আর
একটি আইন জারি হইল; তাহা তুল্যরূপ দূষিত ও তুল্যরূপ

অপত্তিকর। এই আইন কাচ, কাগজ ও প্রধানতঃ 'চা'র উপরে কর ধাৰ্য্য করিয়া দিল। ইষ্ট ইণ্ডিয়া কোম্পানিকে অহুমতি দেওয়া হইল—ইংলণ্ডের যে চা তাঁহারা আমেরিকায় পাঠাইতেন, আমেরিকাবাসিদিগকে সেই 'চা'র উপরে প্রতি পাউণ্ডে তিন পেন্স করিয়া শুদ্ধ দিতে হইবে। কিন্তু আমে-
বিকাবাসীরাও প্রতিজ্ঞা করিলেন যে, ঐ চা কখনই আমেরিকায় নামাইতে দিবেন না।

প্রতিভেন্স প্রদেশের অধিবাসীরাই নর্সপ্রথমে এই চাব আন্দোলনের বিরুদ্ধে অভ্যুত্থিত হইল। এক দিন নগরের মধ্যে ঘোষণা হইল—‘যিনি যে চা কিনিয়াছেন, লইয়া বাজারে আনি-
বেন’; আত্ম রাত্রি দশটার সময়ে সেখানে এক অদ্ভুত অগ্নিকাণ্ড উপস্থিত হইবে। অধিবাসীরা দঙ্কেত বৃত্তিতে পারিয়া সকলে যৎসময়ে যৎস্থানে আশিয়া চা সমপণ করিল। রাত্রি দশটার সময়ে চা-স্বূপে অগ্নিপ্রদান করা হইল। বিশ্বাবসুর প্রচণ্ড শিখায় দশ দিক্ আলোকিত হইল। লোকে নঙ্কল করিল, কিছুতেই বাজারে চা আনিতে দিবে না। যদি কোন ইংরাজ বণিক্ সশস্ত্র-পুরুষ-পরিরক্ষিত অবস্থায় চা আনিয়া বাজারের গুদামে রাখিত, ভমনি রাত্রিতে গুদামে আগুন লাগিত। ফিলাডেল্ফিয়া নগরে চার জাহাজগুলি নদীমুখেও প্রবেশ করিতে সাহস করিল না। যেমন অবস্থার আসিয়াছিল, সেই অবস্থার ইংলণ্ডে ফিরিয়া গেল। নিউইয়র্কে সেনার সাহায্যে চা নামান হইল বটে, কিন্তু কেহ চা কিনিল না। কারণ, ঘোষণা হইয়াছিল যে, যে চা কিনিবে, তাহার মস্তক যাইবে।
চার্লস্ টাউনেও ঐ রূপে চা নামান হইল, কিন্তু ক্রেতা না

জুটায়, চা শুদামে পড়িয়া পড়িতে লাগিল, এবং অবশেষে অগ্নি-
লিঙ্গ হইল। বোষ্টনেই সর্বাপেক্ষা অধিক গোলবোগ উপস্থিত
হয়। এখানে গবর্ণর ও তাঁহার বন্ধুবর্গের উদ্দেশে চা পাঠান
হয়। স্মরণ্য ইহা নামাইবার জন্য বিশেষ উদ্যোগ হইবে
ভাবিয়া, লোকে বিশেষ প্রতিবিধানের চেষ্টা করে। এক সুবি-
মল প্রশান্ত রজনীতে 'চা'র জাহাজগুলি বোষ্টনের বন্দরে আসিয়া
লাগিল। যেমন বন্দরে আসিয়া লাগিল, অমনি তিন শত বোষ্টন-
বাসী বালক ছদ্মবেশে সেই সকল জাহাজের উপরে গিয়া পড়িয়া
চার বাগ্নগুলি ভাঙ্গিয়া চুরিয়া সব কুপকাপ করিয়া জলে
ফেলিয়া দিল। বন্ধকেরা প্রথমে বাধা দিয়াছিল, কিন্তু সে
অগ্নিফুলিঙ্গ গুলির নিকট পরাস্ত হইয়া শেষে চিত্রাৰ্পিতের ন্যায়
দাঁড়াইয়া দেখিতে লাগিল। এইরূপে তিন শত বত্রিশটি বাক্স
ভগ্ন ও জলে প্রক্ষিপ্ত হইল।

এই বার ইংলণ্ড পদদলিত ফণীর নায় গর্জিয়া উঠিল। এই
সংবাদ ইংলণ্ডে পৌঁছিবামাত্র স্থির হইল যে—যে কোন রকমে
হটক, উপনিবেশগুলিতে ইংরাজ-প্রভুতা ও আইনের মর্যাদা
পুনঃস্থাপিত করিতেই হইবে। বোষ্টনের ধ্বংস স্থিরীকৃত হইল।
বোষ্টনের উপরে হুকুম জারি করা হইল যে, যত চা নষ্ট করা
হইয়াছে, সমস্তের মূল্য দিতে হইবে। বোষ্টনের সহিত
সর্ববিধ বাণিজ্য নিষিদ্ধ হইল। কষ্টম হাউস প্রভৃতি সালেমে
লইয়া যাওয়া হইল। কিন্তু সে বাণিজ্যে সালেমের লোকে
বোষ্টনের প্রতিবন্দী হইতে চাহিল না। সমস্ত আমেরিকা
বোষ্টনের সহিত সহানুভূতি দেখাইতে লাগিল। চতুর্দিকে
লোক সকল এ নগর হইতে ও নগরে যাইতে লাগিল। মর্কজ

বিশ্বব্যাপী অনন্তোষ ও বিরাগের ভাব পরিলক্ষিত হইতে লাগিল। বহুদিনসংক্রান্ত ক্রোধ, স্বজাতিপ্রেম, স্বাধীনতা-স্পৃহা যুগপৎ উদ্দীপিত হইয়া সমস্তজাতিকে যেন একশরীরী করিয়া 'ইংবাজদিগের বিরুদ্ধে অভূষিত করিল।

বোষ্টনে আর একটী ঘটনায় সন্ধুক্তিত বিদ্রোহানল আরও প্রজ্বলিত হইয়া উঠিল। এক দিন ইংরাজ সৈনিকগণের সহিত নগরবাসীদিগের হাতাহাতি বাধিল, তাহাতে জাতীয় রক্ত পতিত হইল। শীতল ধবল বরকের উপরে সেই লোহিত রক্ত পতিত হইয়া যেন ইংলণ্ডের ধবলযশে কলঙ্কারোপ করিল। এই ঘটনায় সমস্ত আমেরিকা অগ্নিময় হইয়া উঠিল। ইংলণ্ডের ন্যায়পরতা, জাতীয় গৌরব, মনুষ্যত্ব—সমস্ত যেন আটলান্টিক গর্ভে নিমজ্জিত হইল। সমস্ত আমেরিকা সম্মুখে এই ঘটনার প্রতিবাদ করিলেন। সে স্বয়ং আটলান্টিক বন্ধ বিদারিয়া ইংলণ্ডে গমন করিল। কিন্তু ইংলণ্ডের হৃদয় ইহাতে গলিত হইল না। ইংলণ্ড আমেরিকার স্বাধীনতার ধ্বংস সাধনে কৃতসঙ্কল্প হইলেন। উভয় পার্লেমেণ্টেই ইংলণ্ডের তৃতীয় জর্জকে বুঝাইলেন যে, আমেরিকা অনেক দিন হইতে স্বাধীনতার জন্য স্থির-সঙ্কল্প হইয়াছিল; কেবল সামর্থ্য ও সুবিধার জন্য অপেক্ষা করিতেছিল। এখনে সেই সামর্থ্য স্বাধীনতা-স্পৃহাকে সত্যকাগারেই বিনাশ করা প্রত্যেক ইংরাজেরই অবশ্য কর্তব্য কর্ম; সুতরাং যে কোন দুলো ও যে কোন বিপদে হউক, ইহা প্রত্যেক ইংরাজেরই সাধনীয়।

এদিকে আমেরিকাবাসীরাও আত্মরক্ষার জন্য প্রস্তুত হইতে লাগিলেন। প্রাচ্যগগনে ভীষণ মেঘ উঠিয়াছে দেখিয়াই,

তঁাহারা স্থির করিলেন যে পশ্চিমাভিমুখে প্রবল ঝটিকা বহিবে । নানা স্থানে জাতীয় সভার অধিবেশন হইতে লাগিল । সকলেই যুক্ত হস্তে টাকা দিতে লাগিলেন । দলে দলে সৈন্য সংগৃহীত হইতে লাগিল । বৈপ্লবিক কর্মচারিগণ মনোনীত হইতে লাগিলেন । আমাদের প্রবন্ধের অধিনায়ক জর্জ ওয়ানিংটন সেনাপতির পদে অভিষিক্ত হইলেন । আমেরিকা এতদিন অনেক কোমল উপায় অবলম্বন করিয়া ব্যর্থ হইয়া এক্ষণে শাণিত্ব দ্বারা অন্তঃপরীক্ষা করিতে বদ্ধপরিকর হইলেন ।

ফিলাডেল্ফিয়া নগরে একটি জাতীয় মহতী সভার অধিবেশন হইল । আমেরিকাবাসীরা এগনও প্রকাশ্যরূপে ইংলণ্ডের বিরুদ্ধে যুদ্ধ ঘোষণা করিলেন না বটে, কিন্তু তঁাহারা জাতীয় দায়িত্বে পণ সংগ্রহ ও অতি দ্রুত সহকারে যুদ্ধের আয়োজন করিতে আরম্ভ করিলেন ।

তখন ব্রিটিশ সেনাপতি গেজ্ সাহেব বোষ্টন্ নগরে অবস্থিতি করিতেছিলেন । পাছে তিনি সৈন্য আমেরিকার অভ্যন্তরে প্রবেশ করেন, এই ভয়ে আমেরিকাবাসীরা তঁাহাকে বোষ্টন্ নগরে অবরুদ্ধ করিতে কৃতসংকল্প হইলেন । জর্জ ওয়ানিংটনের হস্তেই এই গুরু ভার পড়িল । আমেরিকানেরা বোষ্টন্ অবরুদ্ধ করিবে, এই সংবাদ যখন বোষ্টনে উপস্থিত হইল, তখন ইংরাজেরা কিঞ্চিৎ বিস্মিত হইলেন । তঁাহারা এ কথা কিছুতেই বিশ্বাস করিতে পারিলেন না । তঁাহারা ভাবিলেন, যখন তঁাহাদিগের পুঞ্জীকৃত খাদ্যসামগ্রী রহিয়াছে, ও নগর দুর্গ-সংরক্ষিত রহিয়াছে, তখন বিদ্রোহীদিগের নিকট হইতে তঁাহাদিগের কোন ভয়ের আশঙ্কা নাই । অপর ব্রিটিশ সেনাপতি

হাউএরও এই বিশ্বাস ছিল। সুতরাং নির্কাণোগোবুখী দীপ-
 শিখার ন্যায় তাঁহাদিগের প্রমোদ-প্রিয়তা এই মুমূর্ষুকালে
 অতিশয় প্রদীপ্ত হইয়া উঠিল। এই সময় একটী রঙ্গালয়
 নিম্নিত হইল; বলের * ধূম পড়িল গেল! প্রহসন,
 বার্লেস্ক, মাস্কুইরেড্ প্রভৃতির জন্য ধড়াধড় চাঁদা উঠিতে
 লাগিল। উক্ত রঙ্গালয়ে একরজনীতে 'বোষ্টন অবরুদ্ধ' নামক
 একখানি প্রহসন প্রণীত ও অভিনীত হইতেছিল। তাহাতে
 একটী দৃশ্যে সেনাপতি ওয়াসিংটনকে বিকলাঙ্গ অবস্থায় একটী
 প্রকাণ্ড পরচলা মাথায় দিয়া একখানি মর্চ ধরা তরবার হস্তে
 একজন মাত্র পুরাতন বন্দুকধারী ভৃত্য সমভিব্যাহারে রঙ্গমণ্ডে
 অবতারিত করা হইয়াছিল। এই অংশটুকুর অভিনয় হইতেছে,
 এমন সময় একজন সার্জন সহসা রঙ্গস্থলে আসিয়া উচ্চৈঃ-
 স্রবে জানাইল যে, আমেরিকানেরা আসিতেছে। দর্শকমণ্ডলী
 প্রথমে ইহা অভিনয়ের অংশ মনে করিয়া অসম্ভব হাসিয়া
 উঠিল। কিন্তু অচিরকাল-মধ্যেই তাঁহাদিগের সে ভ্রম দূরী-
 কৃত হইল। সেনাপতি হাউ মুহূর্ত্ত মধ্যে আসিয়া সূদৃঢ় ও
 গম্ভীর স্বরে আদেশ করিলেন "কর্মচারীগণ! অবিলম্বে শশস্ত্র
 আপন আপন স্থানে গমন কর।" সেই হর্ব, সেই প্রমোদ,
 সহসা বিষাদে পবিণত হইল (Jest became earnest.)। যথার্থই
 তখন বোষ্টন অবরুদ্ধ হইয়াছিল, যথার্থই ওয়াসিংটন সৈন্য
 ব্রিটন্দিগকে আসিয়া ঘিরিয়াছিলেন। বোষ্টনের অবরোধ
 কয়েক মাস ধরিয়া রহিল। বঙ্কার্স পাহাড়ে ইংরাজদিগের
 সহিত আমেরিকানদিগের একটী যুদ্ধ হয়, তাহাতে বিজয় লক্ষ্মী

আমেরিকানদিগেরই অঙ্কশায়িনী হন। ইংরাজেরা ওয়াশিংটনের নিকট প্রস্তাব করিলেন যে, যদি তাঁহাদিগকে অক্ষত শরীরে নগর ছাড়িয়া যাইতে দেন, তাহা হইলে তাঁহারা নগরের কোন ক্ষতি না করিয়া নগর ছাড়িয়া চলিয়া যাইতে প্রস্তুত আছেন। ওয়াশিংটন এ প্রস্তাবে সম্মত হইলেন। তদনুসারে ইংরাজেরা ১৭৭৬ খ্রীষ্টাব্দের ১৭ই মার্চ নগর পরিত্যাগ পূর্বক হ্যালিফাক্স যাত্রা করিলেন।

এই স্বাধীনতাগমরে ওয়াশিংটন যে অদ্ভুত অবদান-পরম্পরা সম্পাদন করিয়াছিলেন, বীরত্বের ও আত্মত্যাগের যে উজ্জ্বল দৃষ্টান্ত সকল রাখিয়া গিয়াছেন, সে সকল আত্মপূর্বিক বর্ণনা করা এ প্রবন্ধে সম্ভব নহে। আমরা কেবল প্রধান প্রধান দুই চারিটা ঘটনা উল্লেখ করিয়া এই জীবনী সমাপ্ত করিব।

ইউনাইটেড স্টেটসে নিউইয়র্ক একটি প্রধান নগর। ইংরাজেরা তাহার উপর আক্রমণ করিবেন শুনিয়া তাহার রক্ষার্থ ওয়াশিংটন তথায় গমন করিলেন। তাঁহার সহিত ১৭০০০ মাত্র সৈন্য ছিল। ২২এ আগষ্ট ইংরাজ সৈন্য নিউইয়র্কের অনতিদূরবর্তী আইল্যাণ্ড নামক দ্বীপের উপকূলে নামিয়াই আমেরিক শিবিরান্তিমুখে অভিযান করিল। ইংরাজ সৈন্য আসিতেছে দেখিয়া আমেরিকানেরা তুর্ক্ষুদ্ধিক্রমে শিবির পরিত্যাগ-পূর্বক তাহাদিগের দিকে অগ্রসর হইল। এই সময় সেনাপতি কিণ্টন অন্য দিক্ হইতে আর এক দল ইংরাজসৈন্য লইয়া আমেরিকানদিগকে আক্রমণ করিলেন। স্মৃতরাং তাঁহাদিগের পলায়নের আশা পর্য্যন্ত রহিল না। দুই সেনার মধ্যে পড়িয়া সেই আমেরিক সৈন্য ভস্মীভূত হইয়া গেল।

সহস্র সৈন্য রণবন্দী হইল। অল্পসংখ্যক মাত্র রক্ষা পাইয়া পরাজয়বান্ধা গৃহে লইয়া গেল।

আমেরিক সৈন্য যুদ্ধে পরাস্ত হইল বটে, কিন্তু নিউইয়র্ক এখনও ওয়াশিংটনের হস্তে রহিল। ইংরাজেরা এই নগর অধিকার করিবার জন্য কৃতসংকল্প হইলেন। ওয়াশিংটন উপকূলে সৈন্য রাখিলেন—উদ্দেশ্য ইংরাজ সৈন্যকে জাহাজ হইতে নামিতে দিবেন না। তিনি স্বয়ংও চাই রেজিমেন্ট সৈন্য লইয়া দূর হইতে ঘটনা পর্য্যবেক্ষণ করিতেছিলেন। ইংরাজসৈন্য আবির্ভূত হইবামাত্র আমেরিকানেরা ভয়ে পলায়ন করিল—একটি মাত্র বন্দুকে আওয়াজ হইল না। বন্দুকের ঝুলি বন্দুকেই রহিয়া গেল। ওয়াশিংটন অল্পমাত্র আত্ম-যাত্রিক সহ রণস্থলে পড়িয়া রহিলেন। তিনি নিজ সৈন্যগণের কাপুরুষতায় এত দূর বিরক্ত, হুঃখিত ও হতাশ হইয়াছিলেন যে, কাতরস্বরে বলিয়াছিলেন যে, ‘এই সকল লোক দ্বারা কেমন করিয়া আমেরিকা স্বাধীনতা পাইবে?’ তিনি যে সময় অশ্ব-পৃষ্ঠে আসীন হইয়া এই কথা ভাবিতেছিলেন, সে সময় তিনি শত্রুসৈন্য হইতে অশীতি-পাদ-পরিমিত দূরে অবস্থিত ছিলেন। ওয়াশিংটনের রণস্থল পরিত্যাগ করিয়া যাইতে যেন কষ্ট হইতেছিল। কিন্তু তাঁহার আত্মযাত্রিকেরা বিপদের আশঙ্কা করিয়া তাঁহার অশ্বের মুখ ফিরাইয়া দিল, এবং অশ্বের বল্গা ধরিয়া টানিয়া তাঁহাকে সবেগে রণস্থল হইতে লইয়া গেল। পরদিন ইংরাজদিগের সহিত একটি সামান্য যুদ্ধ হয়, তাহাতে আমেরিকানেরা জয়লাভ করেন। ইহাতে তাহাদিগের বিলুপ্ত গৌরব কিঞ্চিৎ পুনরুদ্ধৃত হয়। পরাজিত হইয়াও ইংরাজ-সৈন্য

সংখ্যার আধিক্যবশতঃ আমেরিক সৈন্য ভেদ করিয়া মগর মধ্যে প্রবেশ করিল । নিউইয়র্কের রাজতান্ত্রিক দল মহোৎসবে ইংরাজসৈন্যগণকে গ্রহণ করিলেন । তাহার পর উপযুক্ত পরি-
কল্পনা নগরে অগ্নি লাগিয়া নগরের তৃতীয়াংশ ভস্মরাশিতে পরিণত হইল ।

ওয়াশিংটন নিউইয়র্ক পরিত্যাগ করিয়া হার্লেম নগরে শিবির সম্মিলিত করিলেন । তাহার সৈন্যমধ্যে গভীর হতাশ-
তার ভাব দেখা পায়মান হইল । ইংরাজসৈন্য তাহাদিগের অনুসরণ করিল । তাহারা পদে পদে পরাজিত হইয়া অব-
শেষে নর্থ কাসল পাহাড়ের শিখরে আশ্রয় গ্রহণ করিলেন ।
বিজয়লক্ষী এক্ষণে সম্পূর্ণরূপে ইংরাজদিগের করতলস্থ হইল ।
ইংরেজেরা ঘোষণা করিলেন যে, যে সকল বিদ্রোহী ৬০ দিনের
মধ্যে অস্ত্র পরিত্যাগ করিবে, তাহাদিগকে সম্পূর্ণরূপে ক্ষমা
করা যাইবে ।

এই হতাশতার সময় ওয়াশিংটন আমেরিকার একমাত্র
আশা ছিলেন । আমেরিকান মহাসভা তাহাকে ডিক্টেটর-
পদে অভিষিক্ত করিবার সঙ্কল্প করিলেন, তিনি তাহা স্বীকার
করিলেন । কিন্তু সে অবস্থায় কিছু করিয়া উঠিতে পারিবেন
এরূপ সাঁহস তিনি ভিন্ন আর কেহ করিতে পারিত কি না
সন্দেহ ।

ওয়াশিংটনের সৈন্তের হ্রস্ববাহার ইয়ত্তা ছিল না । তাহা-
দিগের পায় ভূঁটা ছিল না, গায় ভাল বস্ত্র ছিল না ; হস্তরাং
মুগ্ধ পদে, নগ্ন দেহে তাহাদিগকে হিমামীমাচ্ছাদিত গিরি-
পঙ্খ ও গিরিশৃঙ্গে পলাইয়া বেড়াইতে হইয়াছে । অনাহারে ও

অনিদ্রার তাহাদিগকে কতদিন যাপন করিতে হইয়াছে। স্বয়ং সেনাপতি অভুক্ত ও অনিদ্র থাকিতেন বলিয়া তাহারা সে ক্লেশ সহিতে পারিত। ভাল শিক্ষা ছিল না, ভাল অস্ত্র শস্ত্র ছিল না বলিয়া ওয়াসিংটন নিজ সেনাকে সমতল ক্ষেত্রে শত্রুগণের সম্মুখীন করিতেন না। দিবসে পর্বত গুহায় লুকা- য়িত থাকিয়া রজনীতে অতর্কিতভাবে ইংরাজশিবিরে পড়িয়া তাহাদিগকে মারিয়া তাহাদের খাদ্য-সামগ্রী, অস্ত্রশস্ত্র ও পরি- চ্ছদাদি লইয়া পলায়ন করিতেন। মহাসভা তাঁহাকে অস্ত্রশস্ত্র অর্থ বা খাদ্য-সামগ্রী দিয়া সহায়তা করিতে পারিতেন না। সুতরাং এ সমস্ত তাঁহাকে নিজেই সংগ্রহ করিয়া লইতে হইত। কোন দেশের কোন সেনাপতিকে এরূপ অসুবিধা ভোগ করিতে হইয়াছিল কি না সন্দেহ। কিন্তু তাঁহার অতিমানুষ- শক্তি বলে তিনি ক্রমে ক্রমে এ সমস্ত বাধা বিপত্তি কাটাইয়া উঠিলেন। তাঁহার সৈন্তেরা ক্রমেই রণদীক্ষিত হইয়া উঠিল, হত শত্রুর অস্ত্র শস্ত্র ও পরিচ্ছদে ক্রমেই তাহারা সুসজ্জিত হইয়া উঠিল। বীরত্বে ও স্বজাতিপ্রেমের ভাবে তাহারা ক্রমেই রণোন্মত্ত হইয়া উঠিল। এতদিনের কষ্ট যন্ত্রণায় ওয়াসিংটনের সৈন্যগণ স্বদেশের মঙ্গলার্থ আত্মবলি দিতে প্রস্তুত হইল।

শব-সাপনায় সিদ্ধ হইয়া ওয়াসিংটনের সৈন্যগণ এখন শত্রুসৈন্যের সম্মুখীন হইল। জলে স্থলে একেবারে তুমুল সংগ্রাম বাধিয়া গেল।

চল পাঠক, একবার কল্পনা-বলে ব্যোমযানে উঠিয়া সেই সন্দের ইউনাইটেড্ স্টেট্‌সের অবস্থা দেখি। ঐ দেখ সমস্ত আমেরিকা জলে স্থলে যেন একটা প্রকাণ্ড যুদ্ধক্ষেত্র বলিয়া

বোধ হইতেছে । ঐ দেখ ! ইংরাজ রণতরি বন্ধঃ স্বীত করিয়া পতাকা উড্ডীন করিয়া আমেরিকানদিগের বিরুদ্ধে ধাবিত হইয়াছে, আর আমেরিকানেরা ভীষণ তোপধ্বনি করিয়া তাহাকে গ্রাস করিতে উদ্যত হইয়াছে । ঐ দেখ ! আর একখানি ইংরাজ জাহাজ শ্বেতপালরাজি বিস্তার করিয়া নিউ-ইয়র্কের বন্দর হইতে ভার্জিনীয়াভিমুখে ধাবিত হইয়াছে । ঐ দেখ ! ইহার সৈনিকেরা উপকূল-বিভাগ বিধ্বস্ত করিয়া লুণ্ঠনার্থ দেশমধ্যে প্রবেশ করিল । ঐ শুন ! পীড়িত ও মূর্খ ইংরাজ সেনাগণের আর্তনাদে গগণ বিদীর্ণ হইতেছে । ঐ দেখ ! অর-রোগে আক্রান্ত হইয়া ইংরাজ-সৈন্য দলে দলে মরিতেছে, তথাপি লুণ্ঠন হইতে নিবৃত্ত হইতেছে না ।

আবার ঐ দেখ ! আমেরিকানেরা কোথা হইতে হঠাৎ আসিয়া ব্রিটিশ শিবিরে পড়িয়া তাহাদের কামান, বন্দুক, তরবারি ও দ্রব্য-সামগ্রী কাড়িয়া লইয়া যাইতেছে । ঐ দেখ ! আর এক দল আমেরিকান্‌ তিমি-বোটে ও ছোট ছোট ষ্টীমারে করিয়া আসিয়া ইংরাজাধিকৃত উপকূল-বিভাগে পড়িয়া ইংরেজেরও দ্রব্য-সামগ্রী লুট করিয়া লইয়া যাইতেছে । যে সেন্টজর্জ হুর্গের লোহিত ক্রসের নিকট একদিন প্রত্যেক আমেরিকান্‌ নতশির হইতেন, আজ সেই সেন্ট জর্জের দিকে কেহ ক্রক্ষেপও করিতেছে না । ঐ যে সহস্র-বজ্র-নাদী কর্ণভেদী শব্দ শুনিলে, উহা একটা হুর্গ উড়িয়া যাইবার শব্দ । আমেরিকানেরা সুড়ঙ্গ কাটিয়া ইংরাজ-হুর্গের নিম্নে গিয়া বারুদে গর্ত পূরিত করিয়া তাহাতে অগ্নি প্রদান করায় ঐ হুর্গ উড়িয়া গেল । ঐ দেখ ! আমেরিকানেরা আর একটা ইংরাজাধিকৃত

সগরের উপর গোলাবর্ষণ করিতেছে। আবার আর একদিকে দেখ! ঐ একটা শতক্ষেত্র দেখিতে দেখিতে রক্তক্ষেত্রে পরিণত হইল। ঐ দেখ! ছই সেনা কি দুন্দুভ দৃষ্টিতে পরস্পরের গতি পর্যবেক্ষণ করিতেছে, এবং ভীষণ লক্ষে পরস্পরের উপর পড়িয়া পরস্পরকে ছিন্ন ভিন্ন করিবার জন্য কি একাগ্রতার সহিত অবসর প্রতীক্ষা করিতেছে। উভয়ের দগবিষয়িণী প্রতিভার পরীক্ষা দিব্য এই একটা প্রকাণ্ড রঙ্গস্থল। ঐ শুন! একেবারে শত শত কামান গর্জিয়া উঠিয়াছে! সহস্র সহস্র বন্দুক পরস্পরকেই ভীষণ শব্দে তাহার উত্তর দিতেছে। চতুর্দিকে ঘন মেঘ উঠিতেছে। ধূমপুঞ্জ দৃষ্টি আবরিত হইতেছে, এবং উভয় সৈন্তের পরস্পর-সংহারী গুলিগোলাবর্ষণে কাণ কাটিয়া পাইতেছে। ঐ দেখ! ইংরাজসৈন্য পরাস্ত হইয়া পশ্চাৎগামী হইল। 'জয় ওয়াশিংটনের জয়, জয় আমেরিকার জয়' শব্দে গগন বিদীর্ণ হইল। এতদিনে স্বাধীনতা রাজতন্ত্রকে পরাস্ত করিল। এতদিনে জাতীয় চুর্গে জাতীয় পতাকা উড়ীন হইল। এই স্বাধীনতা-সময়ের প্রধান নেতা ও প্রাণকূত ওয়াশিংটনের মনঃ আজ সমস্ত আমেরিকায় উদ্দোষিত হইতে লাগিল। এখন স্বাধীন আমেরিকা, বিজয়ী আমেরিকা, নির্দিষ্ট নিয়মে ইংলণ্ডের সহিত বন্ধি করিতে প্রস্তুত আছেন—জানাইবার জন্য ইংলণ্ডে কতিপয় ব্যক্তিকে দৌত্য-কার্য্যে পাঠাইলেন। যে আমেরিকা ইংলণ্ডের রাশি রাশি ট্যাক্স ভরস্বত্বপে পরিণত করিয়াছেন, ইংলণ্ডের জাহাজ জাহাজ চা সাগরগর্ভে প্রক্ষেপ করিয়াছেন, ইংরাজের ভয় প্রদর্শনে পরিহাস করিয়াছেন, ইংরাজের অভয়প্রদানে তুচ্ছ করিয়াছেন; যে আমেরিকা ইংরাজ-

সেনাকে পদ-দলিত ও ইংরাজ-পতাকাকে অবমানিত করিয়াছেন, এবং ইংরাজ-প্রভুতাকে চিরদিনের জন্য বিসর্জন দিয়াছেন, আজ সেই আমেরিক জাতিকে একটা স্বাধীনজাতি, বলিয়া ইংলণ্ডের স্বীকার করিতে হইবে। তাহার সহিত সমান ক্ষেত্রে সন্ধিসূত্রে আবদ্ধ হইতে হইবে, এবং সন্ধিপত্রে স্বাধীন নাগরিকগণের স্বাক্ষর যেন রাজস্বাক্ষর বলিয়া গ্রহণ করিতে হইবে—সম্মতির এ প্রস্তাবে জননী ব্রিটানীয়াকে সম্মত হইতে হইল।

ইংলণ্ডের সহিত সন্ধি হইয়া গেল। কিন্তু ওয়াশিংটনের জীবনের কর্তব্য এখনও পর্য্যাবসিত হয় নাই। তিনি আজ পদ-দলিত আমেরিকাকে স্বাধীন জাতিতে পরিণত করিয়া, রণপাণ্ডিত্যে জগৎকে মুগ্ধ করিয়া, পরিশেষে জগতের শিক্ষার জন্য আত্মত্যাগের পরাকাষ্ঠা দেখাইতে চলিলেন। তাঁহার যে সেনা, অজ্ঞেয় ইংরাজসেনাকে রণে পরাস্ত করিয়াছে, সেই সেনার বলে আজ তিনি ইচ্ছা করিলে আমেরিকার সম্রাট হইতে পারিতেন। কিন্তু সেই যোগীর অন্তরে সে নীচভাব লব্ধ-প্রবেশ হইল না। তাঁহার উদার অন্তরে বরং ইহার ঠিক বিপরীত ভাবেরই উদয় হইল। জাতীয় স্বাধীনতার জন্য তিনি অনিয়ন্ত্রিত জাতীয় সৈন্যপত্য স্বীকার করিয়াছিলেন; কিন্তু আজ সে কার্য্য সম্পন্ন হইয়াছে, সুতরাং তিনি এক্ষণে সে সৈন্যপত্য পরিত্যাগ করিতে কৃতসঙ্কল্প হইলেন। কিন্তু সে পদ পরিত্যাগ করিবার পূর্বে একবার সসৈন্য নিউইয়র্ক নগরে প্রবেশ করিবেন, স্থির করিলেন।

নিউইয়র্কের আজ মহাদিন। নিউইয়র্ক ইংরাজসৈন্যের

সেনানিবাস ছিল। আজ সে ইংরাজসৈন্য স্থলে স্থল না পাইয়া পম্পোনিধির আশ্রয় গ্রহণ করিয়াছে। ঐ দেখ! অদূরে ইংরাজ রণতরি তাহাদিগকে বক্ষে ধারণ করিয়া রহিয়াছে। আজ সে দিকে কেহ দৃকপাতও করিতেছে না। ওয়াসিংটন্—বিজয়ী ওয়াসিংটন—আমেরিকার প্রাণের প্রাণ ওয়াসিংটন—সসৈন্ত নগর মধ্যে প্রবেশ করিবেন, তাই আজ আমেরিকা-বাসিরা আবাল-বৃদ্ধ-বনিতা সর্ব্ব কৰ্ম্ম পরিত্যাগ করিয়া নগর-ভিমুখে ছুটিতেছে। দেখিতে দেখিতে সমস্ত রাজপথ জনাকীর্ণ হইয়া উঠিল—যেন রাজপথে জীবন-প্রবাহ প্রবাহিত হইল—যেন শির-সমুদ্রে সমস্ত নগর প্লাবিত হইল—যেন তরঙ্গের উপর তরঙ্গ পড়িতে লাগিল—নবোদয়ের মত মধুর সূর্য্যরশ্মি তাহাতে পতিত হইয়া জল-তরঙ্গের অপূৰ্ণ শোভা বিধান করিল। এমত সময় সহসা ‘জয় ওয়াসিংটনের জয়, জয় আমেরিকার জয়’ ধ্বনি উথিত হইল। ধ্বনির উপর ধ্বনি, তাহার উপর ধ্বনিতে আকাশ ফাটিয়া যাইতে লাগিল। সেই জয়ধ্বনি সঙ্গে করিয়া অশ্ব-সেনাপরিবেষ্টিত, সুসজ্জিত, অশ্বপুষ্ঠে সমাসীন, রণজিৎ, লোক-প্রাণ ওয়াসিংটন নগরে প্রবেশ করিলেন। জয়ধ্বনি ও মঙ্গলধ্বনিতে নগর পরিপূরিত হইল। রাজপথের উভয়-পার্শ্বস্থ প্রাসাদাবলীর গবাক্ষমালা হইতে অনবরত পুষ্পবৃষ্টি হইতে লাগিল। এত দিন আমেরিকার জাতীয় জীবন ছিল না, স্মতরাং জাতীয় পতাকাও ছিল না। কিন্তু আজ আমেরিকা বিশাল ও প্রবল-পরাক্রান্ত ব্রিটিশ সাম্রাজ্যের প্রতিদ্বন্দী অনন্ত-বলশালী প্রকাণ্ড সাম্রাজ্য। স্মতরাং আজ আমেরিকার নব-সৌভাগ্য-দ্যোতক

পতাকা চাই। যে স্তম্ভের উপর ব্রিটিশ পতাকা উড্ডীন হইত, ব্রিটেনেরা নগর পরিত্যাগ কালে তাহা ভাঙ্গিয়া রাখিয়া দিয়াছে। ঐ দেখ! আমেরিক বীরনাগরিকেরা অমিত বলে ও মহোৎসাহে আজ জাতীয় পতাকার স্তম্ভ গাঁথিতেছে। ঐ দেখ! তাহাদিগের ক্ষিপ্রহস্ততায় নিমেষ মধ্যে স্তম্ভ নির্মিত হইল। ঐ দেখ! আজ আমেরিক জাতীয় পতাকা সগর্বে ও সহর্ষে গগনে নৃত্য করিতেছে—যেন নৃত্যচ্ছলে সমর-বিজয়ী ওয়াশিংটনকে আশীর্বাদ করিতেছে। ঐ দেখ! বীরচূড়ামণি ওয়াশিংটন শিরস্ত্রাণ খুলিয়া নগ্ন শিরে নগর-মধ্যে প্রবেশ করিতেছেন, ও অবনত মস্তকে স্বজাতীয় ভ্রাতৃগণকে নমস্কার করিতেছেন। অনেকে আজও তাঁহাকে দেখে নাই, অথবা দেখিয়াও তত আকৃষ্টচিত্ত হয় নাই। অনেকে আজও ওয়াশিংটনের নামও শুনে নাই। কোন্ দেবতা ছদ্মবেশে তাঁহাদিগের মধ্যে এত দিন বাস করিতেছিলেন, দেখিবার নিমিত্ত আজ সমস্ত আমেরিকা প্রায় সেখানে উপস্থিত। আমেরিকাবাসিগণের সমস্ত ইন্দ্রিয় যেন আজ তাহাদিগের নয়নে সংক্রামিত হইয়াছে। তাহারা আজ প্রাণ ভরিয়া উপচিত শক্তিতে তাহাদিগের উদ্ধার-কর্তাকে দেখিতে লাগিল। আজ ওয়াশিংটন প্রত্যেক আমেরিকাবাসীর হৃদয়ের অধিষ্ঠাত্রী দেবতা। আজ তিনি প্রত্যেক আমেরিকাবাসীর নয়নের অঙ্কন। তাঁহাকে বারবার প্রণাম করিয়া ও অনবরত দেখিয়াও আজ তাহাদিগের তৃপ্তি হইতেছে না। ধন্য ওয়াশিংটন! ধন্য তোমার জীবন! অনাহারে অনিদ্রায় তুমি যে এতদিন ঘোর শবসাধনা করিয়াছিলে, আজ তাহার সিদ্ধি দেখিয়া না জানি তোমার মনে কি সুখ-

সাগর উথলিয়া উঠিয়াছে ! তুমি আমেরিকার যে কাজ করিলে
যতকাল আমেরিকা থাকিবেন, ততকাল কখনই তোমার সে
উপকার ভুলিতে পারিবেন না । আমেরিকায় কখনই জাতীয়
জীবন ছিল না, সুতরাং তুমি আজ একটি নূতন জাতি সৃষ্টি
করিলে । জানিও তোমার তপোবলে ও চরিত্র-মাহাত্ম্যে সেই
জাতি একদিন জগতের তীর্থস্থল হইবে । ধন্য তোমার বীরত্ব !
তুমি বিনা শিক্ষায়, বিনা অস্ত্রবলে যুদ্ধক্ষেত্রে অবতীর্ণ হইয়াও
একটি বিশ্ব-বিজয়িনী জাতিকে পরাস্ত করিলে । তোমার
অসাধ্য কিছুই নাই !

১৭৭৫ খ্রীষ্টাব্দে ওয়াশিংটন্ আমেরিকার সৈন্যপত্য গ্রহণ
করেন । তাঁহার অতিমানুষ বীরত্বে আমেরিকার চরণ হইতে
ব্রিটিশ শৃঙ্খল স্থলিত হইল । তাঁহার যত্নে আমেরিকাবাসিগণ
পৃথিবীর একটি স্বাধীন জাতিমধ্যে পরিগণিত হইলেন । তাঁহার
জীবন ত্রুতের পূর্ণ উদ্ধাপনা হইলে তিনি ১৭৮৩ খ্রীঃ অব্দে জাতীয়
সৈন্যপত্যের পদ পরিত্যাগ-পূর্বক আপন গ্রাম্য আবাসে গমন
করিয়া সাধারণ লোকের ন্যায় সংসারযাত্রা নির্বাহ করিতে
লাগিলেন । কিন্তু অধিক দিন তিনি বিশ্রাম-সুখ ভোগ করিতে
পারিলেন না । অচিরকাল মধ্যেই আমেরিকায় আবার তাঁহার
শরণাপন্ন হইল । তিনি যে শুদ্ধ বীরত্বে অদ্বিতীয় ছিলেন,
এরূপ নহে । তিনি অসাধারণ-ধীশক্তি-সম্পন্ন ও প্রগাঢ় রাজ-
নীতিজ্ঞ ছিলেন । বিশেষতঃ নিষ্কাম দেশহিতৈষণার জন্য তিনি
আমেরিকাবাসিমাঝেরই উপাস্য দেবতা ছিলেন । যখন প্রেসি-
ডেন্টের পদ সৃষ্ট হয়, তখন সকলে একবাক্যে তাঁহাকেই ঐ
পদে বরণ করিলেন । তাঁহাকে গ্রাম্য আবাস পরিত্যাগ করিয়া

অগত্যা ঐ জাতীয় অধিনায়ক পদ গ্রহণ করিতে হইল । পাঁচ দশকের অধিক এই পদে থাকার কাহারও অধিকার নাই । কিন্তু ওয়াশিংটন তিনবার এই পদে মনোনীত হন । অবশেষে ১৭৯৯ খ্রীষ্টাব্দের ১৪ই ডিসেম্বর তিনি মানবলীলা সম্বরণ করেন । জাতীয় মহামত্যার সভ্যরা ও দেশের সমস্ত লোক এই শোচনীয় ঘটনার একমাস কাল শোকচিহ্ন ধারণ করেন ।

এই মহাপুরুষের মৃত্যুতে জাতীয় হৃদয়ে শোক উদ্দীপিত করিবার জন্য কোন জাতীয় বিধি-ব্যবহার প্রয়োজন হয় নাই । যে মহাপুরুষের প্রণোৎসর্গের ফলে আজ আমেরিকা জনস্ব-দৌভাগ্যশালিনী ও জনস্ব-সুধবতী ; যাহার বীরত্বে ও ধর্মবলে একদিন আমেরিকা অগণ্য বিপদ্পরম্পরা হইতে উদ্ধার লাভ করিয়াছিলেন ; যাহাকে আমেরিকাবাসীরা এতদিন পিতার ম্যায় ভক্তি করিয়া আসিতেছিলেন,—সেই পবিত্র-হৃদয় মহাপুরুষ আজ ইহলোক পরিত্যাগ করিয়া গিয়াছেন—বলিয়া আজ আমেরিকার আবাল-বৃদ্ধ-বনিতা শোকে অভিভূত । সে গভীর শোক ব্যক্ত করা অসম্ভব । তথাপি যাহার মেরুপ সাধ্য, আমেরিকাবাসিগণেই সেইরূপে জাহা ব্যক্ত করিবার চেষ্টা করিয়াছিলেন । বাগ্মী সভাগৃহে বক্তৃতা করিয়া, যাজক ভজনালয়ে সান্নিধ্য (ধর্মনীতি-বিষয়ক বক্তৃতা) দিয়া, সম্পাদক সম্মাদপত্রের স্তম্ভে লিখিয়া, জাতিসাধারণ নীরবে অক্ৰন্দল হেলিয়া—এই মহাপুরুষের মৃত্যুজনিত শোক প্রকাশ করিয়াছিলেন ।

ওয়াশিংটন যে আমেরিকাবাসিগণের বাস্তব পিতা ছিলেন, তাহা বিবরণে আর সন্দেহ নাই । বিপদের দিনে যখন আমেরিকা-

বাসিগণ কিংকর্তব্যবিমূঢ় হইয়া পড়িয়াছিলেন, তখন তিনি তাঁহাদিগের একমাত্র বন্ধু ও একমাত্র সহায় ছিলেন। অস্ত্র শস্ত্র নাই, শিক্ষা নাই, অতীত জাতীয় গৌরবের উদ্দীপনা নাই, ধন নাই—এরূপ অবস্থায় জাতীয় গৌরবের ভাবে সৈন্যগণকে উদ্দীপিত করা অসাধ্য-সাধন বলিলেও অতুক্তি হয় না। ওয়াশিংটন সেই নিরস্ত্র, বিবস্ত্র অশিক্ষিত সেনাকে আপনার প্রাণোৎসর্গের মোহিনী মন্ত্রবলে অচিরকাল মধ্যে অজ্ঞেয় করিয়া তুলিয়াছিলেন। এ স্বাধীনতাসমরে আতিসাধারণ তাঁহাকে অনিয়ন্ত্রিত প্রভুতা দিয়াছিল মাত্র, কিন্তু তাঁহাকে আর কোন প্রকারে সহায়তা করে নাই। তিনি স্বজাতির ধন লুণ্ঠন করিয়া আপনার ও সেনার উদরপূরণ করিতে ইচ্ছা করেন নাই। এই জন্য তিনি ও তাঁহার সেনা পার্শ্বীয় বৃক্ষ-লতা-দির ফলমূল ভক্ষণ করিয়া এই শব-সাধনা করিয়াছিলেন। সেই যোগবলেই এরূপ মহতী সিদ্ধিলাভ করিয়াছিলেন। তিনি আমেরিকাকে পূর্বগৌরবে প্রতিষ্ঠাপিত করেন নাই, কারণ আমেরিকার পূর্বগৌরব ছিল না। তিনি আমেরিক জাতির সৃষ্টিকর্তা, আমেরিকার জাতীয় গৌরবের ও জাতীয় স্বাধীনতার প্রতিষ্ঠাতা, এবং আমেরিকার জাতীয় জীবন ও জাতীয় ইতিহাসের প্রবর্তয়িতা। সুতরাং আমেরিকাবাসীরা এরূপ মহাপুরুষের জন্ত শোকচিহ্ন ধারণ করিয়া ও এরূপ মহাপুরুষের নামে তাঁহাদিগের রাজধানীর নামকরণ করিয়া তাঁহাদিগের প্রকৃত সহৃদয়তার পরিচয় দিয়াছেন।

এই মহাপুরুষের মৃত্যুতে ফ্রান্স ও ইংলণ্ডও শোক-চিহ্ন ধারণ করিয়াছিল। ৯ই ফেব্রুয়ারি এই সংবাদ প্রথমে ফ্রান্সে

উপস্থিত হয়। তখন সুপ্রসিদ্ধ নেপোলিয়ন্ বোনাপার্ট সাধারণতন্ত্রী ফ্রান্সের প্রথম কন্সলের পদে অভিষিক্ত ছিলেন ; তিনি নিজ সৈন্তগণের প্রতি এই আদেশ প্রচার করেন :—

“সৈন্তগণ ! ওয়াসিংটনের মৃত্যু হইয়াছে ! এই মহাপুরুষ যথেষ্টাচারের বিরুদ্ধে যুদ্ধ করিয়াছিলেন। তিনি স্বদেশের স্বাধীনতা প্রতিষ্ঠা করিয়াছিলেন। সুতরাং ফরাসী জাতি ও পৃথিবীর স্বাধীন জাতিমাত্রেয়ই নিকট তাঁহার স্মৃতি অতি প্রিয়। বিশেষতঃ ফরাসি সৈন্তগণের নিকট ইহা প্রিয়তর ; কারণ, ফরাসীসৈন্ত তাঁহার ন্যায় ও তাঁহার সৈন্তগণের ন্যায় স্বাধীনতা ও সাম্যের জন্য যুদ্ধ করিয়াছিল ! অতএব তোমরা সকলেই তাঁহার জন্য শোকচিহ্ন ধারণ করিবে।” তিনি আরও আদেশ করিলেন যে, ফরাসী সাধারণতন্ত্রের সমস্ত পতাকায় ও পতাকা-স্তম্ভে দশ দিন কাল কৃষ্ণ ক্রেপ সংলগ্ন রাখিতে হইবে। পারিস নগরীর এক হোটেলে (Hotel des Invalides) ওয়াসিংটনের স্মৃতির সম্মানার্থ একটি আন্তোষ্টিক বক্তৃতা করা হইল। সেই বক্তৃতা স্থলে নেপোলিয়ন্ ও সমস্ত সিভিল ও মিলিটারী কর্মচারীরা উপস্থিত ছিলেন। ফ্রান্স কোন বৈদেশিকের জন্য আর কখন এরূপ শোক প্রকাশ করেন নাই।

যখন ইংলণ্ডের রণতরী সকল টোর্বে বন্দরে নোঙ্গর করিয়াছিল, সেই সময় পোতাধ্যক্ষ লর্ড ব্রেড্‌ফোর্ডের নিকট এই সংবাদ আসিল। এই শোচনীয় সংবাদে শত্রুও মন বিগলিত হইল। তাঁহার আদেশে তদীয় পোতের পতাকা অর্ধ-নমিত করা হইল। অবশিষ্ট উনবাইট খানি রণতরী মুহূর্ত্ত মধ্যে তাঁহার দৃষ্টান্তের অনুবর্ত্তন করিল। ধন্য ওয়াসিংটন ! তুমি চরিত্র-

গৌরবে আজ শত্রুর হৃদয়ও বিগলিত করিয়া তাঁহার মিকট পূজা গ্রহণ করিলে। তোমারি নিকাম স্বদেশহিতৈষণা তোমাকে অনন্ত কাল এইরূপে শত্রু যিহ উভয়েরই পূজাই করিয়া রাখিবে। দেব! আমার হৃদয়-আসর্গে একবার আবির্ভূত হইয়া আমাকে এইরূপ নিকাম ধর্ম শিক্ষা দাও। একবার আবির্ভূত হইয়া ভারতে দারিদ্র্য-ব্রতের ও নিকাম আত্ম-ত্যাগের মহিমা প্রচার কর। দেব! একবার দেখা দিয়া পতিত জাতিকে স্বজাতিপ্রেম ও স্বদেশানুরাগ শিখাও !



উপসংহার ।

আমরা এই প্রবন্ধে শব্দর, বশিষ্ঠ, বিশ্বামিত্র, বুদ্ধ, খৃষ্ট, চৈতন্য, গুরুগোবিন্দ, ওয়ালেস্, টেল্, হ্যামডেন্, হাউয়ার্ড, উইলবারফোর্স রোমিলি, ম্যাট্‌সিনি, গারিবল্ডী, ওয়াশিংটন্ প্রভৃতি যে সকল প্রাতঃস্মরণীয়-চরিত মহাপুরুষগণের নাম সঙ্কীৰ্ত্তন করিলাম, তাঁহারা প্রত্যেকেই আত্মোৎসর্গের এক একটী জলন্ত দৃষ্টান্ত । এই জন্যই এ প্রবন্ধের নাম আত্মোৎসর্গ বা প্রাতঃস্মরণীয়-চরিত-মালা রাখিলাম । ইহারা প্রত্যেকেই এক একটী গুরুতর ব্রত গ্রহণ করিয়াছিলেন । প্রত্যেকেই সেই সেই ব্রতের উদ্‌ঘাপনায় নিজ নিজ জীবন উৎসর্গীকৃত করিয়াছিলেন । প্রত্যেকেই নিজ নিজ সম্পদিতে জলাঞ্জলি দিয়া দারিদ্র্য-ব্রত গ্রহণ করিয়াছিলেন । প্রত্যেকেই নিজ নিজ জীবনে প্রত্যক্ষ দেখাইয়া গিয়াছেন যে, ধনস্পৃহা আত্মত্যাগের প্রতিবন্ধক । যিনি পরহুঃখ-কাতর, তিনি পরহুঃখ দেখিয়া কখন ধন পুঞ্জীকৃত করিয়া রাখিতে পারেন না । ধর্ম-জীবনের প্রথম কার্য—ধনোৎসর্গ, দ্বিতীয় কার্য—প্রাণোৎসর্গ । খৃষ্টের জীবনে এই দুইটাই ঘটয়াছিল বলিয়া তিনি আজও সুশিক্ষিত ইউরোপ ও মার্কিন ভূমিকে মন্ত্রমুগ্ধ করিয়া রাখিয়াছেন । কার সাধ্য সেখানে বলে যে খ্রীষ্ট মানব ছিলেন, দেবতা নহেন ? আমেরিকায় একবার পার্কার এই কথা প্রচার করিতে গিয়া প্রায় প্রাণ হারাইয়াছিলেন । বুদ্ধ ধনোৎসর্গের প্রধান বীর । তিনি রাজপুত্র হইয়াও ভাবী রাজসিংহাসনের আশায় জলাঞ্জলি দিয়া মানব-


হিতব্রতে জীবন উৎসর্গ করিয়াছিলেন। এই জন্য আজও পৃথিবীর এক-তৃতীয়াংশ অধিবাসী বুদ্ধ শাক্যসিংহের উপাসক। হিন্দু যবন মিশাইতে গিয়া গুরুগোবিন্দও ঘাতক-হস্তে প্রাণ হারাইয়াছিলেন। ওয়ালেস্ স্বজাতির উদ্ধার সাধন করিতে গিয়া ইংরাজ ঘাতকের হস্তে প্রাণ বিসর্জন করিয়াছিলেন। তাঁহার অল্প প্রত্যক্ষ সকল সতীর অঙ্গের ন্যায় স্থানে স্থানে প্রক্ষিপ্ত হইয়াছিল। হ্যাম্‌ডেন্‌ও জাতীয় স্বাধীনতা রক্ষা করিতে গিয়া প্রাণ হারাইয়াছিলেন। ম্যাট্‌সিনি ও গ্যারিবল্‌দী দিন দিন একটু একটু করিয়া শরীর গলাইয়া স্বজাতি-উদ্ধারানলে আহুতি দিয়াছিলেন। ওয়াসিংটন্‌ ও টেল্‌ জীবনের সমস্ত অলাঞ্ছন দিয়া স্বদেশের উদ্ধারানলে কাঁপ দিয়াছিলেন। তাঁহাদিগের সৌভাগ্যক্রমে তাঁহারা সে অগ্নিপরীক্ষায় উত্তীর্ণ হইয়াছিলেন। হাউয়ার্ড, উইল্‌বারকোর্স, ও রোমিলী ইহারা মানব-প্রেমে উন্মাদিত হইয়া মানবজাতির দুঃখমোচনে ধন ও প্রাণ উৎসর্গ করিয়াছিলেন। এই বোগিবৃন্দের প্রত্যেকের জীবনেই ধনোৎসর্গ ও প্রাণোৎসর্গের বহুল দৃষ্টান্ত উপস্থিত হয়। কেহ পূর্ণ যোগী, কেহ বা অর্দ্ধ-সংসারী ও অর্দ্ধযোগী এইমাত্র ভেদ। সকলেরই জীবনের একই লক্ষ্য—মাত্ৰ দুঃখ-নিবৃত্তি ও মানব-সুখবৃদ্ধি। দারিদ্র্য এই শব্দ-সাধনার প্রধান উপকরণ-সামগ্রী বলিয়া ইহারা সকলেই দারিদ্র্যকে মিত্র-ভাবে আলিঙ্গন করিয়াছিলেন। শ্মশানে শিব, ক্যাপ্তেরার মরুভূমিতে গ্যারিবল্‌দী, মার্সেলিসের ভূমধ্য-গহ্বরে ম্যাট্‌সিনি, স্কটল্যান্ডের পর্বতগুহায় ওয়ালেস্‌, কারাগারের অন্ধ-কারে ও কুষ্ঠরোগাক্রান্তদিগের চিকিৎসালয়ে হাউয়ার্ড, দাস-

দিগের কুটীরে উইলবারফোর্স, আলিঘানী পর্বতের নীহারিণী অধিত্যকায় ওয়াসিংটন্, সুইজলণ্ডের পাষাণে টেল্, তপো-বনের পর্ণকুটীরে বশিষ্ঠ, বিশ্বামিত্র ; রোগীর রুগ্নশয্যায় বা মৃত্যু-শয্যায় বৃদ্ধ ; পাপী ও তাপীর যন্ত্রণাগময় আগারে খ্রীষ্ট, বৈরাগীর স্থগিলভাসনে চৈতন্য, কারাগারের তমোময় গর্ভে হাম্‌ডেন্, ও অপরাধীর রুধির-কর্দমিত বধ্যভূমিতে রোমিলী এবং পিতৃ-শবোপরি গুরুগোবিন্দ শবসাধন করিয়াছিলেন । রাজপ্রাসাদ শবসাধনার উপযোগী স্থল নহে । ঐশ্বর্য্য শবসাধনার অনুকূল সাধন-সামগ্রী নহে । পর্ণকুটীর, গৈরিক বনন, কমণ্ডলু, উল্লবৃষ্টি প্রভৃতিই শবসাধনার অনুকূল স্থান ও সাধন-সামগ্রী ।

আবার ভারতে এই সকলের আবশ্যকতা হইয়াছে । কিন্তু এবার আমাদের শবসাধনার লক্ষ্য শুদ্ধ পরকাল নহে,—ইহকালও । এবার আমরা পরের দুঃখে উদাসীন হইয়া সংসার ছাড়িয়া নির্জ্ঞান কুটীরে বসিয়া কেবল নিজের পারলৌকিক হিতের চিন্তায় নিমগ্ন থাকিব না । এবার আমরা সে নিজ-হিতৈষণা পরিত্যাগ করিয়া স্বদেশের মঙ্গলার্থ শবসাধনা করিব । এবার আমরা কেবল নিজের স্বর্গ নরক লইয়া ব্যতিব্যস্ত থাকিব না । আমি নরকে যাই তাহাতে আমার দুঃখ নাই, কিন্তু আমার প্রাণাপেক্ষা প্রিয়তর জন্মভূমি যেম আমার শবসাধনার বলে নরক হইতে উখিত হয় । আমি স্বর্গে যাইতে না পারি, তাহাতেও আমার দুঃখ নাই, কিন্তু আমি যেন অন্ততঃ মৃত্যুকালেও দেখিয়া যাই যে, আমার দেশ অপূর্ব্ব স্বর্গরাজ্যে পরিণত হইয়াছে, আমার জাতি দেবোচিত সৌভাগ্য ভোগ

করিতেছে। না জানি, সে সৌভাগ্যের দিন কতদিনে আসিবে! কে বলিতে পারে, কতদিনে আসিবে?

আমি শয়নে স্বপনে দেখি যেন মা আমার আবার অনন্ত-বলশালিনী হইয়াছেন। যেন দশদিক্ আবার আলোকিত হইয়াছে! যেন আবার আনন্দে উচ্ছ্বসিত হইয়া মা আমার নগরে নগরে দীপমালা পরিধান করিয়াছেন! এবার মা বিচ্ছিন্নাঙ্গ নহেন, এবার মা একচ্ছত্রী। আমি যেন প্রত্যক্ষ দেখিতেছি, মায়ের চরণে অঞ্জলি দিবার জন্য—পুনর্জীবিতা জননীর আরাধনা করিবার জন্য—সমস্ত সন্তান আজ একত্র মিলিত হইয়াছেন। ভাই! ঐ গুন, স্বর্গে দেবতার। হৃন্দুভি বাজাইতেছেন। ঐ দেখ! মায়ের মস্তকে পুষ্পবৃষ্ট হইতেছে। আজ স্বর্গে মর্ত্যে মহোৎসব! আজ দেব, বরু, রক্ষ, কিন্নর একতানে মিলিয়া মায়ের অভিব্যেক-গান গাইতেছেন। আইস ভাই! আমরা সন্তানগণ সেই সুরে সুর মিলাইয়া ঐশ্বর্য ভরিয়া মায়ের আগমনী গাই। একি প্রত্যক্ষ! না মায়া! না স্বপ্ন! না উন্মাদ-বিজৃম্বন! আমি কি বলিব? ভবিষ্যৎ ইহার উত্তর দিবে।



OPINIONS OF THE PRESS.

THE INDIAN MIRROR,—*Friday, April 30, 1880.*

THE LIFE OF JOSEPH MAZZINI, Part I.

(By JOGENDRA NATH BANERJEE, VIDYABHUSAN, M. A.)

The life of JOSEPH MAZZINI of Genoa, who prompted by an enthusiastic love of liberty, gave up his legal profession, for a political and patriotic life, presents several important features which can be studied with great advantage by the Bengalis of present generation. Babu Jogendra Nath Vidyabhusan deserves credit for writing in the Bengali language a detailed account of the life and doings of that Italian celebrity, and placing it before the educated Bengalis. Though there are several points in the Life of Mazzini, of which it should be paramount duty of the natives of India to steer clear, the manliness, the spirit, the maddening passion for doing good to his country, the zeal displayed in carrying out his professions into practice, the calmness of mind shown under the most trying circumstances and other virtues which he possessed in so eminent a degree, can safely be imitated by such of the Indian races as are wanting in unity, in thought and action, and in the religious veneration for their mother land, which characterized the feelings of their fore-fathers. The best way to instil an idea of patriotism into the minds of the Bengalis is by bringing them into close contact with the biographies of celebrated patriots, and not by pestering the country with the perpetual and mindless cries of Bharat Jay which have become the watch-word of a certain portion of the Native community. * * * * Patriotism and love of unity—moral qualities that depend on one another for their growth and development—are, we believe, the chief points which the author is anxious to impress upon the minds of his readers. The language in which the work is written, is Bengali “pure and undiluted,” and does credit not only to the taste and education of the author but to his strong sense of attachment to his mother language, which he has spared no pains to render acceptable by the clearness and elegance of his diction and by the nobleness of his sentiments.

HINDU PATRIOT,—*January 27, 1879.*

We acknowledge with thanks the receipt of a copy of JOHN STUART MILL'S LIFE IN BENGAL by Babu Jogendra Nath Bandyopadhyay, M.A. It not only gives a sketch of the life and career of the great philosopher, but also of his views and theories on political economy, psychology, sociology and the science of government. It is written in a classic style, and breathes a spirit of thoughtfulness not ordinarily met with among Bengali authors. We have much pleasure in commending it to our reading public.

